

الأرشيف الإعلامي في الربع الثالث من 2019

يوليو- أغسطس- سبتمبر 2019

من معاناة الأهالي

أم:

"انا بقالي كام يوم اروح واقف عند شديد الحرارة ؟ علشان ادخل لابني رواء وشوية صابون
وإدوات نظافة وبرجع كل حاجة بكل حاجة بحجة ان مستام الامانات مش موجود وطبعاً بيكطعوننا
بالخمس ست ساعات في الشمس وفي الاخر يمشونا. لا تتخيلوا الامهات وكثير منهم سنوات
جدا وكية القمر- والبكاء هناك وبهدلة الكل اللي احيانا يصل من بعض الامناء برفضهم
وازاحهم بالقوة بعيد عن الاتوبيسات اللي بتخرج من جوا للمحكمة محملة بأبناء هم وهما
بيصروا وينادوا عاين بكل حرقة قلب وقهر... يارب خدنا وريحنا او خد حقنا وأنصفنا"



أول امبارح #عبد_المنعم_ابو_الفتوح اتعرض لذبحة صدرية للمرة السابعة منذ اعتقاله وامبارح اتعرض برضو لذبحة صدرية للمرة الثامنة، ده غير الأزمات المتكررة اللي بيتعرض فيها لإنقطاع التنفس أثناء النوم، وغير معاناته بسبب الإنزلاق الغضروفي اللي جاله من سوء المعاملة أثناء ترحيله في بداية فترة اعتقاله واللي لحد دلوقتي ممنوع من علاجه واللي تسبب في الحد من قدرته عالحرارة بدرجة تجعله عرضة للجلطة في أي وقت، واللي وارد تكون حصلت

له ومحدث قادر يعرف في ظل حرمانه من الفحوصات الطبية التشخيصية المتخصصة، ده غير المعاناة اليومية من أعراض تضخم البروستاتا اللي بسببها اصبح النوم الطبيعي دون انقطاع، ولو لمدة ساعة واحدة، حلم بالنسبة له، واللي كان متحدد له من الأصل موعد جراحة قبل القبض عليه، غير معاناته من أعراض الاضطراب المستمر في نسبة السكر في الدم ... وكل ده سببه الوحيد هو ظروف الحبس السيئة اللي ولا تناسب سنه ولا حالته الصحية وتطوراتها السلبية مع استمرار التعنت الشديد في عدم تغييرها ... وأصبحت الرعاية الطبية الوحيدة اللي بيحصل عليها هي الأدوية اللي بقيت كتيرة جدا وبطريقة عشوائية من غير إشراف طبي حقيقي ومتابعة طبية صح، وده مش لإن طبيب السجن وحش أو مقصر، لكن ببساطة لأن طبيب السجن عاجز وغير متاح له من الأصل انه يبقى طبيب طبيعي يملك استخدام الأدوات والوسائل الطبيعية لأي طبيب علشان يشخص ويعالج ويتابع المريض بطريقة صح؛ زي اتاحة الفحوصات الطبية المتخصصة وزى امكانية اتباع المريض تعليمات تخص أكله وظروف معيشته هو في الأصل لا يملك القدرة على التحكم فيها أو تطبيق أي منها، وزى ان العلاج الصحيح غير مسموح به سواء عملية جراحية أو علاج طبيعي أو مثلا السماح بجهاز دعم التنفس أثناء النوم ووضع في ظروف بيئية مناسبة علشان يشتغل بفاعلية، فتختزل الرعاية الطبية جوه السجن في وصف أدوية من أطباء لا حيلة لهم، خاصة لو أمام مريض بأمراض مزمنة مرتبطة ببعضها وأعراضها متداخلة فيما بينها، واسمه الطبيب كشف عليه، ده الطبيب اللي جاله أصلا بعد طلب وإلحاح وتأخير، ووصف ادوية، ده برضو الدوا اللي جاله بعد طلب وتأخير، ويوم ما تم أخده عينة دم لإجراء تحاليل تظل النتائج مستندات سرية لا يسمح له ولا لطيبه خارج السجن ولا لأهله ولا لأي من هيئة دفاعه بمجرد الإطلاع عليها مش الحصول على نسخة منها مثلا، وطبعا النتيجة اللي بنسمعها ان مفيهاش أي حاجة وكله تمام ... ويوم ما طلبنا عينة لعمل التحاليل مرة تانية في معمل خارج السجن، وده مسموح وفقا للقانون ولوائح السجن، الرد كان هنعرض الأمر والنتيجة كانت الرفض ... والمفروض ان ده كلام طبيا وقانونيا نقتنع به ونصدق ...

على مدار 16 شهر من الحبس الإنفرادي والإنعزالي المشدد للغاية اتبعنا تقريبا كل السبل القانونية المتاحة دون أي استجابة من أي جهة؛ طلبنا نقل للمستشفى، سواء بره السجن أو حتى مستشفى السجن لحين إنهاء محاكمته واتفرض؛ طلبنا استبدال الحبس الاحتياطي بتدابير احترازية زي تحديد الإقامة مثلا واتفرض، طلبنا تحسين ظروف الحبس طيب وإنهاء عزلته لا لشيء سوى ان يكون فيه حد قريب منه يساعده حتى لو تعب بدل ما كل مرة يفضل يستغيث بلا مجيب وبرضو اترفض، طلبنا طيب تحسين وضع الزنزانة بادخال أبسط الأشياء اللي هي في الأصل حقه وفقا للقانون ولوائح السجن وبرضو اترفض، طلبنا طيب تدابير أخرى من إدارة السجن من أجل تحسين الإستجابة الطبية خاصة وقت تعرضه لأزمات صحية زي ان يكون فيه حارس قريب منه أو يتم ترك باب الزنزانة مفتوح طالما كدة كدة معزول في عنبر

كامل لوحده ومغلق عليه بحيث يقدر يقرب من باب العنبر ينادي على حد لو تعب بدل ما محدش يبسمعه وبرضو مفيش ... طب بلاش تأخير لما حد يسمعه ويحتاج حاجة زي دكتور أو دوا وبرضو مفيش استجابة وفيه تأخير ... وكل مرة نطلب فيها حاجة بيكون الرد المعتاد هنعرض الأمر ومفيش تعليمات والردود السلبية المعتادة المعروفة ...

احنا مبنتكلمش في إدخال الكتب والصحف والراديو وورق وقلم والسماح بالمراسلات مع أهله أو بالترريض الكافي في الشمس والهوا، أو صلاة الجمعة أو انتهاء عزلته، ولا المكتبة ولا ترجع الزيارة الطبيعية العادية اللي ممنوع منها من 6 شهور بدل الزيارة الأسبوعية اللي بيفضل شايل همنا فيها علشان بنقعد من 10 الصبح للساعة 5 علشان ربع ساعة من ورا الزجاج كل واحد يبسمع صوته دقيقتين من سماعة، وبنفضل شايلين همه فيها علشان الترحيلة اللي لازم تنقله من سجن لسجن في عز الحر ده، ولا انه يسلم حتى على أحفاده الأطفال، ولا ادخال الأكل الخاص به يوميا او تلاجة صغيرة للاكل والدوا او بطاطين كفاية في عز البرد او تهوية جيدة في عز الحر ده، وغيره كتير من الحقوق الأساسية المحروم منها والتي هي حقه وفقا للقانون ولوائح السجون، والتي أي سجين، ولو محكوم حتى، بيحصل عليها كاملة، وده أكيد حقه الطبيعي، لكنها أصبحت بالنسبة لأبو الفتوح عند صاحب القرار في دولة التعليمات من الممنوعات ...

احنا حاليا بنتكلم في الحد الأدنى من الظروف اللي تضمن سلامته الجسدية لأننا بكل أسف أصبحنا حاليا بنتفرج عليه وهو بيتعذب بسبب ظروف الحبس وحالته الصحية تعذيب يؤدي للوفاة بلا أي مبالغة .. حقيقة مؤسفة ومؤلمة .. إن أبو الفتوح محبوس في ظروف فيها مسببات للوفاة في ظل وضعه الصحي المتردي ده، مهما ادعى أي حد غير كدة، وده مفيش أدل عليه من اللي حصله امبارح واول امبارح بتعرضه لذبحة صدرية مرتين ورا بعض وكل اللي عمله طبيب السجن اللي جاله بعد ساعات هو أنه وصفله موسع للشرايين ...

ده اسمه تعذيب وقتل بطيء مش حبس مهما كانت ظروفه الحالية، والتي ممكن البعض يبقي شايفها عادية مقارنة بأخرين محبوسين في ظروف أسوأ منها، لكنها في واقعها الحالي بتقتله...

لو حصل لأبويا حاجة في ظروف حبسه دي هتبقى ساعتها جريمة قتل عمد ارتكبتها من يملك قرار تغيير وضعه الحالي ولم يفعل، ومش هيبقى اسمها اتعرض لأزمة قلبية ومات موتة طبيعية، لأن الفرق كبير جدا بين كيفية الوفاة وأسباب الوفاة، وأبويا بيعاني في حبسه حاليا وبحالته دي من أسباب تؤدي للوفاة ودون أي استجابة لطلب تغييرها بلا أي مبرر قانوني بما يجعله إهمال متعمد.

كل ده مع العلم ان من أكثر من سنة ومفيش أي تحقيقات جارية معاه في أي تهمة تم اتهامه بها ومفيش أي أدلة اتقدمت ضده .. مفيش غير تجديد مستمر ومفتوح كل 45 يوم في الفراغ والمجهول ... ومفيش حاليا طريقة لحمايته من الموت غير بنقله للمستشفى سواء خارج السجن أو مستشفى السجن وعلى نفقته الخاصة ونحصل على فرصة لإنقاذه من الموت..

<http://bit.do/eXKYi>

همس وهيا : أبي متى ستأتي أمي وأين هي الآن؟! بل
اجبنا الان لما يحدث كل هذا لنا؟!
فما يجيب الاب "اين امي"؟! أيقول هناك بعيدا في
سجن القناطر مثلما كنت اقع انا في سجن العقرب
فيجدد لهم ذكرى ربما لم تنسى بمخيلتهم بعد....
ويتبع " متى ستأتي " أيقول قريبا؟! ام يتخيل انه ليس
قريبا ، ام انه ربما تمر الشهور؟! ولكنها ستأتي ذات
يوم ماما!



أيقول لهم وهم مازالو اطفالا لم ينسو بعد اعواما من
الالام قضوها مع والدتهم رغم محاولاتها بالتخفيف
عنهم ان كل شيء سيعاد من جديد ولكن مع " ماما " وليست مع " بابا..."
أيقول لهم اصبروا فتعاد الاسنله وتفتح بابا ربما لا يُستطاع اغلاقه لما نصبر ، ماذا فعلنا لكي نصبر ، والى
متى؟! ام ماذا!؟

وعن ماذا سيجيب عن سؤال " لما كل هذا " ايجيب عذرا لانكم هنا ، ام عذرا على طفولتكم المنهوبة
المسلوبة التي لا يجب ان تكون هكذا ولكنها مجبرة مثلنا تماما على كل شيء ، ايقول لهم عذرا على
الماضي ام الحاضر ، ام عذرا اننا سبب في هذا ، عذرا اننا لانستطيع ان نخفف عنكم كما يفعل الاباء مع
ابنائهم ، ام عذرا على ماذا....

لما يجب على هؤلاء الاطفال الذهاب الى الزيارة وتحمل التفتيش ، وعناء الطريق ، ووهن الفراق ، كما
الكبار بل انهم يحملو ضعف الالم لانهم اطفالا لايعو شيئا جيدا ولانهم يتألمون لذلك الالم....
انهم لم يفارقو والدتهم فقط بل ان والدهم ايضا رهن التدابير الاحترازية بعد 3 سنوات حبس خارج اطار
القانون وأم رهن الاعتقال في قضية فقط للدفاع عنه...

وهؤلاء الاطفال قد حُبسو بين هذه الام وهذا الاب بلا ذنب منهم ولا ذنب لهم....
"الصورة لهمس وهيا " يوم "29 يونيو 2019" امام نيابه امن الدولة العليا وهم يقفون فقط لكي يلمحو
والدتهم " آية الله علاء حسني " من بعيد بعد اختفاء قسريا 12 يوما وقد تم حبسها 15 يوما
#الحرية_لاية_علاء

<http://bit.do/eXKYZ>

2 يوليو

عن محمد

محمد أخويا بقاله النهاردة أربع شهور و أربع أيام مختفي
قسرياً في أمن الدولة بدون أي قضية ولا أي تهمة..
مشوفنا هوش ولا سمعنا صوته ولا عرفنا عنه حاجة..
محمد بقاله خمس سنين ونص في السجن .. خلص فترة
حبسه ال هي خمس سنين و كان المفروض يخرج بس ظباط
أمن الدولة ليهم رأي تاني ..
محمد بيتم التنكيل بيه علشان هو أخو أحمد و بس .. و مش
فاهمة هم عاوزين إيه أكثر من ال عملوه .. سواء في أحمد أو
محمد ..
يعني لو شد ودان زي م بيقولوا فمش كفاية أكثر من أربع
شهور عندهم ؟
طلعوه و خلوه يسافر ويسيب البلد لو صعبان عليكم تسيبوه




يعيش فيها .. بس ليه كل دا وليه الجبروت والظلم دا ؟
بتناموا إزاي ؟ وبتعدوا وسط عيالكم بنفس راضية إزاي ؟ !
بتصوموا و بتصلوا ومتخيلين ان ربنا بيقبلها إزاي !
الله ينتقم من كل ال ظلم إخواني ولو بكلمة .. يارب ما تموتوا غير لما تتقهروا قهرتنا يارب

<http://bit.do/eYwE>

3 يوليو

عن هشام فؤاد

مش لاقية كلام اوصف بيه اللي حصل ولحظات الرعب اللي
مرينا بها من لحظة الهجوم الامنى على البيت بعد الفجر للقبض
على زوجي هشام فؤاد عبد الحليم ولا كأنهم جاين يقبضوا على
تاجر مخدرات، تصدق بايه لو تاجر مخدرات هتجيلوا الاخبارية
قبلها، امن وقوات خاصة وقناصة ملوا الشقة للقبض على واحد
كل تهمة انه انسان عنده مواقف ومبادئ وراى وضد الظلم
ودايم واقف مع المظلوم صاحب الحق، وتفتيش الشقة وتحريز
الكتب والروايات ما هم ملقوش حاجة تانية عشان تتحرز، حتى
ملازم وكتب سيف اتفتشت، مش قادرة انسى نظرة هشام
لفاطمة وسيف وهو خارج معاهم من غير ما يودعنا وتم منعنا
من الخروج من باب الشقة.



احنا صحيح فى ازمة وبندعى ربنا انها ماطولشى، بس دايمنا الازمات بتبين معادن الناس وحبهم والحمد لله ربنا رزقنا باصدقاء واقفين جنبنا كتف بكتف وجيران اكثر من الاهل خصوصا وهما تقريبا يعرفوا هشام من وهو طفل وكلهم فى ذهول من الاتهامات الخزعية الموجه اليه.

من نعم الدنيا على اى انسان ان ربنا يرزوقنا بولاد الاصول وانا شهدا فىك مجروحة يا هشام، الحمد لله ربنا رزقنى بزواج ابن اصول من عيلة تحترم المرأة وتقدر دورها وصديق وفى وزوج محب واب حنون، من ساعة ما عرفت هشام من ٢٥ سنة وهو زى ما هو صبور وهادى الطباع وصاحب فكر مرتب ومرتب ومتزن وجابر لخطر الاخرين ولو على حساب نفسه هتصدقوا لو قلت ان لو حد يعرفوا عنده مشكلة بيعتبرها مشكلته ويسعى لحلها بكل السبل، عمره ماحاول يحمل غيره مشاكله وهمومه، وبيتخرج انه يطلب خدمة شخصية ليه، واهم صفة انه شخصية متسامحة زيادة عن اللزوم.

احنا زينا زاي بقية الاسر المصرية من الطبقة التى كانت متوسطة والحمد لله بحكم السياسات الاقتصادية الرشيدة اتزحزحت لتحت تحت المتوسطة وبنحمد ربنا وبنسعى ونعافر عشان نفضل مستورين، خصوصا اذا كان رب الاسرة مفيش بينه وبين الفلوس اى ود، ودا بخصوص قرار التحفظ على الاموال الصادر للمرة الثانية، ورغم صدور قرار سابق منذ خمس سنوات وحصول هشام على حكم لصالحه ببطلان قرار التحفظ. هشام شخصية بسيطة لاقصى حد وغير متكلف وواضح وصريح واقل حاجة بتبسوطا حتى لو اكلة بيحبها انا عمرى ما طبخت اكل وقال انه موش عجبوا دايمنا بيخاطرى فيما عدا حلوى سد الحنك واللى عملتها بعد الحاح منه وبعد ما اكل منها شكرنى واعفانى من عملها مرة اخرى والصراحة كان عندوا حق، هشام ابن وحيد ليس له سوى اخت واحدة وكان بار بوالديه جدا عاش مع والدته محنة اصابتها بمرض السرطان ثم محنة اصابة والده بمرض الزهايمر التى استمرت لاكثر من سنتين اشهد الله انه لم يقصر فيها مع والده وكان يعامله كما يعامل الاب ابنه الرضيع، واخ حنون اى اخت تتمنى ان اخوها يكون زى هشام، وكمان بيحب الكلاب جدا ورغم انى كنت بخاف منهم جدا بس تحت ظغط والحاح سيف وهشام جنبنا جرو صغير وسمينه ويسكى وكبر واتجوز وخلف كمان وهشام بيعاملوا ويدلعوا زى الاطفال وهو كمان بيحب هشام جدا واتعود ان ميكولش غير وهشام قاعد جنبوا، وكنت كل ما اقولوا انت دلعتوا يرد ويقول دا غلبان كفاية انه محبوس وعندوا اكتاب عشان مبيخرجش علاطول، هشام فى اليوم اللى اتقبض عليه قالى انه لو اتقبض عليه بيطلب منى حاجتين الاولى انى مجريش وراه والثانية انى اخلى بالى على ويسكى، سامحنى يا اتش مش هاقدر مجريش وراك وانت عارف ليه اما ويسكى متخافش عليه بيتعامل زاي ما كنت بتعاملوا بس هو حزين لبعادك ان شاء الله ترجع لبيتك وحبيبك وصحابك وربنا يزيع الغمة

<http://bit.do/eYwwh>

عن مصطفى النجار

على مدار التسعة اشهر الماضية وقلما ينقطع بكائي ولكنى لا اعرف لماذا ابكى هل ابكى على اولاد اخى وانا اراهم يكبرون وتمر عليهم الاعياد والمناسبات بدون أبيهم تجرعت مرارة هذا الشعور عندما توفى ابى وانا طفلة صغيرة وفقدت معه الشعور بالأمان ووجود السند.

هل ابكى على زوجة اخى تلك الزوجة المدللة التى لم تعتاد على تحمل المسؤولية بمفردها اصبحت بين عشية وضحاها تواجه تلك الحياة الكئيبة وحدها ومسئولة عن تربية وتعليم ثلاثة اطفال بالإضافة للبحث عن زوجها المختفى. ام ابكى



على أمى التى ازداد المرض عليها اضعافا وأرى دموعها لا تتوقف ام ابكى على نفسى التى تتظاهر بالثبات وانا بداخلى بركان يغلى فى الحقيقة انا ابكى على روحى الغائب ابكى شوقى اليه ابكى قلقا عليه ابكى كلما اكلت او شربت لانى لا اعرف هل هو جائع خائف هل مريض.... هل هو حى تعبت من البكاء اكره العجز والعن الظلم والظالمين كل دقيقة. يارب ازح الغمة فارواحنا الضعيفة لا تتحمل اكثر من ذلك

280 يوم إخفاء

#مصطفى_النجار_فين

<http://bit.do/eYSjG>

عن شادي أبو زيد

الاسبوع اللي فات زورت شادي لوحدي عشان ماما عملت حادثة ورجلها عليها جبيرة، اضطريت اقول لشادي الحقيقة عشان وعدته مش هكذب عليه في حاجة بعد وفاة بابا لما كنت بكذب عليه واقوله ان بابا صحته حلوه، شادي مش كويس خالص خصوصا لما مشافشي ماما وعرف انها عملت حادثة، معرفشي كان حاسس ببايه لما مشيت والقلق اللي هو فيه لحد الزيارة الجاية عشان اطمنه على ماما، شادي مكتئب من فترة وعنده ميول انتحارية واللي كان ببصبره زيارتي انا وماما، شعوره بالعجز انه مش عارف يبقي معانا او يسمع صوتها حتى عشان يطمئن، ده لما حد بيكون مسافر ويعرف ان مامته جالها برد بيكلمها كل شوية واحتمال يجي من سفره، مش متخيلة شعور حد عاجز انه يشوف مامته او يسمع صوتها وعارف انها تعبانة، اليوم ده رجعت عندي ضربة شمس وهبوط واليوم كله بحاول أتعافى، انا دلوقتي لو تعبت مفيش حد هيقعد بينا انا وماما، ومفيش غيرنا اللي مسموحلهم بزيارة شادي، احنا ملناش غير



بعض احنا التلاتة، خرجولنا شادي بقى

اكتر من سنة وشهرين على حبس #شادي_ابو_زيد <http://bit.do/eYSsF>

عن جهاد الحداد

أصيب ابني المهندس #جهاد_الحداد بتسمم غذائي الاربعاء الماضي من طعام السجن و أغمى عليه يوم الخميس في سيارة الترحيلات اثناء نقله لجلسة محاكمته من شدة الإعياء و الضعف . و حاولت بكل الطرق أثناء الجلسة أن اوصل له شريط مطهر معوى و مضاد للتقلصات كان معى و لكن باءت كل محاولاتى بالفشل بعد رفض القاضى الإستماع لاي طلبات علاج للمعتقلين و رفض الأمن توصيل الدواء له!!
كان بينى و بينه امطار قليلة فى الجلسة و انا اراه فى حالة إعياء و ألم .. و بيدى حبات الدواء !! و حسبنا الله و نعم الوكيل
<http://bit.do/eYStm> !!



7 يوليو

عن عمار السواح

"عمار السواح" اعتقل وهو عنده 16 سنة والشهر الجاي هيبقى عنده 20 سنة وهو لسى جوه...
عمار اتخلى سبيله 6 مرات وكل مرة يخدوه يخفوه ، والنهارده وبعد 45 يوم من اخلاء سبيله للمره السادسة وكان مختفي قسريا ظهر على على ذمه محضر سابع بنفس التهمه اللي اتخلى سبيله عليها بس بتاريخ النهارده والتهمه هي "الانضمام...."
عمار هيكمل 20 سنة ولسى مامتحنش ثانويه عامه ، احتفل بعيد ميلاده جوه السجن 3 مرات ، قضي 7 أعياد جوه السجن ، لبس الابيض ولبس الكحلي ، اترحل مابين 8 اقسام و سجون مختلفه ...عمار جاله فيروس A ، و خراج بالفم و اسنانه تعبته، لا اهله



قادرين يطمنو عليه ولا يقدموله علاج كافي...
3سنين كاملين مابيشوفش الشمس ، ولا بيتعرض ليها ، 3سنين بدون قضيه حقيقه ، يخرج من واحده يدخل ف الثانية...
عمار اخوه صهيب معتقل بقاله 5 سنين واخذ حكم 10 سنين عسكريا ، اخوه عبدالله لسى معتقل من أسبوع
#الحرية_للأطفال

<http://bit.do/eYT38>

عن هشام فؤاد


لم أراها لكني أعرفها جيدا يا هشام.. تلك النظرة الأخيرة التي
رمقت بها فاطمة وسيف قبل أن يقتادك الأشاوس في جوف
الليل إلى سجن يوسف.. هل كنت تريد الاعتذار لهما لأنك
انجبتهما في وطن قاسي القلب بلا ضمير وبلا مستقبل.. المؤكد
انك كنت تعلم منذ أن اخترت طريقك أن انحياراتك سوف تفودك
إلى مآلات جيفارا ولوركا وشهدي عطية ومروان البرغوثي
وكل الرجال الذين واجهوا الاستبداد وهم واقفين على قدمين
ثابتتين. هشام يشبه القديسين وزرقاء اليمامة.. مثل فراشة
ملونة في صحراء قاحلة.. هو ابن جيل يأتي متأخرا وينكسر
مبكرا.. لكنه ليس مثلنا بقي صامدا عصي على الانحناء
والتنازل والسكون والخوف.. لم تشغله كل مباحج الحياة (رفض
السفر للعمل في الخارج مرتين).. يسكن في شقة صغيرة
بالايجار.. ليس لديه سيارة ولا حساب في البنك.. ولولا صمود
زوجته الباسلة مديحة ما كان يستطيع مواجهة أعباء الحياة اليومية. انا مدين باعتذار لوالدته الراحلة لأنني
لم اتمكن من تنفيذ وصيتها بابعاده عن طريق والده واعمامه.. قالت لي في مرضها الأخير: لا يمكن أن
احتمل أن ارى ابني الوحيد سجيناً مطارداً كما أسرته كلها. متى تعود يا أنبل واعز الناس لتعطر بيتك بدفء
أنفاسك.. أنا وفاطمة وسيف ومديحة ودينا وكل احبتك في انتظارك. <http://bit.do/eYUag>



8 يوليو

عن خيرت الشاطر

مريم خيرت الشاطر تكتب: بقالي كتير بحاول أهرب من الواقع
أهرب من التفكير في حال أبي الذي أتم ست سنوات حبس
إنفرادي في زنزانة لا يدخل لها الشمس. ست سنوات محروم
من كل حقوقه وأبسطها. فلا يسمح له بزيارتنا ومعرفة أخبارنا
ولا نستطيع الإطمئنان عليه. ست سنوات فقد أبي فيها أكثر من
٤٠ كيلو من وزنه لأنهم أغلب الوقت يمنعون عنه طعام
الكافتيريا ويقدم له أسوء الأطعمة وأغلبها فاسد. ست سنوات
زادت الآلام أبي والأمراض وعدم عرضه علي الطبيب المختص
أبي أصبح لا يري بعينه اليمني لوجود الميه البيضاء عليها
ورفض وتعت إدارة السجن من عمل العملية له. أبي أصبح
يقوم ويجلس بصعوبة لوجود ورم بركبته ولا يعرف علاج لها.
غير ضعف عضلة القلب عن أداءها. غير السكر والضغط. غير
تعب الكلية. والكثير الذي نجهله نحن أسرته عنه. اللهم كن لأبي وإخوانه. اللهم فرجا ومخرجا من عندك.
يارب أنت أرحم بأبي منا. اللهم خفف عنه وهون عليه وأنزل عليه رحمتك. وفرج عنه وردة إلينا



<http://bit.do/eZqfy>

عن خالد بسبوني

٤ خطوات ٤ خطوات بس الاوضه اللي قاعد فيها طولها أربع خطوات
بس.. انا عايزه اعرف أخويا قاعد ليه في القسم!! لو عليه قضية ودوه
السجن لو خلص مدته "وهو ده اللي المفروض حصل " مشوه روحه!!!.
٧ شهور في اوضه طولها ٤ خطوات بس مفيش شمس مش ببشوف نور
ربنا ليه!!!!
حد يقولي ليه بجد ليه!!!
فرق الصورتين واضح كبر الطفل وبقي رجل من غير ما يستمتع باي لحظه
طفولة..
كبر وهو بعيد عننا..



كبر وهو لوحد..
من ١٥ سنة ل ٢١ سنة. ٥ سنين و ٧ شهور كل شهر وراء الثاني اقول
الشهر الجاي هيخرج الشهر الجاي هيخرج ومش بيخرج.. ياارب ثبتوا و
ثبتنا ياارب قويه و قوينا الامتحان بقي صعب اووووووي اووووي.. يااa

<http://bit.do/eZqos>

عن هشام فؤاد

قبلات بلا عدد لرأس زميلي هشام الحليق "زيرو"
يا زملاء يا صحفيين..

هذه حصيلة متابعات واتصالات مع من زاروا اليوم 9 يوليو 2019 معتقلي زوار فجر 25 يونيو الماضي
فيما يعرف بـ " قضية الأمل "، وبخاصة زميلنا الأستاذان هشام فؤاد وحسام مؤنس:
- اتضح ان نظر تجديد الحبس جرى أمس 8 يوليو 2019 لهما وآخرين في الاتهامات العبثية المجنونة
والخمسة عشر يوما أخرى من دون حضور المحامين أو علمهم وكذا بدون علم نقابة الصحفيين.
- الزميلان مع الأستاذ زياد العليمي ظلوا محبوسين خمسة عشر يوما الأولى بسجن ليمان طرة من دون
ان يسمح لهم مطلقا الخروج للتريض والتعرض لضوء الشمس والهواء. كانوا معزولين عن العالم تماما.
وهذا هو أول اتصال بينهم وبين الحياة خارج الزنزانة .
- الحبس للثلاثة في زنزانة ضيقة جدا فذرة تمرح فيها الحشرات وسينة التهوية والنوم على ارفف خشب
بلا أي حواشي.

- ظهر زميلنا الأستاذ هشام وقد حلقوا شعر رأسه تماما بدرجة زيرو .
- الثلاثة فقدوا الوزن على نحو واضح. لكنهم كما عرفناهم حافظوا على معنويات عالية.

يا زملاء يا صحفيين

منذ اليوم الأول للاعتقال إثر اقتحام المنازل وترويع العائلات فجرا طالبت وعدد من الزملاء والزميلة
الاستاذة مديحة حسين زوجة زميلنا الأستاذ هشام كتابة وشفاهة بـ"أضعف الإيمان" بمقتضى القوانين
وتقاليد نقابتنا وحقوقها ازاء السلطات وحقوق اعضائها عليها وعلى مدى عقود: زيارة عاجلة للنقيب

ولاعضاء المجلس للزميلين في محبسيهما.. طلب الافراج عنهما بضمان نقابة الصحفيين وبخاصة ان الاتهامات تتعلق بالنشر والرأي.. حضور النقيب وعدد من اعضاء المجلس لمثول الزميلين أمام نيابة أمن الدولة والتحقيقات.. ناهيك عن الاسراع بادخال الاعاشة (من ملابس وغيرها) لهما في محبسيهما والتيقن من وصولها اليهما.

وبعد ما علمنا اليوم يحق لأعضاء الجمعية العمومية للصحفيين المطالبة بنشر المخاطبات التي توجه بها المجلس الى السلطات المعنية بشأن مطالب " أضعف الإيمان " تلك ومعها بيان للرأي العام بمصير هذه المخاطبات وبما تعرض له الزميلان من ظروف تجديد الحبس والاحتجاز على هذا النحو والمطالبة بالتحقيق فيما جرى لهما.

يا زملاااااا

يولمني وأنتم ما يمر به زميلانا هشام وحسام على هذا النحو المنتهك والممزق للقوانين واللوائح والحقوق حتى بالنسبة لمحكومين بجرائم جنائية وليسوا في حال حبس احتياطي في اتهامات سياسية وتعلق بالنشر عبثية مجنونة. كما يولمني وأنتم وما انتهت اليه مطالبانا بشأن الزميلين إذ لا نجد لها اثرا او مفعولا.. ومع تقدير لما بذله عدد من اعضاء المجلس من جهد فاننا لانجد بيانا يتحدث عن شئ.. ولو اي شئ. وهذا مع انني اعلم وأنتم قسوة وحجم الانتهاكات حد القتل المتعمد والتعذيب الوحشي والاختفاء القسري لآلاف المصريين في المعتقلات والسجون والمحابس هذه السنوات. كما أعلم وأنتم أن العديد من زملائنا الصحفيين الآخرين تعرضوا لما هو أسوأ مما يمر به الزميلين هشام وحسام . وحقيقة ليس عندي فضل وهم عن نيات أو قدرات رئيس هيئة الاستعلامات المكلفة بتلميع وتجميل صورة الدكتاتورية الفاشية وممارساتها امام الخارج والداخل وبالتغطية على فيض بالغ التنوع من الجرائم ضد الانسان والانسانية وكل ما يعانيه المصريون. ومن البداية عند فتح باب الترشح لانتخابات النقابة مارس 2019 نبهت وغيري الى تضارب في المصالح والمواقع والخطاب بين مناصبي رئيس هيئة الاستعلامات الحكومي ونقيب الصحفيين المصريين. تضارب وتناقض لا يمكن حله او تجاوزه كما تكشف هذه الأيام. وقلنا من قبل وتقدمنا امام الجمعية العمومية بمشروع قرار ونقولها اليوم وغدا: ليته يختار بين أحد الموقعين ويستقبل من أحدهما رافعا عن نفسه الحرج وعنا أن نكون رهانن لهكذا تناقض لا يمكن حله أو تجاوزه. فقط لنسأل وبالمنطق وبهدوء ودون رغبة في اساءة أو اهانة لا قدر الله: هل يعمل الرئيس والنظام واجهزة أمنه - هؤلاء الذين اعتقلوا زميلينا وغيرهم في الفجر وزجوا بهم في اتهامات مجنونة عبثية والى محابس خارج القانون وتنتهك الأدمية - عند السيذ رئيس الهيئة العامة للاستعلامات الذي يتولي حاليا منصب النقيب في سابقة لم يعرفها تاريخ نقابتنا؟ أم ان سيادته (بوصفة موظف ولنقل كبيرا في هذه السلطة) هو الذي يعمل عندهم وفي خدمة ما يفعلون بشعب مصر وصحفييه؟ والى من سعوا الى اسكات الجمعية العمومية والزامها الصمت المدهش المريب وعملوا على حبس اي مبادرة لها بالتخويف وبالأوهام: هل تفضلتم ورأيتم "كرامة" اتصالات نقيب الهيئة العامة للاستعلامات - تلك "العليا السرية" - على جسدي ورأسي زميلينا؟ وعلى معاملتهما طوال 15 يوما؟ هل حقا له "كرامة" عند من وضعوه في منصب رئيس هيئة الاستعلامات؟

ولو كان تفضلوا وأطلعونا عليها.. لعلنا لا نرى ما ترون. ولعلنا نتعامي معكم عن السؤال: من يعمل عند من؟ ومغذرة. وعلى اي حال ليس لنا كصحفيين إلا أن نلوذ بالجمهور بالحقيقة والا نستمر في قتلها ودفنها حية.. وكذا علينا ان نتمسك بالعمل على اعادة الروح إلى جمعيتنا العمومية والدفء لجدران نقابتنا.

<http://bit.do/eZqpo>

عن زياد العلمي

خرجنا حالا من زيارة زياد في سجن طرة.. زياد روحه المعنوية مرتفعة للغاية وبيبلغكم جميعا سلامه، وبلغته سلام الجميع.. قابلت كمان هشام فؤاد بالصدفة عشان دخلوه قبل ما نخرج.. هشام صلب وقوي كالعادة وابتسامته منورة وشه كالعادة!

زياد وهشام وحسام محبوسين مع بعض في زنزانة واحدة. لكن ظروف الحبس سيئة.. الزنزانة مساحتها ١٧٥ سم في ٢٧٥ وفتحة تهوية صغيرة في اعلى الزنزانة ابعادها ٢٠ في ٢٠ في عمق ٤٠ والتلاتة بيناموا على ثلاث أرفف خشب مثبتة في حديد، من غير مراتب ولا مخدات، دخلنا ملايتين وكوفرتة لزياد رجعوا الملاية وكوفرتة وخذوا ملاية بس.. رجعوا كمان عيش توست ناشف وجرجير ونعناع اخضر!!، حجم تعسف غير طبيعي لدرجة انهم رجعوا الرز من زيارة هشام.. كْنَا واخدين ما نجايتين



بالعدد وكبشتين كريس رجعوهم..

زياد أصيب بازمة تنفس من يومين، جاله دكتور السجن فقال له انه مصاب بمرض مناعة نادر في الصدر اسمه ساركويدوزيس وممكن مع ظروف سوء التهوية يقلب بكانسر، فالدكتور قال له انا عارف ان الساركودوزيس ممكن يقلب بكانسر، بس انا مش حاقدرا اعمل حاجة عشان انا دكتور قلب!!!!

زياد عمل محضر بالكلام ده

زياد وهشام وحسام بقالهم ١٤ يوم ماخرجوش غير النهارده، وماخدوش ولا ساعة تريض

<http://bit.do/eZqxm>

عن زياد وحسام وهشام

طيب عشان امبارح كنت راجعة من يوم طويل ماعرفتش انقل لكم حاجات مهمة:
١- حراس الأمل وعشاقه محبوسين من ١٤ يوم ما شافوش الشمس غير امبارح لما خرجوا زيارة! في مكان سيء التهوية وفيه حشرات (رفضوا يدخلوا المبيدات الآمنة اللي جنبناها ما بتعملش ريحة عشان صدر زياد)



٢- حالقين لهم شعرهم زيرو، قال يعني من باب التكدير، لكن ما سمحوش لهم بماكينات حلاقة الدقن البلاستيك، فمألقوش دقونهم من ١٤ يوم (زياد دقنه كثيفة فكان شكله ملتحي، يدي على متطرف كده)

٣- زي ماقلت بيناموا على أرفف خشب متعلقة عالحيط من غير مخدة ولا مرتبة

٤- الناس اللي بيقتشوا كلوا نص الاكل وهمه بيقتشوا بمنتهى الطفاسة، ومع اننا كْنَا بنراضيهم، رفضوا اطعمة من غير أي مبرر

<http://bit.do/eZqqU>

9 يوليو

قهر البنات
"عاويزة أشوف أختي" .. بصوت يملؤه القهر، الأهالي يستغيثون لرؤية بناتهن المعتقلات أثناء جلسة المحاكمة

<https://bit.ly/2G6Eo0T>

10 يوليو

عن سميه ماهر



انا فضلت سنه و 9 شهور اجري ورا عربيات وانا بصوت عالي عشان تسمعي وهي بتتكلم اسمع صوتها بس ، لحد ماشفتها الجلسة اللي فاتت ولمست ايديها من ورا حديد ، مقلتش ولا كلمة لاني مكنتش مصدقه ان اخيرا لمست ايد بنتي بعد سنه و 9 شهور ، انا لما شفت منظر سميه "كجسمانيا ونفسيا رجعت حزينه حزينه اوي " كان بيوصف كل حاجه من غير ماتتكلم ، مش سميه بس ده ف واحد ف قضيه سميه اسمها رشا ام ل 3 اطفال اول مرة كانت تشوف عيالها من سنه و 9 شهور كانت في الجلسة ده ، سميه تعبانة اوي وهي كانت تعبانة من بره كنت حاجزها عند دكتور المعده بس اتاخذت

قبل ماتروح و 3 مرات بسبب مشكله في ضربات القلب وضيق التنفس خدتها ورحت المستشفى!
انا نفسي اقول حاجه هي كده كده محبوسه عندكم ، ايه المشكله انها تشوفني واشوفها وتشوف اخواتها ايه اللي هيحصل لما تزورها ، انا مش عايزه حاجه عايزه 5 دقائق بس نفسي كام اشوف بنتي واحضنها اكيد هيفرق معاها ومعانا ، تخيل لما كل البنات يلبسو ويطلعو زيارة وهي لا احساسها عامل ازاي ، وانا كل مرة بعمل اللي عليا واخذ الزيارة واروح ويدخلو بطايق الناس ويبجو ينادو عليا ويقولولي انتي لا احساسني انا كام هيبقى عامل ازاي وانا بشوف كل الناس داخلين وانا راجعه !

سميه تم القبض عليها يوم 17 اكتوبر 2017 من منزلها بدمنهور و اتهمتها النيابة بالانضمام لجماعه اسست على خلاف القانون وارتكاب سلوك من شأنه الاضرار بالامن القومي للبلاد في القضية رقم 955 ، تم منع المحامين من التواصل معها مده 67 يوما ، تم احتجازها في مقر المخابرات وهو غير قانوني وبغرفه انفراديه بها كاميرا ، ممنوعه من الزيارة والتواصل مع ذويها منذ القبض عليها ، تم ترحيلها مؤخرا لسجن القناطر...

سميه حالتها الصحية والنفسيه بتتدهور! #زيارة_سميه_حقها

<https://bit.ly/2NRvqL7>

عن سجن برج العرب

تدين رابطة أسر المعتقلين بسجون الإسكندرية ما يجري من انتهاكات جسيمة بحق المعتقلين بسجن برج العرب بالإسكندرية حيث تتواصل الانتهاكات الجسيمة بحق المعتقلين و التي تهدد حياة أبنائنا وتعرض حياتهم للخطر وتنال من كرامتهم وإنسانيتهم في انتقام واضح وانتهاك صارخ فمنذ مقتل الدكتور محمد مرسي وبدأ الوضع في التصييق الشديد علي المعتقلين من إغلاق الزنازين و منع الزيارة و التريض لمدة ٥ ايام ثم فُتحت الزيارة يوم يوم الاحد لبعض المعتقلين و منع الزيارة عن البعض الآخر بأمر أمن الدولة لأجل غير مسمى

يتم تقسيم الكشوفات علي مجموعات لتصبح مدة الزيارة حتي الآن ١٥ دقيقة فقط يتخللها مضايقات متعددة من أفراد أمن السجن و وقوف بيننا نحن الأسر وابنائنا لمنعهم من الكلام معنا ، فضلا عن منع دخول الأدوية و مستلزمات النظافة و المعلبات و اقتصار دخول الطعام علي وجبة واحدة فقط من الأكل وتقليص وقت التريض لثلث المدة ومنع دخول أي دواء حتي أدوية الأمراض المزمنة والحمي ، كما تعرض بعض الطلبة بعد انتهاء امتحاناتهم لتجريد و حرق كتبهم الدراسية

هذه الاجراءت التعسفية مع أبنائنا ليست وحدها و انما شملت أيضا سوء المعاملة في التفتيش الذاتي للأهالي و التحرش اللفظي و المادي بالأسر أثناء التفتيش ، و رفض إدارة السجن استلام الجوابات التي تسلم في الامانات للإطمئنان علي المعتقلين و منع زيارات اذونات النيابة و زيارة الاستثنائي وتناشد رابطة الأسر الجهات المختصة للتدخل الفوري لوقف هذه الانتهاكات مطالبة منظمات المجتمع المدني المحلية والدولية بالحيلولة ضد تصفية المعتقلين وقتلهم بالبطيني بهذا الشكل و السماح بحصولهم علي حقوقهم المنصوص عليها قانونا و تحمل سلطات الداخلية و وزير الداخلية ومدير مصلحة السجون و رئيس مباحث سجن برج العرب المسؤولية الكاملة على سلامة أبنائنا..

#انقذوا_معتقلي_برج_العرب

<https://bit.ly/2LZlugj>

عن الباحث إبراهيم عز الدين بعد مرور شهر على اختفائه قسريا

"ارجع لأمك يا إبراهيم ، سمعوا رسالتي دي للدنيا كلها، انا مؤمنة وعارفة أن ربنا هيرد ابراهيم بالف سلامة. عارفة إنه سامعني وحاسس بالنار اللي في قلبي من يوم ما أخدوه من حضني.. ربنا عدل، اعدلوا و متظلموش الغلابة" بهذه الكلمات بدأت والدة الباحث بالمفوضية المصرية للحقوق والحريات إبراهيم عز الدين، رسالتها لابنها في اليوم الـ30 على اختفائه قسريا.



اكملت والدة ابراهيم رسالتها: "إبراهيم ابني الصغير تركه والده يتيمًا من الاعدادية طول عمره متفوق وهو اللي بيراعيني، وبيجي يقضي معايا كل الاجازات مفيش مرة اتاخر عني، كان بيفضل قاعد معايا ويدوبك يخرج يقعد على القهوة ساعتين ويرجع يشوفني عاوزة أيه، عمره ما كان مع الإخوان ولا بيحبهم، كان دايمًا بيقولني ضيعونا."

تستكمل والدة ابراهيم حديثها: "أنا مش بنام، قاعدة طول الليل والنهار أمام المنزل منتظرة أن ابراهيم يدخل عليا، عارفة أنه مظلوم ومعملش حاجة، وأن ربنا عدل وأن اللي خدوه هيتأكدوا إنه معملش حاجة فهيسبوه بس اتاخروا أوي."

تشير إلى أن ابراهيم كان في منزل الأسرة قبل القبض عليه بليلة واحدة وذهب ليأتي بشقيقته من المطار وطلبنا منه أن يبيت الليلة معنا، فرفض وقال أنه متاخر على الدكتور المشرف على رسالته وأنه تأخر كثيرا على الرسالة بسبب انشغاله بمرضى لانه هو اللي بيراعيني.

ياريتني كنت قفلت عليه الباب ومنعته ينزل، ياريتني كنت أعرف كنت بوست رجله يقعد معايا، البلد كلها والناس والجيران بيحسوا بمرضى ابراهيم ظهر ولا لسه، بقولهم هيطهر وهيخرج أنا وهما متأكدين أن ابراهيم معملش حاجة وحشة كل الناس بتحبه، محدش عمره كره ابراهيم على طول بيضحك وقلبه ابيض ميستحملش ضرر لاي حد عشان كده اهل البلد كلهم بيحبوه.

عاوزه اقول للي اخدوا ابراهيم انه يتيم وانا مليش غيره، أرجوكم خرجوه، اسمعوا أم اتاخذ ابنها من حضنها ومش عارفة تعيش من غيره، أنا حتى مش عارفة عايش ولا لا، بياكل ولا مبياكلش تعبنا ولا سليم، كل ما التليفون يرن أقول هو، قلبي وجعني وانا مستنياه، طول اوي، انا قولت ساعة ويخرج ، مر شهر بموت فيه كل دقيقة، توجه والدة ابراهيم رسالتها للمسئولين في الدولة ابني بريء معملش حاجة اعتبروه ابنكم، حسوا بيا، وحسوا بالنار اللي جوايا والتي بتحرق قلبي كل دقيقة، ادوني ابني واحكموا بالعدل ، مش عاوزين غيره، ربنا عدل اتعلموا منه .

#ابراهيم_عز_الدين

#المفوضية_المصرية_للحقوق_والحريات

<https://bit.ly/2Sjzd2A>

عن سجن ملحق المزرعة – مجمع سجون طره

الزيارة ممنوعه من سنتين الى ثلاث سنوات..والكائنين مغلق بشكل مستمر لاكثر من عام ونصف.. وهو مالم يحدث في اي سجن آخر على الاطلاق!!...تتم سرقة الادوية ولا يسمح بادخال أي شئ من البوابة الخارجية....لا توجد رعاية صحية ولا نستطيع معرفه اخبارهم او الاطمئنان عليهم..سجن كامل محتجز به تسعه افراد فقط!!..

<https://bit.ly/2XI526c>



14 يوليو

عن عائشة خيرات الشاطر

ابنتي عائشة. يارب
لا اعلم عنها شئ وحشتني قلقة عليها
والدة الأستاذة " عائشة الشاطر " تندد بالوضع السيئ الذي
تعيشه ابنتها في سجون الانقلاب!!
<http://bit.do/eZX9K>



15 يوليو

ابنة علا القرضاوي تضرب عن الطعام تضامنا مع والدتها:

-اول يوم بتاريخ "8 يوليو" قالت انا بعن اضرابي
عن الطعام تضامنا مع امي وطبعا اضرابي ميجيش
حاجه جنب اضراب ماما ، انا عندي سرير والجو حلو
ولو تعبت اروح للدكتور ، لكن ماما صحتها تعبانه
ومتستحملش ووزنها نزل النص ، نايمه عالارض ، لو
تعبت مفيش دكتور هيشوفها ولا حد هيبقى جنبها انا
قلقانه على صحه ماما ومش عارفه هنتحمل ولا لا
-تاني يوم اضراب قالت : انا اليوم التاني للاضراب انا



اكتشفت ان ف حاجات تانيه صعبه مش بس الجوع والتعب كنت بحاول متحركش فكننت قاعده ف مكان
واحد عشان احوش الطاقه بتاعتي شويه فعلى نص اليوم لقيت نفسي زهقانه جدا ومش لاقيه حاجه اعملها
فساعتها فكرت ف امي ولقيت طيب انا مضربه عن الطعام وقاعده ف مكاني عالكنبه بس عندي تليفزيون
وكتاب ممكن اقراه وورق ممكن اكتب فيه واهل ممكن اتكلم معاهم وعندي حاجات اضيع بيها الوقت طيب
امي بقالها سنتين في حبس انفرادي في زنزانه صغيره مفيش اي حاجه تسلي بيها وقتها حتى ممنوع تتكلم
او تشوف مساجين تانيين ، تضيع احساس الجوع والتعب ، فانا مش بتكلم عن ايام بتكلم عن سنتين ، انا
بفكر هي استحملت كل ده ازاي ، انا قعدت يوم لا نص يوم كان احساس صعب والواحد حاسس ان اليوم
مبيعديش ، اكيد الوضع صعب اصلا في الظروف اللي هي فيها لما تقرر تعمل اضراب اكيد وصلت لمرحله
ان اي حاجه هتكون اهون من اللي هي فيها ...

-اليوم الثالث لاضراب ايه : قالت إرهاق وتعب لم يمكنني من تصوير فيديو وأنا بنت الثلاثين فما بالك يا
أمي وقد اقتربت من الستين وأنت بالحبس الإنفرادي منذ عامين ...

١. علا مضره من يوم "4 يوليو 2019" يعني بنتكلم في 11 يوم وهي عندها 58 سنه وصحيا تعبانه ومش مسموحها بزيارة اهله يتظمنو عليها فيها فبالتالي حياتها في خطر ، ده بالاضافه لظروف احتجازها الغير ادميه فهي تم حبسها في زنانه انفرادية 1.6 x 1.8 متر من غير تهويه ولا اضاءة طول اليوم ، بيتسملها تخرج بس اول 5 دقائق ف اليوم عشان تدخل الحمام الخارجي وبالتالي كانت بتقتل اكلها عشان متضطرش تحتاج لدخول الحمام وبالتالي فقدت الكثير من وزنها ده غير ان كمان التغذية ردينة زي ما ذكرت هي ف احدي جلساتها

* هتكلم هنا عن بعض التفاصيل من اول اعتقالها للان وتأكدو ان ماخفي كان اعظم...

-علا يوسف القرضاوي تم اعتقالها يوم 30 يونيو 2017 وهي بتصيف مع زوجها بالساحل الشمالي اخوهم ل مقر الأمن الوطني بالإسكندرية ومنه إلى مقر نيابة أمن الدولة العليا بالتجمع الخامس وتم اتهامهم في القضية رقم 316 لسنة 2017 ، تم ترحيلها لسجن القناطر وزوجها للعقرب ومن يومها وهم محبوسين..

-يوم 18 سبتمبر 2018 علا كانت اول مرة تشوف حد من اهله الكل تقريبا كان بيبيكي وده كان لمدته دقائق وعن قرب وكمان علا قالت للقاضي : "أنا لا أعلم سبب احتجائي وحبسي الانفرادي، لا علاقة لي بالقضية التي زجوا باسمي فيها، إنني أعاني يومياً في زنانه غير آدمية، لماذا كل هذا! إنني أريد الحرية، أريد رؤية أولادي وأحفادي، لا أريد إلا العدالة والإفراج عني وزوجي"

-يوم 30 اكتوبر 2018 المحاميين قالو عنها انهم شافو انسانه تانيه فقدت نص وزنها مبقتش قادرة تتحمل الوضع اللي هي فيه....

-يوم 3 يوليو 2019 تم إخلاء سبيلها و تاني يوم "4 يوليو 2019 " اتفاجئ المحاميين بان علا في نيابة أمن الدولة وبيحققو معاها بتهمه "استغلال علاقاتها في السجن لتمويل ودعم الإرهاب " وتم حبسها لأول مرة 15 يوم على ذمه التحقيق....

-النهارده "15 يوليو 2019" تم تجديد حبسها 15 يوم على ذمه القضية الثانيه...

*بعض الكلام الذي كُتب عنها من احبتها :

-شيرين "معتقله سابقه " حكته عنها : كنا في مره راجعين من جلسه وبصينا من شبك العربيه فضلت تعيط وتقولي وحشني الشارع اوي وولادي وبابا واخواتي وأحفادي وحشوني جدا وفضلت تبكي وتقولي عارفه يعني ايه مفيش مره طول الوقت ده اشوفهم أو اسمع صوتهم....

-كلام د.يوسف والدها عنها ("لا تغيب صورتك يا ابنتي عن مخيلتي، ولا ذكرك عن بالي، وأسأل الله في دعواتي وصلواتي وخلواتي أن ينجيك من القوم الظالمين، وإن كنت ككل أب تتحرك مشاعره ويعتصره الألم فيحترق قلبه وتفيض عيناه كلما ذكر هول ما تعانیه ابنته ظلما وعدوانا)

-كلام زوجها المعتقل هو ايضا عنها ("علا، حب حياتي، تعاني في حبسها الانفرادي، إنني أخشى على

حياتها. هذا أسوأ تعذيب يمكن أن أخضع له، وهو أسوأ بكثير من التعذيب الجسدي)

-كلام آية بنتها عنها ("يفطر قلبي وأنا أرى أمي تعاني هذه الظروف المروعة في الحبس الانفرادي، لم

تكن مجرد أم، بل صديقتي المفضلة")

-ختاما : اسرة علا تخشى كثيرا على حياتها وتطالب باطلاق سراحها هي وزوجها....

#متضامنة_مع_علا_القرضاوي

<https://bit.ly/2YdTb4g>

عن سامحي مصطفى

سامحي مصطفى " الذي قضى في السجن نحو 5 سنوات في القضية المعروفة إعلاميا بـ"غرفة عمليات رابعة" كل يوم يخرج سامحي من منزله في محافظة الجيزة ب مدينة ٦ أكتوبر، ويقطع مسافة كبيرة لمدينة بني سويف مركز الواسطة ، ليقتضي 12 ساعة داخل قسم شرطة الواسطة بمحافظة بني سويف من السادسة مساء حتى السادسة صباحا، كجزء من عقوبة المراقبة المفروضة عليه بعد خروجه من المعتقل ويطلب الان بنقله قرب محل سكنه في مدينة السادس من أكتوبر.

ملحوظة: القانون يسمح للمراقبين اختيار اماكن تنفيذ حكم المراقبة في حين ان وزارة الداخلية تتكاسل عن تأدية دورها في تنفيذ حكم المراقبة بالمنزل . ف أضعف درجات الأنسانية السماح للمراقب اختيار قسم الشرطة القريب من منزله. اسمحو لسامحي



باستكمال حياته ونقله قسم شرطة ٦ أكتوبر

<http://bit.do/eZ9eU>

عن زياد العلمي

راجعة من زيارة زياد.. اخيرا سمحوا لهم من ثلاث ايام بساعة تريض برة الزنزانة.. ودخلوا لهم مراتب يناموا بيها على الأرفف الخشبية.. زياد معنوياته عالية وبيسلم على الجميع.. وبيشكركم جميعا.. لكنه مازال يحتاج للعرض على طبيب جهاز تنفسي وطبيب عظام، لان ركبته اللي كان عامل فيها عملية ازالة غضروف من كام سنة طرقت وبتولمه.. مافيش كرسي يقعدوا عليه في الزنزانة

#الحرمان_من_العلاج_جريمة

<http://bit.do/eZ9gG>

عن امين الصيرفي

النهارده كانت آخر جلسة في #قضية_التخابر_مع_حماس وتم حجزها للحكم يوم ٢٨ اغسطس ٢٠١٩ عارفين يعني إيه آخر جلسه؟ يعني انقطعت اخبار أهالينا في #مقبرة_العقرب_نهائيا ، لأن الجلسات دي كانت السبيل الوحيد في الاطمئنان عليهم بعد منعنا من الزياره من ٣ سنوات متنسوش معتقلي العقرب واتكلموا وانشروا عنهم واجعلوا لهم نصيب دائم من دعانكم

#الحرية_لأمين_الصيرفي_#الحرية_لمعتقلي_العقرب <https://bit.ly/2LzUQuS>

18 يوليو

عن عمرو عزب

ادعو الله أن يصل صوتي إليكم صوت أم مكلومه
انا والدة الطالب (عمرو عزب محمد) الطالب بالسنة النهائية بكلية
الطب
لقد تم أختطافه وإخفائه قسريا وهو في طريقه إلي كليته يوم
2019/3/3

ألي هذا اليوم لا أعرف عنه شئ 2019/7/17
138يوم حتي الآن وقد قمت بعمل الكثير من البلاغات
_للنائب العام
_لوزير الداخلية
_لمنظمات حقوق الانسان
_المحامي العام
ولكن دون جدوي



#عمرو_عزب_فين؟

ادعوا لعمرو ربنا يرده لوالدته سالما ..

<http://tiny.cc/fqhz9y>

عن آلاء صالح

و بعد ان جلسنا معها و رأيناها كما عهدناها صابره ثابتة علي
محناتها .. بدأ ابي الكلام ليمهد لها خبر وفاة والدتها حينها نظرت
في عين أختي ثم قالتها قبل ان نخبرها و كانت قد رُزقت في
منامها بروية و كانت تدعو لها يوم وفاتها دون علمها .. تسأل و
تتمني ان يكون جوابنا بالنفي فكان سؤالها (أمي ماتت صح؟؟!) و
كان جواب ابي البقاء لله يا مني .. وجدناها صابرة و ليس لها
حيلة الا البكاء .. وضعت يدها علي وجهها لتبكي و كانت اول مره
اري امي تبكي مثل هذا البكاء .. بكاء تأخذ نفسها بعده بصعوبه ..
باعتقالها منعوها من تغسيل امها .. لم يشدد علي جدتي المرض
الا بعد ان علمت باعتقال صغيرتها .. و انقضت الزياره ببكائها و




حزنها علي عدم تنفيذ وصية أمها بأن تكون هي من تُغسلها .. وحتى الآن لم نرَ أمي و لا نعلم كيف هي ..
كانت تبكي و تقول انا لله وانا اليه راجعون .. انا لله و انا اليه راجعون "وَبَشِّرِ الصَّابِرِينَ (55) الَّذِينَ إِذَا
أَصَابَتْهُمُ مُصِيبَةٌ قَالُوا إِنَّا لِلَّهِ وَإِنَّا إِلَيْهِ رَاجِعُونَ" من سورة البقرة- آية (156) .. بِشْرِكِ اللَّهِ يَا أُمِّي بِمَا هُوَ
خَيْرُ لَكَ وَ زَادَ صَبْرَكَ وَ ثَبَاتَكَ وَ صَمُودَكَ.. توفت أمك و هي راضيه عنك.. تعلمنا منك معني البر .. أمي أنتِ
جنتي

<https://bit.ly/2M3J6A8>

19 يوليو

عن منار عادل أبو النجا

"ومات ابوها قبل ان يراها " رساله من والده المختفيه قسريا منار عادل ابو النجا وطفلها الرضيع البراء وزوجها عمر :
ابنتي .. حبيبتي .. فلذه كبدي .. منارتي أين انت؟! أين رضيعك الذي يبلغ من العمر عاما واحدا؟! أين زوجك؟! مات أبوك يانور عيني!
فعندما علم من الطبيب ان لا فائده من جلسات الكيماوي .. بكى وقال نفسي اشوف منار ..فماذا فعلت يافلذه كبدي كي يخفونك قسرا ... انت ورضيعك وزوجك هل لانتك على خلق ودين ...هل لانتك متفوقه وكنتي الاولى على دفعتك؟! هل .. هل.. لماذا ياربي ! لم اعد افهم لماذا هذا الظلم الذي نحن فيه والى اي مدى وصل ذلك الظلم .. اهذه دوله .. اهذه بلد؟!
انا لله وانا اليه راجعون... النهارده منار وزوجها عمر وابنهم الرضيع البراء بيتمو 133 يوم مختفين قسريا!
"عمر عبدالحميد عبدالحميد أبوالنجا 26عامًا " وزوجته "منار عادل عبدالحميد ابوالنجا26عامًا " وطفلهم الرضيع "البراء" اللي كمل سنه من شهرين وهو مختفي مع مامته وباباه قسريا ، اتقبض عليهم يوم 9 مارس 2019 من منزلهم بالاسكندرية للان محدش يعرف عنهم اي حاجه! <https://bit.ly/2Z36S2O>



20 يوليو

عن معاذ الشرقاوي

لما نقعد لحد الساعة ٢ ف المعهد واحنا والمتهمين مستنيين لحظة ما نقف قدام الدائرة وبنقول يارب وبنراجع دفاعنا وطلباتنا ونقف نتكلم بلغة الإشارة مع المتهمين وكل محامي بيضمن المتهم بتاعه وتشتغل الدائره كام قضيه وفجأة يرفعوا الجلسة ويمشوا ويطلع السكرتير يبلغنا كده وش "الهيئه الموقرة" مشيت! طيب ايه القرار أجل لأمته؟ طيب جدد ع الورق؟ القرار ف النيابة يا أساتذة شوفوا هناك طيب والمتهمين؟ طيب اهااليهم اللي مستنيين كلمة تبرد قلوبهم لما نطلع من الجلسة؟ طيب احنا واحساسنا بالعجز قدامهم وقدام نفسنا؟ طيب ومعاذ؟ ده انا صدقت انه هيمشي النهارده وهو صدقتي زي ما صدقتي المرة اللي فاتت وفعلا اخذ إخلاء سبيل بس النيابة كان ليها رأي تاني طيب الورقه اللي كتبتله عليها عيد ميلاد سعيد ووقفنله بيها قدام القفص وفرح واستبشر انه عيد ميلاد سعيد فعلا؟! طيب بعد ما الدائرة مشيت وشاورتله ونوبه الضحك اللي جاتله وبقيت اضحك معاه ويقولني انا

بومة و عارف وانا عارفه انها مخبية وراها بكا وقهر ولما اضحكه واقله معلى يقولى معلى ليكي انتي
كمان

ليه كده ؟ عايزه حد يقولى ده بيحصل ليه

#الحرية_لمعاذ_الشرقاوي

#عيد_ميلاد_وزة

<http://bit.do/e2Hgk>

22 يوليو

عن مصطفى الأعصر

الزيارة كانت مُتعبة جداً .. من الساعة ٧ برا البيت من طريق
لحد باب الزيارة .. من ٩ ونص الصبح لحد الساعة ٤ بعد
العصر واحنا واقفين ف الاتبوبة ومستنيين دخول الزيارات ..
وف الاخر دخلنا الزيارة ومكملناش ربع ساعة وخرجنا كانت

مش عارفة بجد هنخلص من الحوار ده امتي

#الحرية_لأعصور

#الحرية_لمصطفى_الأعصر

<http://bit.do/e2Hr7>



23 يوليو

عن عمرو جمال من معتقلي قضيه 64 عسكريه

تقول عانشه اخت المعتقل عمرو جمال : لقد وجدت اخي عمرو بالامس لا يستطيع الوقوف على قدميه ،
ظل يتكأ مره على من بجانبه والذي يحتاج هو الاخر الاتكاء على اخر ، ثم مره اخرى يتكأ على القفص
الزجاجي وربما شعر بثقله على زميله وانه لا يستطيع فهو يعلم جيدا ما مر به اخي لم يكن قادر على
الحديث ، الكلمة لا تعبر الافواه ربما من صعوبه وهول ما رأت ، جسده اصبح هزيل ، فقد مايقارب ال 10
في 35 يوما فقط ، وجدته وقد وضعت المحاليل بيديه رغم انه كان يحاول اخفائها عني، فبكي بكاء شديدا

<http://bit.do/e28eR> ...

عن أحمد منصور من معتقلي قضيه 64 عسكريه

ذكرت والده المعتقل احمد منصور : دخلت جلسة احمد بحول الله وقوته ودعاؤكم " كانت سعيده " ولكني رايتته هزيل شاحب حزين وعندما رأني حاول ان يوصل لي بالاشاره انهم في كرب شديد ، رأيتته غير قادر على النهوض لكي يقف على قدميه ، علمت ان مجموعه منهم لم يصعدوا للقفص لسوء حالتهم ، أحمد طلب مني ان تقوموا بالحديث عنهم والدعاء لهم " <http://bit.do/e28eR>


عن أنس جمال من معتقلي قضيه 64 عسكريه

تقول اخت المعتقل انس جمال " الى الان لا استطيع استيعاب الموقف وما يحدث ، بالامس كل من دخل الجلسة ورأى الشباب لم يستطع ان يتحدث من هول ما رأى ، أنس ومن معهم قامو بإضراب عن الطعام منذ 35 يوما فقط لرؤيتنا ، نحن لانتحدث عن ايام بل نتحدث عن 3 سنوات منع من الزيارة ، منع من الحياه بل من كل شيء ، لكم ان تتخيلو احساس العجز الذي اصابنا ، اننا احرار ولا نستطيع فعل اي شيء ، انهم يموتون امامنا ، أنس الى الان قامو بوضع ث محاليل له ، اطالب منكم برفع اصواتنا فقط"

<http://bit.do/e28eR>

عن محمد سعد محمد

بابا اسمه محمد سعد محمد عنده 53 سنه ، اتقبض عليه يوم 10 يوليو من الشارح العصر بالمنصورة والموبايلات اتقفلت بعدها جم فتشو البيت ومن وقتها منعرفش حاجه عنه نهائيا!
بابا عنده حصوات فالكلي وعنده انزلاق غضروفي في الرقبه والظهر ، كل الفتره ده ازاي يفضل من غير علاج ، ازاي بيتحمل انه ينام عالارض ولا قاعد ولا وضعه ايه!



نفسى اعرف مكان بابا فين واطمن عليه ، نفسي احضنه نفسي اسمع صوته جدا ، بابا معملش حاجه علشان يحصل في كده نفسي يكون في وسطنا وجنبنا اوي ، محتاجه لبابا جدا بفكر طول الوقت فيك يا بابا ويس والله ، بابا بقاله داخل في اسبوعين منعرفش عنه حاجه...
على المستوى الإنسانى يشهد له الجميع بالخلق الحسن والإخلاص ، يشهد الله أنه كان ابا صالحا حكيما كريما ، كان لينا سهلا....

يذكر ان ا. محمد سعد كان مطاردا و غايب عن بيته من 2013 مشفش اهله الا ايام قليله ، محضرش زفاف بناته زي اي اب ولا كتب كتابهم ممرش بأي ظروف حلوه او وحشه معاهم وف الاخر يبقى مكانه مجهول وف تعداد الاختفاء القسري!

<http://bit.do/e28fH>

عن عمرو جمال

نداء #استغاثة من "عائشة جمال" شقيقة الطالب #عمرو_جمال -
طالب بالفرقة الثالثة بكلية الثقافة والاعلام - محافظة بورسعيد -
والمعتقل بسجن #العقرب سيئ السمعة ..
تتحدث عن أخيها وما يعانيه منذ اعتقاله في عام ٢٠١٦، وتقول ..
"أخي مكنش قادر يقف فالفقص ياناس
أخي بيموووت بالبطئ جوا
أخي مضرب اضراب كامل عن الطعام بقاله 35 يوم لو فضل بالشكل الـ
شوفتة فيه دا مش هعبيش والله
أخي معلق 3 محالليبييل



اتكلمووو عنهم

اتحركواااا اعلموا ايه حاجة عشاالانهم ،، بيموتوا جوا عشاااااا
كل مطالبهم افتحووووووا الزيارة
مش طالبين حااa

<http://bit.do/e28gc>

عن إبراهيم عز الدين

أنا مش بنام، قاعدة طول الليل والنهار قدام البيت منتظرة أن إبراهيم يدخل
علي، عارفة أنه مظلوم ومعملش حاجة، وأن ربنا عدل وأن اللي خدوه
هيأكدوا إنه معملش حاجة فهيسبوه.. بس اتاخروا أوي
#إبراهيم_عز_الدين_فين؟
والدة إبراهيم عز الدين .

<http://bit.do/e28kF>



عن الصحفي #عادل_صبري

تعرب أسرة الكاتب الصحفي عادل صبري، رئيس تحرير
موقع مصر العربية MasrAlarabia - عن بالغ غضبها
واندهاشها من تصريح الأستاذ #مكرم_محمد_أحمد، رئيس
المجلس الأعلى لتنظيم الإعلام ونقيب الصحفيين الأسبق،
والذي نفى فيه "وجود أي صحفي بالسجن على ذمة قضايا
تخص حرية الرأي والتعبير والمهنة"، خلال لقائه وفدًا من
الإعلاميين الأفارقة الأحد الماضي .
ونحن لا نعلم حقيقة؛ هل مرور عام وأربعة أشهر على حبس
رئيس التحرير عادل صبري جعل السيد رئيس المجلس



الأعلى لتنظيم الإعلام يتناسى أن هناك صحفيًا مسجونًا بهذا الاسم.
هل تناسى السيد رئيس المجلس الأعلى لتنظيم الإعلام أن الأزمة بدأت قبل يومين فقط من القبض على عادل صبري، وتحديدًا في 1 أبريل 2018، عندما فرض المجلس الأعلى لتنظيم الإعلام غرامة مالية على موقع "مصر العربية" قدرها 50 ألف جنيه على خلفية تقرير ترجمه الموقع عن صحيفة نيويورك تايمز الأمريكية عن الانتخابات الرئاسية المصرية 2018. وبعدها بيومين فقط، في 3 أبريل، تم مداومة الموقع والقبض على رئيس تحريره؟

هل تناسى السيد رئيس المجلس الأعلى لتنظيم الإعلام المذكرة التي قدمتها إدارة موقع "مصر العربية" في اليوم التالي للقبض على رئيس التحرير عادل صبري لتوفيق أوضاع الموقع وفق القانون الجديد والذي لم يكن قد صدر حينها، وقد تضمنت المذكرة طلبًا بسداد الغرامة والمطالبة بالتدخل للإفراج عن عادل صبري؟ هل اطلع السيد رئيس المجلس الأعلى لتنظيم الإعلام - بحكم وظيفته على الأقل - على تقرير حالة الحريات الصحفية في العالم العربي، لعام 2018-2019، الذي أطلقه اتحاد الصحفيين العرب من قلب القاهرة، في 4 مايو الماضي، والذي خلص إلى أن هناك عدد من الصحفيين المصريين مسجونين على ذمة قضايا نشر، من بينهم رئيس التحرير عادل صبري؟

هل يتابع السيد رئيس المجلس الأعلى لتنظيم الإعلام التقارير والتصريحات التي تصدرها لجنة الحريات بنقابة الصحفيين بشأن رئيس التحرير عادل صبري باعتباره مسجونًا على ذمة قضية نشر، بخلاف المجهودات التي تقوم بها اللجنة القانونية للنقابة والمحامين المنتظمين في حضور جلسات التحقيق، فهل تدعم نقابة الصحفيين مسجونًا جنائيًا؟

نحن حتى لم نتحدث عن تناقض تصريح السيد رئيس المجلس الأعلى لتنظيم الإعلام مع نتائج المؤشر العالمي لحرية الصحافة لعام 2019 المُعد من قبل منظمة "مراسلون بلا حدود" والذي احتلت فيه مصر المرتبة الـ 163 عالميًا، أو تناقضه مع تقرير لجنة حماية الصحفيين الدولية الصادر في 13 ديسمبر 2018 والذي أكد أن مصر من أكثر 4 دول حبسًا للصحفيين في العالم.

هل يعلم السيد رئيس المجلس الأعلى لتنظيم الإعلام أن التهمة الرسمية الأساسية الموجهة لرئيس التحرير عادل صبري هي (نشر أخبار كاذبة) أي أنه محبوس منذ عام وأربعة أشهر على ذمة قضية نشر بالأساس؟ هل يعلم السيد رئيس المجلس الأعلى لتنظيم الإعلام أن محكمة جنابات الجيزة قد برأت رئيس التحرير عادل صبري من تلك التهمة، وأمرت بإخلاء سبيله في 9 يوليو 2018، قبل أن تُفاجأ بفتح تحقيق معه من جانب نيابة أمن الدولة العليا في قضية جديدة، في اليوم ذاته الذي كان يُنتظر فيه تنفيذ قرار المحكمة بإخلاء سبيله. وكانت المفارقة أن القضية الجديدة التي تم حبسه على ذمتها تحمل ذات الاتهامات التي قضت محكمة جنابات الجيزة بإخلاء سبيله فيها!؟

هل يعلم السيد رئيس المجلس الأعلى لتنظيم الإعلام، الذي ينفي وجود أي صحفي بالسجن على ذمة قضية نشر، أن التقرير الذي نشرته "مصر العربية" واعتبره المجلس الأعلى لتنظيم الإعلام جريمة تستوجب الغرامة، واعتبره "آخرون" جريمة تستوجب الحبس؛ تضمن ترجمة لخبر نشرته صحيفة نيويورك تايمز ذكرت فيه أن الانتخابات الرئاسية بها رشاي، كما تضمن رد الهيئة الوطنية للانتخابات بنفي وجود أي رشاي، وتضمن كذلك آراء نواب البرلمان في العملية الانتخابية، أي أن تقرير "مصر العربية" نشر خبر نيويورك تايمز وفي المقابل نشر أيضًا رد الهيئة الوطنية للانتخابات، وهذه هي المهنية التي اتسمت بها دائمًا وأبدًا صحافة عادل صبري.. فأين هنا الخبر الكاذب أصلًا؟

رابط تقرير "مصر العربية" <https://bit.ly/2J01eKX> :

أخيرًا، تؤكد أسرة رئيس التحرير عادل صبري أنها لم تكن لتلتفت إلى مثل هذه التصريحات لولا أنها صدرت عن أحد المسؤولين عن الصحافة والإعلام في مصر، وأحد المسؤولين المباشرين أيضًا عن حبس عادل صبري، وهو الأمر الذي كان يتطلب منا الرد.

وتحمّل أسرة رئيس التحرير عادل صبري نقابة الصحفيين مسؤولية الدفاع عنه والسعي الحثيث نحو الإفراج عنه باعتباره رئيس تحرير محبوس على ذمة (قضية نشر)، خاصة وأن الجميع يشهد له بتقديس حق المهنة، صاحبة الجلالة، التي مكث في بلاطها نحو 30 عامًا، شابًا وشيخًا، تلميذًا ومعلمًا، وأهدته نقابتها إحدى جوائزها يومًا ما.

أسرة عادل صبري

23 يوليو 2019

#الصحافة_ليست_جريمة

#الحرية_لعادل_صبري

<http://bit.do/e28oy>

عن مصطفى الأعصر

اليوم الرابع للإضراب الكلي لمصطفى الأعصر وصديقه مصطفى أحمد .. اعصر صحته النفسية والجسدية وحشة جدًا وكل يوم يتسوء أكثر مع الإضراب

السجن يقتلنا بالبطئ ، يفرغنا من مضموننا الإنساني ، في كل ليلة يمص من دماننا قطرة ، وفي الصباح يسحب من رئاتنا نفسًا ، يأخذ من أقدامنا خطوة في كل مرة يمنعنا من الحركة ، يأخذ من أسننتنا الكلام في كل موقف نعجز فيه عن التعبير أو الشكوي أو الصراخ ، يأخذ كل هذا ويمنحنا في المقابل الخوف والأرق والكوابيس والروماتيزم وخشونة المفاصل وضمور العضلات وخلل في المشاعر وبطء في التفاعل وتكلس في العقل وندبات في القلب لا يمحي آثارها الزمن ، يسحب من عيوننا أشعة الضوء ومن رؤيتنا البصيرة ، يجردنا من كل شيء عدا رطوبة الزنازين وقسوتها ، يجرد عقولنا من الذكريات والماضي والأفكار وكل الصور المخزنة سلفًا ، يصبح العقل صندوقًا فارغًا ، ويصبح الجسد جثة بلا روح..

ينتشر الحزن في العقل كالسرطان ، يستشري في كل خلية حتى ينسي تمامًا ماذا كانت تعني السعادة ، حتى الضحك المسلوب قهراً من شفاهنا يجعلني أتعجب لمّ الضحك في خضم المأساة ؟ ، وهل الضحك هو الدليل علي السعادة والترادف المنطقي لها ؟ من الغبي الأحق الذي وضع هذه المعادلة السخيفة، قد نضحك لأننا - آسفين - أصبحنا لا نجيد البكاء.

ليست الأزمة في السجن فقط أننا نتعري أمام أنفسنا وأمام الجميع بسهولة ويسر ، ونظهر في تلك الصورة التي لا نرجوها لأنفسنا حتى نكره ذواتنا ، إنما أنه لا سبيل لتقديم أنفسنا في صورة بديلة كما نحبها ، وأنه لا وسيلة للهروب من هذا هذا الواقع الدميم ، فلا وسيلة فعالة لإلهاء العقل وانحراف مساره عن التفكير ، فكلما حاولت الابتعاد وإلهاء ذاتك بأية وسيلة تافهة متاحة تصطدم أنظارك بالجدران والقضبان والأبواب الموصدة لتطرحك أمام حقيقتك المخوخة والممتلئة في الضعف والعجز وانعدام المصير ..

لا إلهاء في السجن ، تلك حقيقة يقينية كحقيقة الاحتباس الحراري ، لا إلهاء ولا هرب ، ليس من ثمة طريقة غير المواجهة ، والمواجهة لعدو لا نطقه ولسنا أندادا له تكسرنا في كل لحظة حتى لم يعد بنا ذرة صحيحة..

<http://bit.do/e28Lb>

24 يوليو

عن مصطفى الأعصر

من 48 ساعة بدأ الصحفي مصطفى الأعصر إضراب مفتوح عن الطعام، السبب الرئيسي اللي بيؤكد عليه مصطفى هو وفاة عمر عادل الله يرحمه اللي كان محبوس معاه في نفس المكان، واعتراضا على سوء الأحوال المعيشية داخل السجن، والإهمال الطبي، وبصفة عامة اعتراضا على الحبس الاحتياطي المطول منتفي المبررات. مصطفى حالته النفسية سيئة جدا جدا، وحالته البدنية كمان سيئة ماتتحمش أبدا يفضل مضرب عن الطعام .



مصطفى بيطلب من أصدقائه يتكلموا عنه، يمكن الكلام ده يكون سبب إن مسؤول يوصل له صوته ينصفه ويرفع الظلم عنه . وختاما أقتبس من كلام مصطفى "إن كنت مذنبا فحاكموني، أما الحبس الاحتياطي المفتوح فهو لعنة "

<http://bit.do/e28iQ>

والدة أحد المعتقلين

انا بقالي كام يوم اروح واقف عند شديد الحراسة ٢ علشان ادخل لابني دواء وشوية صابون وادوات نظافة ويرجع كل حاجة بكل حاجة بحجة ان مستلم الامانات مش موجود وطبعا بيلطعوننا بالخمسة ست ساعات في الشمس وفي الاخر يمشوننا. لا تتخيلوا الامهات وكثير منهم مسنات جدا وكمية القهر والبكاء هناك وبهدلة الكل اللي احيانا بتصل من بعض الامناء برفضهم وازاحهم بالقوة بعيد عن الاتوبيسات اللي بتخرج من جوا للمحكمة محملة بأبناءهم وهما بيصرخوا وينادوا عاينهم بكل حرقة قلب وقهر.. يارب خدنا وريحنا او خد حقنا وانصفنا..

<http://bit.do/e28mJ>

عن مصطفى الأعصر

النهارده تالت يوم للإضراب الكلي لمصطفى الأعصر مصطفى حالته النفسية والجسدية وحشة جدا

مصطفى الأعصر ، صحفي وكاتب شاب ، محبوس احتياطي بتهمة نشر أخبار كاذبة من يوم 4 فبراير 2018 .. مصطفى كمل سنة ونص في السجن بدون أي جريمة واضحة ارتكبها .. إكتبوا عنه النهارده اللي حابب يقول حاجة لمصطفى ، أو حابب يكتب عنه ، يشاركنا في الكتابة علي الهاشتاجات دي :

#الحرية_لأعصر

#الحرية_لمصطفى_الأعصر

#الصحافة_ليست_جريمة

اللي يعرف الأعرص كويس ، عارف اد ايه هو بيحب شغله واد ايه بيحب الناس والأصحاب .. ولذلك أقل حاجة نقدمهاله إننا نكتب له ونكتب عنه عشان مايتنسيش .. مصطفى دايمًا كان عنده هاجس النسيان .. ماتخلوش الهاجس ده يتحول لواقع..
مصطفى الأعرص ماقصرش مع حد من صحابه حتي وهو محبوس وكان دايمًا سند وظهر ومابينساش يسأل ويظمن عليهم بالأسم .. وده الوقت إننا نعرفه إننا بنحبه ونعرف الناس بيه..
مصطفى الأعرص إنسان مبدع وحساس وبيكره الصراعات وبيتنصر دايمًا للإنسانية ، مصطفى بيحب السينما والمزيكا والمسرح والشعر والرقص والغنا والحب والسلام .. مصطفى الأعرص مش مكانه السجن .. إكتبوا عنه جايز صوتنا يوصل ومصطفى يخرج قريب ببساطة أقول :- " إن كنت مذنبًا ؛ فحاكموني ! " .. أما الحبس الاحتياطي المفتوح فهو لعنة

#الحرية_لأعصور

#الحرية_لمصطفى_الأعرص

#الصحافة_ليست_جريمة

<http://bit.do/e28nb>

25 يوليو

قصص المعتقلين بمصر

#انتهاكات_بحق_المعتقلين
فك الاضراب يا أحمد
=عايز اشوف امي
_هي مش عايزة تشوفك بس فك
الاضراب
=عايز اشوف اخواتي
_هم كمان مش عايزين يشوفوك بس
فك الاضراب
=خلاص انتوا حرين بس أنا مش



هفك الاضراب...

ده الحوار اللي حصل بين احدى المحاميات اللي شافوا احمد وبابا النهارده أحمد تعبان جدا وخاسس ومش قادر يقف ع رجله وبابا طول الوقت قاعد ف الارض مش قادر يقوم يقف ولا يتكلم ده غير انهم جايبين اصلا م المستشفى ومتعلقهم محاليل احساس العجز اللي هم فيه مخليهم مش عارفين يعملوا ايه غير الاضراب واذية نفسهم بس هم بيتعلقوا بأى حاجة

واحساس القهر وقلة الحيلة اللي احنا فيه واحنا مش عارفين نعملهم حاجة

ادعولنا وادعولهم كتير

انقدونا قبل ان تفقدونا

<http://bit.do/e28tN>

ابنة أحد معتقلي سجن برج العرب

اليوم النهارده أشبه بالكابوس حرفياً
انا لا عارفه افوق ولا اصدق اى حاجه من اللى بتحصلنا
من اول اليوم حرفيا قلته ادب ومرمطه وطوابير ولطعه فى الشمس اكثر من ٦ ساعات انتظار
ندخل التفتيش ايه الاكل اللى انتى جيباه ده كله؟ (كيس خضار ، كيس فراخ ، كيس رز)
ميكفوش ٥ أفراد فى حين أن عددهم تجاوز ال ٢٠
عماد الشاذلى بنفسه بيشراف على التفتيش بكل وقاحه وقله ادب وسفاله
التفتيش الذاتى اقل ما يقال عنه اقسام بالله تحرش ولما اعترض انا ست زى زيك (١)
دخلنا قاعه الزياره الباب اتفتح لدخول المعتقلين
لا مش هما دول هياكل عظيمه تعبانين وماشيين بالعافيه
بأعجوبه جنبنا واحده عصير لبابا اول ما شافها قالنا اخيرا عصير وحاجه مسكره (٢)
الزياره كانت ١٠ دقائق بالملى أو أقل
احنا فى دوامه مش عارفين حنطلع امتى منها
احنا صابرين وراضيين يارب بس انت شاهد ومطلع احنا تعبنا
محدث بيدفع التمن غيرنا اتعذر بينا من شويه اشباه رجال مرتزقه خونه
الله يخذيهم ويخذلهم زى ما خذلونا
ادعوا للمعتقلين بالثبات لأنهم اتهددوا وبيهددوا كل شويه
السجن دلوقتى ماسكه الأمن الوطنى اللى مشيينا وعاملين علينا رجاله وهما كلاب
ادعولنا ربنا يلفظ بينا (٣)

<http://bit.do/e28tn>

عن محمد حسن محمد عزت



السن / ٣١
الوظيفه / مدرس حاسب الى
محافظه / القاهره
الحاله الاجتماعيه / اعزب
-محمد كان مع اصدقائه فى عنوان سكنا نزل يشتري احتياجاتنا ويتجول مع
اصدقائه المذكور اسمانهم فى عزبة النخل فى تمام الساعه ٨ مساء يوم
١٨ / ٣ / ٢٠١٨ بنكلمه تليفونه اتفقل وعند السؤال وفحص الكاميرات وجدنا
ان محمد واصدقائه بينهم ٢ اخوات انهالت عليهم قوه بزى مدنى بالضرب
والقبض عليهم فى شارع الفريد العمومى امام جميع الماره وامام امين
شرطه بقسم المرج يسكن جوارنا قال لنا هذا وقامو بتوجيههم الى قسم المرج
وعند السؤال عنه قالو لا يوجد لدينا
وقمت بالسؤال عنه فى جميع اقسام القاهره ومديرية الامن القاهره ولكن

انكروا

قمنا بعمل تلغرافات كثيره لوزير الداخليه والنائب العام وجميع مسئولى الدوله اكثر من ٥٠ تلغراف وارسال العديد من الفاكسات وعمل اكثر من ٥ شكاوى الكترونيه لمجلس الوزراء وارسال تلغرافات لرئيس الجمهوريه وعمل ٣ بلاغات لمكتب النائب العام فى الرحاب واخيرا قمنا برفع دعوه لمجلس الدوله ضد وزير الداخليه لابلاغنا عن مكان احتجازه استمرت ٣ شهور وفى النهايه انتهت ايضا دون جدوى -كل ما عرفته عن محمد عن طريق احد الناجين من الاختفاء القسرى انه كان هو واصدقائه متواجدين من يوم ٦/٣/٢٠١٨ حتى يوم ١٦/٤/٢٠١٨ فى امن الدوله بالعباسيه وقامو بترحيلهم الى مكان اخر -محمد مريض بثقب فى القلب وبيعانى من امراض روماتيزم وبيحتاج ادويه بشكل مستمر وظروف الاحتجاز

-محمد والدته مسنه ومريضه حالتها الصحيه متاخره جدا بسبب عدم رويه ابنها تتمنى ان تراه فقط حتى لو

دقيقه واحده <http://bit.do/e28AV>

عن احمد عاشور

تحديث : نيفين اخت احمد سافرت عشان تشوفه وبتقول معرفتش اطمن عليه معرفتش اشوفه ، كل اللي عرفته عنه هو وبابا انهم كانوا ف المستشفى كل واحد فيهم متعلقه 3 محاليل وجايين م المستشفى ع المحكمه ، العربيات اللي جاية من المستشفى كان ممكن اكلمهم منها بكل سهوله بس محدش فيهم نادى عليا الظاهر كده انهم للاسف حتى مش قادرين يطلعوا صوتهم وينادوا عليا!!!!))

بعد ساعات جلسه احمد عاشور فى قضيه 123 عسكريه... احمد اعتقل وهو عنده 16 سنه فى 2017 ولما كمل ال 18 سنه اترحل لسجن العقرب فى يناير 2019 ، احمد ما شافش اهله الا 3 مرات من ورا ازاز ، احمد فى الفترة الأخيرة كل اللي اهله يعرفوه انهم اضرَبوا عن الطعام فى سجن العقرب لكن ما يعرفوش عنه حاجه ولا قدرُوا يطمنوا عليه فى ظل انقطاع الجلسات ومنع الزيارات وبكره اول جلسه بعد غياب



فيارب اهله يشوفوه ويطمنو عليه.. ادعو لأحمد وكل معتقلين العقرب ... <http://bit.do/e3fMw>

معاذ كان مستنى معاذ جلسته بفارغ الصبر وكان بيعد الأيام عشان كان مصدق انه إخلاء سبيله بقى متوقع ومش حاجه بعيدة وانه هيحصل عليه زي الجلسة اللي قبلها

ينزل المحكمة ونروح وف الاخر ميتعرضش هو وكثير زيه ويتجددله ويتجددلهم على الورق ولما يعرف الخبر تاني يوم يموت زميله ف السجن عمر عادل الله يرحمه مات ف التأديب اللي اى محبوس معرض أنه ينزله ف اى لحظه لو عمل اى حاجه شافها ظابط أو عسكري انها خروج على قواعد السجن وبعدها بأقل من يوم ومع حالة الحزن والإحباط والخوف اللي مسيطر عليه وعلى كل زميله يقرر اتنين من رفقاء زنزانتة ومن أقرب الناس ليه ف الحبس مصطفى الأعصر ومصطفى أحمد يقرروا الدخول ف اضراب مفتوح عن الطعام

والحقيقة ان مصطفى الأعصر هو الشخص اللي احتضن معاذ اول دخوله السجن وقرب منه وكان جنبه من أول لحظه لحد النهاردة وكان دايمًا بيهون ويقدم دعم

ده مصطفى كان بيقدم دعم للي برا انا لما كنت بشوفه ف الزياره كنت بحس براحه
الشخص اللي كان قادر يلاقي ف وسط الضلمة ألوان بقي حزين ويانس لدرجة انه ياخذ قرار شجاع
وتبعاته مش معروفة ومش محسوبة ويضرب عن الطعام ويشوفه أصحابه وهو بيضعف جسمانيا ساعة
بعد ساعة وهو قدام عندهم
آخر حاجه كان قايلهالي مصطفى عن معاذ قريب وهو بيهزر احنا بنحاول ننتشله من الوحل بس هو
بيجرجرنا معاه

كان يقصد انه بيحاول يخليه ف حالة نفسيه احسن
بس مصطفى دلوقتي هو كمان محتاج حد ينتشله من وحل السجن والموت الاحتياطي هو ومعاذ ومصطفى
أحمد وحسن وكلهم
انا مش عارفه البوست ده عن معاذ ولا عن أعصر اللي بعتيرة اخ وصديق غالي وليه ف قلبي معزة الدنيا
ولا عنهم كلهم ولا عن الحبس الاحتياطي ولا عن مصايرهم المجهولة ولا عن عمر عادل اللي موته خلاهم
يدركوا حقيقة الموت اللي بيعايشوه كل يوم
بس انا مش عارفة ممكن ننقذهم ازاي
النهاردة اليوم الرابع للاضراب المفتوح عن الطعام لمصطفى الأعصر ومصطفى أحمد

<http://bit.do/e28Ji>

عن مصطفى النجار

سلاما عليك يامصطفى اينما كنت سلاما مني ومن زوجتك واولادك واخواتك وكل احبابك وتضرع لله
سبحانه وتعالى ودعوات أن يحفظك ربك حفظا يليق بعزته وجلاله. ٣٠٠ يوم مروا على اختفائك مهما قلت
ووصفت لن يشعر أحد بالنار اللي أحنا فيها. لا يعلم حالنا الا الله. ماذا نفعل لا ادري أشكو الى الله وادعوا
يارحم الراحمين رد إليا ابني كما رددت سيدنا موسى لأمه وسيدنا يوسف لأبيه. انك على كل شيء قدير

<http://bit.do/e28GU>

26 يوليو

عن د. جمال عبد الفتاح

متى يكون لهذه القصص المرعبة نهاية ؟
فبعد قرار إخلاء سبيله ، عاد (جمال عبد الفتاح) من جديد ليفترش أرض
عنبر ايراد سجن القناطر بعد أن سلمنا كل مهماته في الزيارة الأخيرة
حتى الدواء...!!!؟

<http://bit.do/e28LB>



النهارده اليوم السادس للإضراب الكلي لمصطفى الأعصر وصديقه مصطفى أحمد ولسه السجن متجاهلين الإضراب ورفضوا يعملولهم محضر الإضراب .. ومش مهتميين بصحتهم ولا بالمتابعة الدورية لصحتهم اعصر صحته النفسية والجسدية سيئة جداً .. وخاسس وتعبان جداً ويوم الخميس نسبة السكر ف الدم عنده كانت ٦٠ وكان تعبان جداً ولحد دلوقتي ما اخدش اي ادوية

#الحرية_لأعصر

#الحرية_لمصطفى_الأعصر

#الحرية_لمصطفى_أحمد

#التأديب_يقتل_للحياة_نجوع

#معركة_الأمعاء_الخاوية

#الصحافة_ليست_جريمة

<http://bit.do/e3fPg>

عن أحمد بدوي

بدوي محبوس بقالة 95 يوم منهم 8 اختفاء قسري و 87 انفرادي في العقرب من غير اي زيارات مفيش غير الثواني اللي بنشوفة فيها من بعيد وقت التجديد كل 15 يوم اللي كنا حتى محرومين منها وقت البطولة كل دا علشان بدوي خاف على مستقبل كارما اكثر من نفسه ووقف بالورقة الوحيدة اللي مكتوب عليها #لا_للتعديلات_الدستورية وسط الاف يفت التأييد الإجبارية كان لوحدة بورقة عالرصيف لم يخرق اي قانون ولا حتى قانون الطوارئ افكروه، ادعولة، اكتبوا عنة. #الحرية_لاحمد_بدوي



<http://bit.do/e3fPy>

28 يوليو

النهاردة أعصر ومصطفى أحمد بيكملوا أسبوع إضراب كلي عن الطعام، بعد أسبوع الجسم بببدأ يستهلك مخزون البروتين اللي في العضلات والأملاح في الجسم هتبدأ تقع، دوخة وإرهاق ومش هيقدرنا يقوموا من فرشتهم وجسمهم هيبدا يخسر الدهون والعضلات اللي فيه وإحساسهم بمغص الجوع تقريبا هينتهي. أعصر ما فيش فيه وزن ولا عضلات تستحمل الضغط ده ولا نفسيا يقدر يستحمل عبء الإضراب، ولكن عبء اللي هما فيه عليهم اسوء من الجوع. الأوضاع اللي اضطرت أعصر ومصطفى للدخول في إضراب من إهمال طبي وسوء معاملة وظروف معيشية سيئة جوا السجن والتي انتهت بموت عمر عادل - ٢٥ سنة- جوا زنزانة التأديب، ورفيق زنزانة لأعصر لمدة شهر، لازم ينتهي. الحبس الاحتياطي المفتوح بدون محاكمات ولا تصور عن إمتى الكابوس ده هيخلص هو قتل بالطبي. <http://bit.do/e3fQS>

عن علاء عبد الفتاح

عمرها ما هتبقى حاجة عادية ان أخويا بيتبلع في ثقب أسود في قسم الدقي كل يوم الساعة ٦ م حتى لو بنحاول نتعود، حتى لو باقي حياتنا مكملة حوالين جدولة الداخلية ليومه ويومنا دائما فاكارين وشايلين وجع ان علاء كل يوم بيتعزل في كشك خشبي صغير، كل يوم بيفرش وينام على أرض معفنة، كل يوم بيبقى حواليه وعليه حشرات وهو نايم، كل يوم بنفقد التواصل تماما معاه ١٢ ساعة، كل يوم بيتحرم من ان ابنه ينام في حضنه، وكل يوم الصبح بيلم فرشته كاملة يشيلها على كتفه ويطلع يكتشف فاتة ايه في العالم برة <http://bit.do/e3DX9>

عن أسر زهر الدين

البداية كانت في 2016/1/12 الساعة 01:45 AM يوم ثلاث إتفاجأنا بالأمن الوطني بيخبط ويسأل علي أسر بابا إستغرب و قاله ليه قالو هنسأله سؤالين بس



...
أسر وقتها كان عنده 14 سنة و 11 شهر مواليد 2001/2/2 كان في التيرم الأول من أولي ثانوي و كان ليعيب Handball ف جسمه مكنش يوحى لسنه بس وشه كان baby face خالص المهم كان نايم علي سريره بابا قالهم طيب هدخل أصحيه عشان ميتخضض قالوله لأ إحنا اللي هندخل صحوه و سألوه علي بطاقته قالهم مش معايا قالولوا هنبدا إستعباط من أولها بابا تدخل و قالهم الولد فعلا تحت السن و مش معاه بطاقه ده 14 سنه إتصدموا و قعدوا يعملوا موبايلات و بعدين قلبوا أوضته و قالوا لبابا إحنا هناخده ساعتين و هنرجعهولك و رفضوا حتي بابا ينزل معاه ...
الساعتين دخلوا في 33 يوم إختفاء قسري منعرفش هو فين ؟ بيحصل فيه إيه ؟ عايش ولا لأ ؟ طيب لو عايش الجو تلج بينام ازاي ولا لابس إيه ؟ طيب بياكل إيه ؟
ده في الآخر طفل مهما قدر يستحمل هيستحمل قد إيه ؟

كل يوم كنا بنعمل أي حاجة تحاول توصلنا ليه و بنروح محكمة الطفل يوميا عشان لو ظهر هناك ..
إتفاجأنا إنه إتعرض علي نيابة أمن دولة علي قضية ملفقة (نية تفجير فندق التلات أهرامات) بدون المحامين بتووعه و أخذ 15 يوم و التهم المضحكة الموجهه ليه " إنتماء لجماعة أسست علي خلاف القانون " أي جماعة طيب العلم عند الله هي جماعه و خلاص و " تهمة التجمهر " ودي تقريبا لما جم ياخدوه لقوه بيتجمهر في الحلم و هو نايم علي السرير ..
خلال الفتره دي كان في الأمن الوطني إتعرض لتعذيب و كهربا لدرجة إن كتافه الإثنين إتخلعت بسبب إنه مبيجاوبهمش علي أسئلة هو ميعرفلهاش إجابة و ناس أول مره يسمع أساميههم ف علقوه يوم كامل من إيده علي أمل إنه يعترفهم باللي هما عايزينه ..
بعد شهرين من التجديدات 15 في 15 القضية إتحاتل للقضاء قدام المستشار ناجي شحاته (المعروف عنه بقاضي الإعدامات) و اللي فعلا أحال 7 من القضية للإعدام و اللي من ضمنهم ولد وقت إعتقاله كان طفل برضو !!

بدأنا جلسات شهود (اللي بالمناسبة قالوا ميعرفوش أسر ولا واحد من القضية كلها حتي) و جلسات
مرافعات خلال ال3 سنين اللي فاتوا ..
آسر قضى فترة طفولته اللي كانت المفروض تكون وسط أهله و أصحابه في السجن ، ذاكر و خلص مرحلة
الثانوي في السجن ، نضج و كبر و بقي عنده 18 سنة و 6 شهور في السجن بين 4 حيطان ، إتحرم من
أهله صحابه رياضته مش عارفه الحقيقه إزاي جالهم قلب يعملوا فيه كده
النهارده اليوم ال 1239 ليه 3 سنين و 6 شهور و 16 يوم
بكره عنده جلسة نطق بالحكم بعد البهدة و المرمطه ديه .. مش عارفين النهاية هتبقى شكلها عامل إزاي
الحقيقة

هل هيبقى فيه ذرة رحمة و يخرجوه ولا هيبقوا لسه مستكفوش
#الحرية_للأطفال اللي مبقوش أطفال
#الحرية_لأسر_زهرالدين
#الحرية_حق

<http://bit.do/e3DZi>

30 يوليو

عن أيمن عبد المعطي

على قد ما كان العشم كبير في إخلاء سبيله في جلسة الأسبوع دا،
الإحباط والوجع كبار بقرار تجديد حبسه ٥ ٤ يوم كمان..كان نفسي
نحتفل بخروجه وبعيد ميلاده ويرتب هو احتفال بعيد ميلاد شمس الاول
زي ما قالي في آخر زيارة ويقضي معانا العيد..دلوقتي مش بفكر غير
في أنه في ميعاد جلسة التجديد الجاية هيكون كمل ١١ شهر حبس
احتياطي، وفي ترتيبات الرحلات الأسبوعية الشاقفة (زيارات السجن)
اللي بتهون عشان تلت ولا نص ساعة بنطمن فيها عليه..الله غالب
يارب السنة الجديدة في عمرك يا أيمن تكون أحسن ونشوف العدل
والخير اللي عايش تتمناه للناس طول عمرك..وزي ما بتقولني: مسيرها
تروق وتحلى يا حبيبي. #الحرية_لأيمن_عبدالمعطي

<http://bit.do/e3DXW>



عن زياد العليمي

رجعنا من زيارة زياد.. هو الحمد لله روحه المعنوية مرتفعة.. وببسلام عليكم جميعا.. انا كنت رايحة قلقانة
لأن زياد كان بعت يطلب اننا نروح الزيارة دي من غير نديم!! لما رحنا عرفنا انه كان عايز يظمن على
معنويات نديم بعد الزيارة اللي فاتت، وانا قلت له انه كان مبسوط ومعنوياته مرتفعة، فاطمان، وبيشكر كل
الأصدقاء الغاليين اللي اهتموا وكتبوا تحت هاشتاج #قصة_لنديم_عن_زياد

وطلب مني اطمئن نديم ، وافهمه ان بابا بيمثل حماية له مش لأنه قوي عضليا ولا لأنه غني وعنده ثروة، أو منصب، لكن لأنه عنده ثروة من الاصدقاء المخلصين والناس اللي بيحبهم وبيحبوه اللي ممكن يقفوا جنبه في أي وقت زي ما هو بيقف جنبهم، وطلب مني اقرا له كلام الاصدقاء الراضين، وأبلغكم شكره البالغ لغاية ما ربنا يفرج كربنا ويرجع يشكركم بنفسه .

المرة اللي فاتت زياد اشتكى من تفتيت في أسنانه وأسنان هشام فؤاد وما كناش فاهمين ايه السبب.. النهارده عرفنا ان زياد عنده تسوس في احد الضروس، لكن هشام عنده خراج تحت احد الأنياب تسبب في كسر جزء من الناب!! بالشكل ده لازم يتعرضوا على طبيب أسنان وهشام اكيد يحتاج مضاد حيوي ربنا يخفف عنه الألم.

زياد محتاج يعمل أشعة بالصبغة على صدره ، ورنين مغناطيسي على ركبته اللي طرقت وكان سبق وأزال منها الغضروف بعد إصابة في احدى مظاهرات الجامعة.. والجهازين مش موجودين في مستشفى سجن طرة، ربنا يهديهم بقى وينقلوه يكشف في أي مستشفى خارج السجن ولو على نفقتنا الخاصة، مش لازم نروح المركز الطبي العالمي على نفقة الدولة زي المخلوع.. زياد وزمائله محتاجين شباك يتنفسوا

<http://bit.do/e3DY7>

عن اسلام الحضري

النهارده تجديد اسلام الحضري ومن كتر اليأس واليأس من وضع صاحب لافتة اليأس خيانة ما حدش فينا كتب و لا حد حط سيناريو ان ممكن اسلام يخلى سبيله حتى بعد مرور عامين واكثر من شهرين على احتجازه الانتقامي مش الاحتياطي

احنا عايزين حد من الأمن الوطني يقولنا مشكور ليه اسلام الوحيد في قضية فيها ء غيره كلهم نفس المركز القانوني أخلى سبيلهم اخرهم كان من اكثر من سنة لبيبيه اسلاام؟



ليه الانتقام والتعنت والتكيل الواضح والجلي قولولنا قولوله ابعثوا مع اي حد فقدنا كل حججنا ومنطقنا لتفسير الحالة دي

اسلام شاب مفعم بالحياة وخفة الظل يوم عن يوم روحه بتتسرب اسلام اب ترك ابنه سنه لا يعيه النهارده عمره ٣ سنين وشهور وزوجة صابره وصامدة في احلى سنين شبابها على هم وتمن حلم كلنا حملناه اللهم عدلك

<http://bit.do/e3DYK>

31 يوليو

عن مصطفى النجار

طال غيابك عنا اوى يا مصطفى وبعدين لحد امتى هنقول من حقنا نعرف مكانه

هو في ايه بقيت فعلا مش عارفه ليه كل دا
مش بفهم سياسه ومش عايزة أفهم بس إللى اعرفه
كويس في قضاء يحكم على المخطنين في سجن لقضاء فترة
العقوبة لكن ماذا يعنى الإخفاء القسرى؟

رجاء الرد من المسؤولين عن اخفاء زوجي واطلب منهم
الإعلان عن مكانه او اخبارنا بوضع مصطفى خيرا كان ام لا (لا قدر الله)
الاسبوع الماضى أجرينا لهننا عمليه جراحيه فى أسناتها ولا استطيع وصف حاله هنا قبل العمليه من خوف
وقلق وتمنيها وجود باباها بجوارها ويقوم هو بالعمليه لها والحمد لله هى بخير والموضوع كان بسيط
بفضل الله بس ما لمستته من هنا وأختها واخوها وانا ايضا خوفنا الشديد من كل شئ وذلك لما نعايه من
حاله اضطراب وعدم الاحساس بالأمان لعدم وجود الأب والزوج الذى نحتمى به
دائما وأبدا أتذكر تحذيراته لى عند السواقه تابعى الماء ولا تنسى الزيت كل 10000 كيلو وانتي مسافرة
ماتو قفیش لحد

اقفلى اللوك وانا أقوله هبقى اكلمك لو حصل حاجة تجبلى والزيت ابقى فكرنى وكل ما أروح مشوار
يرسملى الطريق واول مرة أسافر اسكندريه معانا على التليفون يسأل يمنى السرعه كام وأما تقوله
120 يز عق ويقولها قولى لماما تهدي شويه وامشى فى اليمين مفيش حد بيتابعنى وانا مسافرة يا مصطفى
فعلا ببقى خايفه وأحاول اتغلب على خو فى قدام العيال. رحت اغير زيت امبارح مش عارفه الفرق بين
موبيل وتوتال وناس تقول دى احسن وناس العكس كان هو إللى بيقولى وخلص
رجاء لكل مسؤل عن اخفاء مصطفى العقاب ليس لمصطفى فقط بل لى ولاولادى ممكن يكون عقابه على
إللى انا مش عارفاه يكون على فى محكمه وقضاء ولو سجن بس نشوفه ونتواصل معاه
قمت بإرسال برقيه لرئيس الجمهورية للتدخل في موضوع مصطفى وإجلاء مصيره دون جدوى
الرجاء النظر في الموضوع من الجهات المختصة وإجلاء مصير مصطفى بل إجلاء مصيرنا نحن ورجوع
الحياة لبيتنا ورجوع الأمان لقلوب اولادى
اسفه للاطاله ولكن هذا متنفسى للتعبير عن ما نعيشه فى غياب مصطفى
واعلم أن هناك الكثير مما يعانون مثلنا ولذلك لا أنسى حد فى دعائى اللهم فرج كرب كل المكروبين

<http://bit.do/e3D7X>

والدة إبراهيم عز الدين

أنا مش بنام، قاعدة طول الليل والنهار قدام البيت منتظرة أن إبراهيم
يدخل عليا.
عارفة أنه مظلوم ومعملش حاجة، وأن ربنا عدل وأن اللى خدوه هيتأكدوا
إنه معملش حاجة فهيسبوه
بس اتاخروا أوي
#إبراهيم_عز_الدين_فين؟
#المفوضية_المصرية_للحقوق_والحریات
#الاختفاء_القسري_جريمة <http://bit.do/e3D9u>





آخر حوار دار بين سميه ماهر وصديقتها قبل ماتخرج من السجن!
تعبت جدا فوق ماتتخليلي ، نفسي ارجع لماما واهلي نفسي اروح بيتي ،
عارفه يعني ايه لما اتعب اكون لوحدي نفسي في اللحظة دي اكون في
حضن امي...

ماما كانت دايمًا تقولي نفسي اشوفك بالأبيض تخيلي الأبيض بتاعي يبقى
سجن اتحرم فيه من ماما خالص، عارفه كمية الوجع اللي بحسها وامي
بتنادي وانا حتى مش قادره ارد عليها؟! عارفه لما تصرخي وتقولي
ياماما بحس ساعتها بقهر السنين...

ادعلي نفسي احضن ماما تاني نفسي انام علي سريري تاني نفسي اشوف بابا وأخواتي وزوجي...
-سميه ماهر حزيمة تم القبض عليها يوم 17 اكتوبر 2017 من منزلها بدمنهور و اتهمتها النيابة
بالانضمام لجماعه اسست على خلاف القانون وارتكاب سلوك من شأنه الاضرار بالامن القومي للبلاد في
القضيه رقم 955 ، تم منع المحامين من التواصل معها مدته 67 يوما ، تم احتجازها في مقر المخابرات
وهو غير قانوني وبغرفه انفراديه بها كاميرا ، ممنوعه من الزيارة والتواصل مع ذويها منذ القبض عليها،
تم ترحيلها مؤخرا لسجن القناطر... ادعو لسميه ماهر

<http://bit.do/e3Eqy>

1 أغسطس

عن معتقلي الأمل: زياد وحسام وهشام

-زياد العليمي عنده مجموعة امراض ابسطها السكر والضغط والقرحة واطرهم مرض نادر في المناعة
-هشام فؤاد عنده آلام في المفاصل، ومؤخرا جاله خراج تحت الضرس
_حسام مؤنس عنده متاعب في العمود الفقري
_احمد تمام عنده القلب

الناس دي كلها لها عنوان اقامة معروف ومحل عمل معروف، يتحبسوا احتياطي ليه؟
ما تشتغلوا كده وتدوروا وراهم، ولما تبقوا ترسوا لهم على تهمة وأدلة وكده تبقوا تقبضوا عليهم
وتحاكموهم!! واللا سلاح الحبس الاحتياطي بقى مسلط على أي حد يفتح بقه، ويتركن وينعزل ويتحرم من
أهله الى ما شاء الله من غير توجيه تهمة رسمية ولا ادلة ولا احراز؟ ولا متوقع اصلا يحالوا لمحكمة
عشان مافيش قضية الا في الاعلام وعلى السنة المطبلائية البهايم اللي بيرددوا بغباء أي زبالة تترمي في
دماغهم من اعلام العار؟

<http://bit.do/e3Egy>

عن شادي أبو زيد

فوق السنة وتلت شهور .. اكثر من ١٥ شهر .. ٤٥٣ يوم .. ١٠ الاف
٤٣٦ ساعة في الحبس الاحتياطي.
من حوالي سنة ونص أسرتنا كلها عايشة في كابوس مبينتهيش
والعداد بيعد من ٦ مايو ٢٠١٨ لحد يومنا هذا ويا عالم هيقف امتي .
قرارات التجديد قد تكون بالنسبة ليكم "ورق وإجراءات روتينية"
بالنسبة لنا شهور عذاب وأيام طويلة وساعات ودقائق مبتعديش ..
مناسبات وأعياد عمالة تيجي وتعدي علينا واحنا محرومين من
الفرحة .



شادي محبوس علي ذمة قضية "أمن دولة" (مش في قضية فيديو عيد
الشرطة، ولا حبسه -رسمياً- له علاقة بيه زي ما ناس كتير فأكرة) من

حوالي سنة ونص، بابا حالته الصحية اتدهورت ومات من حسرته علي شادي من غير ما يشوفه ولا
يودعه ولا يتظمن عليه ولا علي ماما وعليانا مبقناش لوحدنا بعد ما مبقناش حد غير شادي، سنة ونص
وماما بتتعب كل يوم اكثر من اللي قبله وقلبه مش مستحمل القهرة علي ابنها اللي حالته النفسية والصحية
في تدهور مستمر غير تعب وبهدلة الزيارات كل أسبوع واحنا بنقف في الشمس بالساعات عشان نشوف
شادي من ١٠ دقائق ل ٢٠ دقيقة.

عيد الاضحى خلاص قرب وشادي عنده جلسة قريب وكلنا امل انه يخرجنا ونرجع نفرح تاني بعد شهور
عذاب وبهدلة مستمرة .. ارجوكم متنسوش شادي من دعواتكم .. شادي شاب مصري وطني زي اللي
بتتكلّموا عليهم في مؤتمر الشباب وميسناهلش ولا احنا نستاهل اللي بيحصل فيه و فينا من اكثر من سنة ..
واذا كان غلط فهو اتعاقب اضعاف العقاب المقرر قانوناً .. دعواتكم لشادي ولينا ان ربنا يفك كربه ويرجعه
لينا بالسلامة ويعييد في وسطنا ويرجعلنا ضهرنا اللي بنتسند عليه .

<http://bit.do/e3LSb>

عن خالد بسيوني

خالد أترحل الآن علي تخشيبية الخليفة لأن محضر قسم بولاق التابع له خالد و المفترض إجراء اخلاء
السبيل من هناك بعث مذكرة لترحيلات الجيزة بأن خالد لايسكن ف الدائرة و لم يستدل علي عنوانه ، برغم
أن الشرطة جانت الي بيت خالد لمعرفة ما أن كان ب الفعل تابع للقسم أم لا و تأكدو من أن خالد يسكن في
فيصل من ٣ سنوات و أكد أهالي المنطقة و سكان العمارة ذلك .. لكن رئيس المباحث قدم المذكرة أنه لم
يستدل علي مكانة.

خالد الآن في تخشيبية الخليفة في أنتظار ترحيله الي قسم القطامية مرة أخرى لكن خالد ليس له عنوان او
مقيم هناك ف سيقوم بتقديم مذكرة تؤكد أنه لم يستدل علي عنوانه .. و سيبقي خالد في دوامة
العنوان برغم أن قسم بولاق يعرف خالد جيدا لأنه في كل جلسة تجديد كان يذهب للقسم.

خالد يواجهه خلال أيام مصير السجن مره اخري اذا ظل في هذه الدوامة المقصودة .. سيُقدم الي المحكمة في جلسة التدابير اللتي سنتعقد خلال أيام أن خالد ليس تابع لقسم وليس له عنوان مقيد و حينها سيستبدل التدابير ب الحبس الاحتياطي . لكن ما ب اليد حيلة أنها اوامر عليا

<http://bit.do/e3LN7>

3 أغسطس

زوجه الشهيد علي غنيم:

من ست سنوات كانت دعوتي في شهر ذي الحجة أن يظمني الله على زوجي هل هو شهيد ام حي في السجن ، كنت ليل نهار اقسم على الله أن يقر عيني به عاندا إلينا...
في اليوم الثامن من ايام ذي الحجة اتصلت علينا مشرحة زينهم وبلغتنا بوجود جثمان زوجي ضمن ال58 جثه المتفحمة واخوا زوجي كتم الخبر لحين التأكد بنفسه ، كنت حاسة ان زوجي راجع قريب ، كنت بدعي وكلي يقين أنه أت باذن الله ، بالفعل كان زوجي ضمن الجثث المتفحة في ميدان رابعة التي تعرفنا عليها من خلال تحليل ال..DNA
عاد زوجي إلينا كما كنت ادعي...
عاد إلينا جثة بعد شهرين ويومين من الفض....
عاد إلينا شهيدا كما تمناها...

وحشتنا يا علي!

#ذكريات_مؤلمة

اللهم كما رددت إليها زوجها في هذه الايام ارزقها فرحة تنسيها هذه الذكرى المؤلمة يارب...

<http://bit.do/e3LE9>

والدة الشهيد محمد مدحت ناصر تكتب:

زي النهاردة من 3 سنين وبعد العصر جه أمن الدوله عندنا البلد عشان يقبض علي محمد انتظروه اول البلد لانة تقريبا كان بيخرج في الوقت

دا(١)

والدة بعته يجيب طلب من المعمل ومسكوة وهو ماشي وهو فلت منهم

وجري وضربوا عليه نار(٢) وفضلوا يدورا عليه في البيوت القريبه

ولما عرفت طلعت فوق السطح لقيتهم علي سطوح الجيران بيدورا

عليه(٣) ولقيت نفسي بقول وجعلنا من بين ايديهم سدا ومن خلفهم سدا

فاغشيناهم فهم لا يبصرون واكرر نفس الايه والحمد لله ربنا عماهم

عنه ومشيو(٤) وخرج من البلد يومئها وجه في العيد الكبير وفضل

معانا يومين ومشى وما رجعشي تاني(٥) ومن محافظه لمحافظه وبعدين قرر أنه يسافر عشان يكمل

دراسته كان بقبيله سنه في كلية تجارة واتقبض عليه علي الحدود وتاني يوم صفوة هو والمجموعة ال

معاه(٦)(٧)(٨) ورجع البلد وهو شهيد باذن الله وبعد ماكان شعلة نشاط بقي ذكريات صورة علي الموبايل



او علي الجدار (٢) وبعد ما كان بيشتغل وهو مش محتاج الشغل بس كان بيحب بلده بلده ال بتقتل كل انسان بيحبها (٣) ان شاء الله حقك راجع يا محمد (٤) وحسبي الله ونعم الوكيل في كل ال حرمني منك يا محمد
<http://bit.do/e3LJC>

4 أغسطس

عن شادي أبو زيد

تعديل: اتبلغنا دلوقتي ان جلسة شادي اتأجلت لتعذر نقل المتهمين... لسة مش عارفين هتبقى امتي بس احتمال كبير تبقى بكرة او بعده اول ما اتأكد هكتب... استمروا في الدعاء لعل التأجيل دا خير وربنا بيدينا وقت اكثر ندعي فيه .. يارب شادي يا رب .. عرفنا دلوقتي ان شادي جلسته بكرة ان شاء الله .. شادي كدة بقاله فوق ال ١٥ شهر يعني داخل في سنة ونص محبوس احتياطي علي ذمة قضية مالوش دعوة بيها .. مش عايزة اتكلم في ظروف حبسه ولا في وضعه القانوني، كل اللي طالباه منكم من فضلكم في الايام المفترجة دي ادعوا لشادي ربنا يسترها معاه ومعانا بكرة ونسمع اخبار كويسة .. ادعوا له علي الفطار وادعوا له في كل وقت ووصوا الناس اللي في الحرم تدعيه .. معندناش واسطة غير ربنا ومفيش في ايدينا حاجة غير الدعاء متخلوش علي شادي وعلينا بيه .. ادعوا له ربنا يفرج همه ويخرجه بالسلامة في جلسة بكرة عشان يعييد معانا ونقدر نفرح بعد حوالي سنة ونص من الحزن بس .. أملنا في ربنا كبير قوي وإيماننا قوي انه هيستجيب ان شاء الله .. يارب شادي .. يارب شادي .. يارب شادي .

ملحوظة : انا مقدرة جداً مشاعركم وخوفكم علي شادي ورغبتكم انكم تتطمئنا عليه وأول ما اعرف أي اخبار هكتب علي طول مش هستني، فرجاءً محدش يتصل او يبعثلي يسأل علي الاخبار لأن لحد ما بنعرف القرار (يوم الجلسة او بعدها بيوم) حالتنا انا وماما مبتقاش تسمح اننا نتكلم تماماً، مبنقدرش غير اننا نستني مكالمة المحامين وقلوبنا بتقف مع كل رنة تليفون .. شكراً لتفهمكم وربنا يديمكم نعمة في حياتنا.

<http://bit.do/e3Vm5>

عن مصطفى ماهر

احوال مصطفى هذا الاسبوع. إدارة السجن بتكس الناس في الزنزانة اللي فيها مصطفى. رغم انها زنزانة صغيرة سينة التهوية. والمياه مقطوعة طول اليوم. والمجاري طافحة طول الوقت داخل وخارج الزنزانة. والكهرباء بتقطع. وإدارة السجن متجاهلة الموضوع تماماً رغم الشكاوي ورغم ظهور امراض جلدية وأمراض التنفس في الزنزانة وفي العنبر كله. <http://bit.do/e3VFx>

عن هشام فؤاد

هشام فؤاد ببسلم عليكم وبيشكر كل حد وقف معنا فى ازمئنا وببطنكم عليه الحمد لله آلم السنان خف شواية بعد ما اخذ المضاد الحيوى ومنتظرين زيارة دكتور الاسنان اللى هيكشف عليه وكمان فى انتظار عرضه على دكتور جلدية استشارى لتحديد نوع الاصابة اللى بيعانى منها بعد تصريح طبيبة السجن بانه بحاجة للعرض على استشارى لشخيص الحالة ...

<http://bit.do/e3VTN>

6 أغسطس

عن زياد العليمي

زياد ببسلم عليكم كلكم وقلت له ان كل الاصدقاء اللى رايعين يحجوا، قالوا لي انهم حيدعوا له واصدقاءكثير بداوا صيام السيدة العذراء قبله باسبوع ندر عشان فك أسره. وكان ممتن جدا للجميع، وبيقول لكم جميعا كل سنة وانتم طيبين. زياد ورفاقه ما شافوش الشمس من ٥ ٤ يوم، وبعد 17 يوم من حبسهم بقوا يسمحوا لهم بالخروج ساعة من الزنزانة الضيقة يتمشوا فى ممر ضيق بعيد عن الشمس.. كانت النتيجة ان اسنانه هو وهشام فؤاد اتاثر، هشام أصيب بخراج تحت الناب ويجري علاجه وزياد طلعت سوسة فى ضرسه وتم حشوه.. مازال زياد بانتظار نقله لمستشفى به جهاز أشعة بالصيغة لمتابعة تطور مرض صدره وجهاز رنين مغناطيسي عشان ركبته اللى سبق ازالة غُضروف منها نتيجة التعامل الأمني العنيف معه فى احدى مظاهرات الجامعة.. اخيرا دكتور مستشفى طرة قال ان زياد أصيب بخشونة فى الركبة، وطلب سوال أطباء عن علاج لخشونة الركبة

<http://bit.do/e377Z>

7 أغسطس

عن زياد العليمي

اشهد انني عرضت حالة زياد العليمي سنة ٢٠١٤ على الدكتور طوبي مهر استشاري الأمراض الصدرية فى مستشفى البرومتن اشهر و اكبر مستشفى لأمراض الصدر والقلب فى لندن، هذا ولقد اكد تشخيص مرض السركويدوزنز ونصح بعلاج معين له. زياد بقاله ٥ ٤ يوماً رهن التحقيق دون العرض على أخصائي فى الأمراض الصدرية على الرغم من حساسية حالته. نحن والجميع كلنا أمل اللا يطول هذا الحبس الذى لا يمكن تفسيره الا بانه عملية تأديبية لهؤلاء الذين يسعون للعمل العام فى إطار القانون والدستور.

د. حسام عبد الله. <http://bit.do/e38eq>


8 أغسطس

عن زياد العلمي

كلمتي صديقة الصبح وقالت ان فيه دكتور قال لها ان خشونة العظام اللي عند زياد لها علاقة بمرض المناعة اللي عنده في الرئتين(الساركودوزيس)!!.. وطبعا مع نقص التهوية وظروف الحبس الإجرامية ، طبيعي يبقى فيه تداعيات!! واضح ان مافيش امل في أي جهود بتتبدل، ولا التقارير الطبية اللي راحت للنائب العام حد التفت لها، ولا المركز القومي لحقوق الانسان له تاثير، ولا نقابة المحامين عندها استعداد تعمل منظر، ولا حد عنده دم في البلد دي، لان فيه نية زي ما زياد بيقول لقتله بالبطي.. اللي ماعرفوش يعملوه بالخطف، بيحاولوا يعملوه بحرمانه من العلاج.. زياد محتاج شباك يتنفس!! ما تنسوش تدعوا لزياد ورفاقه، وتكثفوا الدعوات على المجرمين اللي حارمينه من حقه في استنشاق هوا نضيف. <http://bit.do/e38ho>

10 أغسطس

عن عمرو محمد عمر



"عمرو محمد عمر" مختفي قسريا من يوم ٨ يوليو الساعة العاشرة مساءً من محطة قطار أسيوط من قبل قوات أمن لابسين زي مدني،..

عمرو طالب في كلية الهندسة بالجامعة الروسية! وهذه روايه والده على ما حدث:

يوم 8 يوليو 2019 سد 10 مساءً كنا رايعين لقرابيننا في أسيوط قبل وصول المحطة بدقائق كان ببشوفني محتاج اي حاجة يعملها لي لأني عندي شلل نصفي وقعيد على " كرسي متحرك" لا أقدر على المشي والحركة ابدأ ولازم حد يساعدني ومش معايا الا ابني عمرو هو اللي بيساعدني ، و ابني الثاني توفي من ٧ أشهر.. كان لسه بيكلمني عشان نجهز نازل من القطر لقي مجموعته محاطينه وخدوه وكلبشوه وغموه ونزلوا

فضلت ادور على حد يساعدني انزل من القطر لان لازم حد يشيلني عشان الكرسي ونزلت وانتظرت قطر الرجوع وكلمت بنتي ف جاتلي محطه القطر في الجيزة انتظرتني ومجرد وصولي المحطة ولسه بنتي هتجيلي عشان تنزلني من القطر لقيت مجموعة محاطيني انا وبنتي.

خدوني انا وبنتي على قسم الجيزة،

مشيو بينا في الشارع وهما و واحنا بنعدي قضبان القطر شالو والدي بالكرسي وقعوه على الأرض وشالوه تاني علي الكرسي المتحرك ومشينا لحد القسم وقعدنا تحقيق من سد 4 فجرًا للساعة 7 ونص صباحًا تقريبًا وقعدوا يسألونا على مكان عمرو رغم انهم لسه واخدينه من ٦ ساعات وانكروا انهم اخدوه، وخلصوا تحقيق معانا وطلعونا وروحنا وتاني يوم راحوا بيتنا يدوروا عليه على اساس ينكروا انه مش

معاهم <http://bit.do/e4mZ8>

خطبة أحد المعتقلين



انا اول مره النهارده اشوف اهالى المعتقلين بيعيطوا وبيفتحوا فى العييط واحده ورا التانيه..
مش بسبب ظروف الزياره الصعبه بس والتشديد الجديد ع السجن .. لا بسبب انهم خلاص جابوا آخرهم
حرفيا .. طاقتهم خلصت..
الجنايين يدخلوا زياره اولى وتانيه ويسجلوا لحد الساعه 12 ! واحنا تسجيلنا اخره الساعه 8 الصبح
وندخل زياره ثالثه
الجنايين احكامهم تلت سنين او خمس سنين والسنه باربع شهور واقلب وخرج عفو وخرج نص مده
ونسلم زغاريط ايه ده عفو الجنائي خارج واحنا قاعدين..
والسياسي اقل حكم فيه 10 سنين والسنه ب 12 شهر عادي ولافى عفو ولا نص مده ولا اى نيله ومرمين
جثت جمب بعض بيتنسوا بمرور الزمن..
قاعدين لحد ما رجلينا نملت وضغطنا نزل ف الارض واللى ترجع واللى مش عارفه تاخذ نفسها ..
اكثر من 12 ساعه متواصل قاعدين على مصطبه خرسانه فى قاعه ريحتها حمامات اعزكم الله لان حمامات
القاعه طافحه فيها
العدد قليل مايستاهلش كل الوقت ده .. تاني زياره جنائي عددهم ماجيش ال25 واحد .. مادخلتناش معاهم
ليه ! .. سايبنا مرزوعين كده نتدل وخلص ونفر فرم الحر...
ف الاخر بيدنوا يندھونا الساعه خمسه ويمنعوا كل الاكل والهدوم ماعدا الاكل المطبوخ وشوية فاكهه
لا الشنط دى ماتدخلش .. لا اشتروا شنط السجن من الكانتين .. لا سيبوها واحنا ندخلها .. واستعباط وتغيير
نظام ع الفاضي وخلص .. تفتيش ذاتي عامل زى التحرش بالظبط .. واحده ايديها ماعندهاش خطوط
حمرا.. كله مباح..
انا راجعه م الزياره مقهوره .. واتقهرت اكثر لما فتحت وافتكرت من بوستات الناس ان النهارده مفروض
عيد ..
انا مش عارفه ليه بنسيب سيف هناك ونمشي .. انا مخي بيعمل error ف الاوقات دى وفعلنا ببقى مش
مصدقه اننا بندخله ورا البوابه وبنسيبهم يفتلوا عليه..
انا محبطه ومش شايفه بصيص امل .. ولو ماحدثش بدأ يتحرك ويعمل اى حاجه يخرج بيها الناس دى من
جوه ف خلاص كده كله يسلم بان كل واحد جوه هيقضى مدته ..
لسه بنت كتبالي كومت ع البوست اللى قبل دهوانها فضلت 15 سنه تروح الاعياد فى السجن ! ايه اللي
يمنع اننا نقضي مدتنا برضه !?
وياريت ماحدث يكلمتى عن الصبر وحسن الظن بالله والفرج اللي هيجي فجأه عشان مازعلكوش ..

ربنا ما بينصرش سذج ولا دراويش ولا متخاذلين
ربنا يصبرنا على ما ابتلانا سواء فى اللي مننا أو اللي ضدنا
ربنا يرحمنا والله ربنا يرحمنا
انا مش عارفه مفروض اعمل ايه عشان الناس دى تخرج من جوه .. ولو فى ايدي اى حاجه حتى لو اننا
نرجع مليون خطوه لورا كنت عملتها ..
سامح الله المتمسكين بالاوهام..

<http://bit.do/e4wqK>

12 أغسطس

(النهارده زوجي كمل سنه اختفاء قسري ، انا بس نفسي اعرف مكان زوجي ، زوجي معملش حاجه
علشان تخطفوه مني وتخفوه عندكم سنه معرفش عنه اي حاجه ، حتي لو في نظركم كان عمل حاجه
حكموه لكن ليه تخفوه كل الوقت ده)! <http://bit.do/e4wsy>

14 أغسطس

عن عمر حماد

النهارده عمر حماد بيكمل 6 سنين اختفاء قسري ، اخر مكالمه كانت
بينه وبين اخته :

جهاد : انت فين يا حبيبي فيك حاجة يا عمر؟! اتصابت ولا
حاجة!؟

عمر: انا كويس يا جوجو بطلى عياط علشان خاطرى
-جهاد : عشان خاطرى انا يا عمر ابعده عن الضرب والرصاص

مش عايزاك تموت علشان خاطرى يا عمر

-عمر : متخافيش يا حبيبتى مش هموت بس بطلى عياط
متوجعيش قلبى اكره م كده ..

-جهاد : بالله عليك يا عمر خلى بالك من نفسك ، واوعدنى انك
ترجع

-عمر : ان شاء الله يا حبيبتى هرجع ، ادعيلنا بس خلى بالك ع

نفسك يا جوجو وخلي بالك عليهم.....

-جهاد : عمر . يا عمر..

-عمر : جهاد انا لازم اقفل ف شهداء ومصابين كتير وانا بنقلهم للمستشفى هحاول اكلمك تانى ..

-جهاد : عمر .. ! استودعك لله يا عمر

اما عن والدته فكتبتله : (ابني حبيبي كان مغني راب وحارس مرمى في نادي الزمالك ، ابحت عن ولدى
ضنايا حته منى ومن روجى دقت الامرين لم اترك باب الا وطرقته ولكن ولا حياة لمن تنادى اقول لمين انا
عايزة ولدى اتسند عليه ، انا ع يقين ومتاكدة ان ابني عايش حى يرزق موجود ، قلبى ينزف دما ولا زلت



اخرج من منزلي يوميا ابحث عنه واقدم طلبات وشكاوى ، انا حاسة بيك وعارفة انك برده بتناجيني وحاسس بيا ، ا خواتك بيقولولي عمر راجع ياماما قريب)!
-اما عن والده (دورنا في كل مشرحه في مصر و كل سجن عسكري او مدني و كل مستشفى و دورت بين الجثث ، كل مايجييو هدوم يخليهم يجيبو لعمر ويقول عشان لما يرجع يلاقي هدوم يلبسها ويعرف اننا منسنا هوش واننا كنا واثقين انه راجع)..
السؤال هنا؟! ليه عمر يختفي 6 سنين ! لو عمر عنده اي تهمة اظهره حاكموه عليها ! كفايه اختفاء قسري بقي كفايه!

<http://bit.do/e4Kod>

15 أغسطس

عن انتظار الزيارة

في الحر الصعب ده، وقفنا ساعتين على باب السجن مستنيين زيارة زياد!!.. النهارده اول يوم بعد اجازة العيد، فكان فيه زيارات كتير!!.. ندهوا علينا الساعة ١١ ، وفضلنا واقفين لغاية الساعة واحدة على ما دخلنا، الحرس اللي عالباب يا دوب وافقوا يدخلوا نديم من الباب، حماية له من ضربة الشمس!! واحنا فضلنا عالباب لغاية الزيارة.. واحنا واقفين خرج جثمان متوفي من السجن، وطبعا نديم فهم انه عيان وبيحطوه في عربية الأسعاف ..(باعتذر، الموقف والحر - وأشياء أخرى - مش سايبين عندي قدرة على التعبير.. ربنا يكون في عون اللي في الزنازين ومحتاجين نسمة هوا يتنفسوها

<http://bit.do/e4KkR>

17 أغسطس

عن شادي أبو زيد

في الوقت اللي المفروض نكون فيه زي كل الناس زعلانين إن الاجازة خلصت وهرجع سحلة الشغل والروتين تاني .. احنا بنعد الساعات والدقايق والثواني واللحظات عشان الاجازة تخلص من قبل ما تبدأ عشان نتظمن علي شادي ونعرف هيحصل معاه ايه في جلسة بكرة ..

أملنا في ربنا كبير قوي ان جلسة بكرة تبقي الأخيرة، خاصة ان معظم الناس اللي في قضيته خرجوا خلاص، أملنا كبير قوي ان الكابوس دا ينتهي بكرة ونرجع لحياتنا الطبيعية تاني انا وماما وشادي في وسطنا .. من ٦ مايو ٢٠١٨ لحد انهاردة حرفياً معداش علينا يوم حلو غير المرتين اللي شادي خد فيهم اخلاء سبيل وللأسف بعدين اتلغي .. دعواتكم معنا ولينا ربنا يفرجها علي شادي وعلينا ويفك الكرب ويرده لينا .. يارب شادي .. يارب



شادي .. يارب شادي .
سنة و ٤ شهور .. حوالي ١٦ شهر .. ٤٦٧ يوم .. ١٠ الاف ٧٩٦ ساعة في الحبس الاحتياطي ..

#شادي_كوميدي_مش_مجرم

#شادي_ابو_زيد

ملحوظة للأصدقاء: كل جلسة انا وماما بنبقي في حالة سيئة جداً وغير قادرين علي الكلام وكثير قوي مبيبقاش عندنا أي معلومات اصلاً عشان نطمئناكم بيها وللأسف الوضع دا غالباً بيستمر لحد يوم الجلسة بليل أو تاني يوم لما بنتبلغ بالقرار، فرجاءً فضلاً وليس امراً، استنوني لحد ما أكتب أول ما اعرف أي حاجة لاننا بنتنفض مع كل رنة تليفون علي أمل انه يكون المحامي وعنده أخبار .. اعذروني بس حقيقي بيكون يوم صعب جداً ربنا مايكتبه علي أي حد أبداً.

<http://bit.do/e4NGd>

عن زياد العلمي

ربنا ينتقم منهم!! .. ويكتم نفسهم ومايعرفوش ياخدوا نفسهم!! للمرة المليون يتم رفض ادخال المروحة للسجن !! كمية الحجج والعراويل اللي بيتحججوا بيها محتاجة مخ سادي مجرم عشان يتفنن في حجج تحرم الأبرياء من حقهم يتنفسوا نسمة هوا! يعني المجرمين اللي نهبوا البلد وسرقوها ومصوا دم ولادها يوم ما دخلوا السجن قعدوا في زنازين خمس نجوم ومكيفات و تلاجيات! وشباب عندهم امل بلدهم يتصلح حاله وتبقى زي بلاد العالم المحترمة، يتحرموا من نسمة هوا ومن ضوء الشمس؟

اللهم انتقم! اللهم انتقم! اللهم انتقم!

بقالي شهرين مش قادرة اشغل مروحة في بيتي، وباقوم بالليل اكرر من مرة أغير الملاية وكيس المخدة وهدومي اللي بنتعصر من العرق، رغم ان عندي على الاقل شبابيك بتدخل هوا.. او مال ايه حال الجدعان اللي محرومين حتى من شباك يدخل لهم هوا ربنا؟

كان نفسي يدخل لهم مروحة النهارده عشان اقدر اشغل مروحة في بيتي !
ربنا يزيح الغمة بقي وبلدنا كلها تننفس، وينتقم من المجرمين ومن المطبلاية الشمتانين، ويجربوا كتمة النفس وازمات التنفس لغاية ما ينقطع نفسهم.

من فضلكم، كتفوا دعواتكم ربنا ينجي بلدنا من المجرمين، وينتقم منهم!

<http://bit.do/e4NFL>

تابع: عن زياد العلمي

الاول .. حاولنا ندخل مروحة، ووالدة حسام جابت شفاط، رفضوا ورجعونا بيهم!! .. وبعدين، حاولنا ندخلها عن طريق نقابة الصحفيين، باعتبار النقيب له دلال عالجماعة وكده! ولا عبروا النقابة ورفضوا دخول الحاجات!!

(طبعا ماחדش يسألني عن موقف نقابة المحامين)

في الزيارة اللي بعدها، قالوا ممكن ندخلها عن طريق جمعية خيرية، يكون ضمن أنشطتها رعاية المساجين، راحت والدة حسام جابت جواب من جمعية خيرية، وراحت توصل الحاجات في الزيارة، رفضوا وقالوا لازم جواب الجمعية الخيرية ناخذ عليه تصريح من مصلحة السجون، وكان العيد دخل، فقالوا بعد اجازة العيد!

النهارده والددة حسام كانت رايحة الزيارة ومعها جواب الجمعية الخيرية وجواب مصلحة السجون، وكان عندنا امل الحاجة تدخل، رفضوا وقالوا لازم مصلحة السجون تبعت موافقة رسمية بالبريد!! ولما يوصل الجواب نبقى ندخل الحاجات!! يعني فيها عالاقل ١٥ يوم كمان، على الاقل!! يعني تقريبا يكون الصيف بيخلص !!

اللهم انتقم!.. اللهم انتقم!.. اللهم انتقم!
ما فيش في ايدنا غير اننا ندعي ربنا ينتقم من المجرمين، وينجي ولادنا، ويزيح الغمة عن بلدنا.. من فضلكم كثفوا الدعوات!!

#الحرية_للأمل
#الحرية_لكل_سجناء_الرأي
#الحرية_لمصر_المحبوسة
يادولة الظلم انمحي وبيدي
<http://bit.do/e4NF6>

عن معتقلي الأمل

53 يوم حبس في زنزانة تأديب شديدة الضيق دون تهوية في عز الحر، تكدير للأهالي برفض استلام مروحة او شفاط هواء سخن زي ما تنص لايحة السجون وجرهم لحلول شبه وهمية ، عصف بحق نقابة الصحفيين مش بس في انها تدخل احتياجات اعضاءها.. لأ بانها من الأصل تطلب إخلاء سبيلهم بضماناتها.



النهاردة كانت الزيارة الخامسة لأسرة "حسام مؤنس" وتم رفض استلام المروحة كتبرع من جمعية أهلية رغم حصول اسرته ع موافقة من مصلحة السجون، وطالبوهم يسلموها للمصلحة وهي تبعتها ميري بالبريد خلال ١٥ يوم!!
حسام وزياد و هشام زي غيرهم ..مطلوب تكديرهم وتحويل أيامهم عذاب يمكن لما يخرجوا يتوبوا عن اللي مؤمنين به، يمكن ينكسروا ويبطلوا معافرة يمكن ويمكن لأ ، لكن الأكيد وفي الآخر لا يصح إلا الصحيح، من أول أن الحر يخلص لغاية أن سلطة الظلم تزول

اه العمر بيمر ،، اه الصحة بتتدمر ..اه الأمل اوقات بيذول لكن في الآخر الظلم لازم آجلا او عاجلا ببيجي له هو كمان يوم ويغور ... و دايمًا هايلاقي اللي يقف له النهاردة بتحرموهم من النفس، وفي نفس الوقت بلد كاملة بتتنفس الصعداء بعد ما قدرت ثورتها تاخذ خطوات عنا، وشاب زيه زيههم باسم الحرية والتغيير وقف يوجه شكر وعرفان لهم ولكل شباب الثورات العربية
القصة ما بتخلصش..

<http://bit.do/e4NMb>

عن أحمد أبو طالب

زوجي العزيز يعلم الله مدي صعوبه فراقك ولكني عاهدت الله
وعاهدتك اني علي العهد وطريق الحق ما حييت فايظمنن قلبك
نحن بخير ما دمت انت بخير
اعلم ان معنا مدبر الامر هو مولانا وهو من يتولانا ليس لنا غيره
الله وحده يتولانا ويتولاك الله وحده يعلم ما في قلبك وانت في مكان
لا يعلمه احد غيره
الله وحده يعلم قلقك وخوفك وهو اجسك وانت لا تعلم عنا ما يصبر
ويظمنن وحشتك



٢٠ يوم ونحن ننتظرك علي اجر من الجمر بعد اخلاء السبيل
١٦ يوم وانت مختفي ما اقساها الحياة وانت بعيد عن نضال و عن ي اسأل الله ان يريدك الينا سالما غانما
عاجلا غير اجل
فضلا ادعوا لاحمد
#احمد_ابوطالب_فين
#الحرية_لرفيق_دربي
#لا_للاختفاء_القسري
<http://bit.do/e5bJk>

عن ا. هدى عبد المنعم

ماما اتجدد لها ٤٥ يوم كمان ..
حد يقولي كدة احنا عايشين ليه من غيرها اصلا؟!
اه افكرت امن الدولة جم خدوها من البيت من غير اي
تهم لا وخفوها ٢١ يوم و لما ظهرت حرمونا من الزيارة
!
انهي قانون في انهبي بلد بيقول اننا نفضل ١٠ شهور
منشفش امنا؟! امنا يا ناس امنا .. مامتنا يعني!!!!
#الحرية_لهدى_عبدالمنعم
<http://bit.do/e45hz>



20 أغسطس

عن جميلة صابر

#جميلة_صابر --> بنوته مصرية، عندها ٢٩ سنة، جامعية (ليسانس آداب)، ظهرت في نيابة أمن الدولة يوم ٤ مارس ٢٠١٩، ومحتجزة حاليا في سجن القناطر من ٧ شهور ع ذمة قضية سياسية.
#جميلة جالها جلطة أثرت على كلامها ومشيتها و حركة يدها ووجهها.
#جميلة حكّت لأختها : إنها اترمت في أرض مستشفى سجن القناطر لمدة ٣ أيام وكانت بتعض في الأرض من شدة الألم، ومكنش في حد حاسس بيها ولما حاولت تشتكي عاملوها أسوء معاملة.



ولما أختها طلبت تشوف تقرير المستشفى قالوها مش من حقك، ده خاص بينا وأختك أصلا جاية كده.
#جميلة من فترة صغيرة كان عندها جلسة، وأثناء الجلسة فضلت تنزف من فمها لدرجة هدوم باقي المعتقلات الي كانوا ماسكينها اتغرقت دم وكذلك أرضية النيابة، ومكانتش قادرة تقف على رجلها، وجه وكيل النيابة بكل بساطة بعثها وقالها مالك؟ انتى تعبانة؟
متخافيش الي عندك ده نوبة صرع عادية وهتبقى كويسة، تلاقى بس عضيتى لسناك، أنت مش عارفه ان بيجيلك صرع؟ مخلص العلاج معاكى ليه عشان تاخديه، وبعد كده جددلها حبس 15 يوم بكل أريحية.

<http://bit.do/e5bDL>

22 أغسطس

عن المهندس صالح حسين

ابنة المهندس صالح حسين
ابن مدينة الخارجة
المعتقل السياسي في سجن العقرب
لا حول ولا قوة الا بالله انا مش عارفه افرح أن أول مره من 3 سنين اشوف بابا والمسّه ولا انهار من الوضع اللى هو وصله بابا النهارده طول الجلسة مش قادر حتى يشورلى و منزل رأسه كل شويه اقول مالك يشورلى استنى شويه و يقولى بص القاضى علشان ميحسينيش بتعبه مش دا بابا اللى مكنتش بيسكت ويضحك و يطلع و ينزل فى اخر الجلسة قالى انا تعبان مش قادر الشباب قاموا سندوه علشان ينام مستحملتش الوضع و طلبت قبل نهاية الجلسة أن اشوف القاضى الله يكرمه لأول مره يعملها ادانى الأذن فى نفس الثانية قال خلوها تشوف ابوها بابا طلعلى و هو مش مركز معتمد أن حد يمشيه اول ما شافنى حضنته وقعدنا نبكى مع بعض مش



عارفين نتكلم مقلش غير وحشتونى اوى بابا لسه مركب قسطره ولسه فى المستشفى و حالته صعبه اوى
ما بيتكلمش مع حد كانوا الشباب بتموت نفسها معاه علشان يرضى كلمنى و حتى يشاور بس هو مكش
قادر انا عمرى ما شوفت بابا كدا طول عمرى عارفه أن بابا اكثر واحد بيعرف يتكلم مع اى وضع طول
عمره راضى عارف ان كل حاجه لله علطول بيثبت اللى حوليه بس للاسف دلوقتي تعب خالص وضع
مستحيل اقدر اوصفه تعبان جسديا و نفسيا اوى مش عارفه احنا عملنا غلط ايه علشان نوصل للوضع دا
ادعوا لبابا كتير بالله عليكم هو و كل اللى معاه خلاص تعبوا ادعولنا يتفك اسرنا بالعز عاجل غير اجل
ويثبت بابا واللى معاه

#الحريه_للمهندس_صالح

#الحريه_للمعتقلين

#افتحوا_الزياره

#64عسكري

<http://bit.do/e5FV4>

24 أغسطس

عن د. محمد السيد

6 سنوات مضت من ذكرى بغیضة

#اختفاء_ابى_قسرا

فى بدايات القبض عليه يوم 2013/8/24 وهو راجع م عيادته

حبيبي كان هذا اليوم

هو الأسوأ ع الإطلاق بعد يوم مذبحه #رابعة .

حينها لم يمر شهران ع عودة أبى و أمى من أداء مناسك

العمرة ليحدث لنا كل هذا الضجيج

بقلوبنا وحتى يومنا هذا مازال الألم يعصر بنا ويديمى أرواحنا

كل لحظة لا نعلم فيها كيف هو أبى الآن ؟

كيف هى هيئته ؟ أكبرت لحيته أم أبيض شعره ؟ أم احتاج لولده

ليكون عكازه؟

ماذا يأكل هل يعطونه الطعام ؟ !



والأهم هل يعلم أننا فى عام 2019 وانقضى من عمره وعمرنا #6_سنوات_اختفاء_قسرى

هو يقبع فى زنازين تدعى بمقبرة الأحياء ونحن نجول بالمراكز الشرطة والمحاكم والنائب العام

وعمل التلغرافات ومجلس الدولة ومنظمات حقوق الإنسان لعلها تجدى ، والأهم هى جولتنا الحقيقية جولتنا

مع الله

ف وقته سحره نبتهل نبكى حرقه نتضرع ندعوه بكل جوارحنا فوالله لو نطقت جوارحنا لأشعلت من حولها

نارا مما نحمله

بداخلنا من هذه الذكرى الأليمة.

يارب اشتقت اشتقتنا جميعا وما حيلتنا إلا الدعاء ويقيننا برب العباد

ف يارب استودعتك أبى وجميع إخوانه

يارب المختلفين قسرا يارب

اللهم عودة لهم حتى تعود لنا ارواحنا الغائبة
##د_محمد_السيد_فين
##لا_للاختفاء_القسرى

<http://bit.do/e5FYs>

24 أغسطس

حنان بدر الدين

ازاي الذكريات المؤلمة بتفرط من بين ايديك زي حبات العقد وتتوه وسط الزحام... مش عارف تتخلص منها عشان مش عارف تمسكها... هيا حواليك جواك تايهة وانت معاها بتتوه.. لكن بيفضل مكانها شبح اسود في ظلام جوة قضبان هوة اللي معاه مفتاحه وهوة اللي بيقرر يخرج امتي مهما خوفت منه وبعدت.. وقت ما بيقرر ويخرج بيهاجمك بكل شراسة.

<http://bit.do/e5FYM>

25 أغسطس

عن معتقلي الأمل

عشان أريح الناس اللي بتحب تشمت، فبتفتي بجهل وقسوة باعتبار ان محاولات ادخال مروحة للسجن في الجوده، دلع او ترف:

١ (لايحة مصلحة السجون تسمح للمسجون بتأنيث الزنزانة على نفقته الخاصة، يعني فيه زنازين فيها تكييفات وتلاجات وتليفزيونات فاخرة وسجاجيد وكده، وطبعا الحاجات دي عند المسجونين في جرائم الأموال العامة والمسئولين اياهم!! ما بياخذهاش المسجون لما يخرج، فلما احاول ادخل مروحة في زنزانة مخنوقة مافيهاش شباك، واللا والدة حسام تحاول تدخل شفاط، ما بيقاش ترف يتعارض مع حياة السجن، خصوصا ان المعتقلين لغاية دلوقت مش متهمين بتهمة قانونية لها معنى، وما فيش أي احراز او ادلة عند النيابة عشان تواجههم بيها!!

٢ (لائحة السجن تنص على السماح للسجين بالترييض "على الاقل" ساعة صباحا وساعة بعد الظهر في الشمس، وزياد وهشام وحسام لم يسمح لهم الا بعد ١٧ يوم بالخروج من زنزانة ضيقة ما يقدروش يفردوا رجلهم فيها، بساعة واحدة للترييض في الطرقة، يعني يادوب يفردوا رجلهم وبرضه من غير ما يشوفوا شمس!!

٣ (زياد يعاني من مشكلة في ركبته نتيجة ازالة غضروفها، من سنة ٢٠٠٢ بعدما جذبه ضابط من فوق سور الجامعة وهو يحرق العلم الاسرائيلي، فحصل قطع في الغضروف، ونتيجة لذلك لا يمكنه البقاء مدة طويلة في وضع واحد واقفا او جالسا، النتيجة ان زياد لا يستطيع النوم من آلام ركبته من اسبوعين!!!! دا طبعا غير خطر سوء التهوية على صدره اللي تسبب له في أزمة تنفس، طلب بعدها الدكتور نقله للمستشفى فلم يستجب له، وطلبنا نقله لمستشفى فيها أشعة بالصيغة للكشف عن تطورات مرض المناعة في الرئة وجهاز رنين مغناطيسي للكشف على ركبته، وطبعا لا حياة لمن تنادي!!

٤ (هشام فؤاد عنده الام في المفاصل وتعاني زوجته لادخال مراهم مسكنة له، يرفضون دخولها بحجة ان بها مخدر!!)

٥(حسام مؤنس يعاني من الام في العمود الفقري وطبعاً قلة الحركة وعدم التعرض للشمس تفاقم الحالة!!
كده يقدر اللي عايزين يشمتو، يشمتوا وهمه مطمئنين انهم محصنين، وفي أحضانهم اولادهم وضامنين ان ماحدش فيهم ربنا يبنتليه بابتلاءات من هذا النوع!!

<http://bit.do/e5FZw>

عن عمرو عزب محمد

انا والدة الطالب (عمرو عزب محمد) الطالب بالسنة النهائية بكلية
الطب
لقد تم أختطافه وإخفائه قسريا وهو في طريقه إلي كليته يوم
2019/3/3
ألي هذا اليوم لا أعرف عنه شئ ، وقد قمت بعمل الكثير من البلاغات
_للنائب العام
_لوزير الداخلية
_لمنظمات حقوق الانسان
_المحامي العام
ولكن دون جدوي
#عمرو_عزب_فين ؟
<http://bit.do/e5F6X>



28 أغسطس

عن المختفي قسريا محمود عبد اللطيف

فقدك كان أشد محنه على قلبي ليه كل الفتره دي .. ٣٨٢ يوم !!
لو عملت حاجه يحاكموك يسجنوك لآكن ليه يحرمونني منك كل الوقت ده
.. هل حاسس بمرور الوقت حاسس انك دخلت في السنه التانيه مُختفي
.. هل عايش أصلاً في الحقيقه انا مش ثابتة ولا حاجه انا ميتة وحياتي
واقفه من لحظة ما جاتلي رساله انهم أخذوك .. لا أتمنى أكثر من أني
أسمع صوتك بس واطمن انك لسه موجود

<http://bit.do/e6mBm>



حفصة الزعفراني عن شقيقها

خمس سنين ونصف العام منذ ان تم اختطاف أختي الصغير ذو الاربع وعشرين عاما والذاكرة لا يغيب عنها صوت زوجته العروس الجديدة والتي لم يكن مر على ولادتها لابنتها ستة أشهر في حوالى الساعة الرابعة فجرا وهى لا تستطيع ان تستجمع كلماتها وصوتها يرتجف من الخوف والقلق تخبرنى ان أختي وعدها أنه لن يتأخر ولكنه لم يعد ولا يرد على هاتفه وسمع الآن وأنا اكتب هذه الكلمات صوت خفقات قلبي متسارعة وكل سيناريوهات الشؤم تدور برأسى وأنا أحاول طمأننتها



ولكن هيهات.

ثمانية أيام بعدها نترقب اى خبر يأتينا نرد على كل هاتف يرن فى منزلنا ندور بسيارتنا فى الشوارع بلا هدف علنا نلقاه ونقترب من أقسام الشرطة ومقار امن الدولة عل قلبا يراف بحالنا فيخبرنا عن مكانه او حتى يطمأننا أنه ما زال بخير ثم ظهر فانتابتنا سعادة غامرة وهرعنا اليه فى مكان احتجازه وهالنا ما وجدنا عليه حاله هو ومجموعة تم القاء القبض عليهم معه من ذات المكان وطبعا تعرفون ما أعنى لأنى لن استطيع الوصف فهو يقطع نياط قلوبنا كلما تذكرناه وتم التحقيق معه والتهمة الانتماء لجماعة وتتوالى التجديدات بالحبس أياما وشهورا ونحن نمسى ونصبح على أمل أن هذا الكابوس سوف ينجلى قريبا وستظهر الحقيقة ويتحقق العدل رغم أن كل ما حولنا لا يبشر بذلك ولكن لأننا بشر كنا نعيش بهذا الأمل وخلال هذه الفترة حدث ولا حرج عن معاناة الزيارات نتحرك فجرا حتى نلحق بتسجيل كشوف الزائرين حتى تجد أمى الحبيبة وزوجة أختي وابنته الصغيرة فقط مكانا للجلوس فى صالة الزيارة نذهب تحملنا أجنحة الشوق لغائب حبيب ابعده عنا ظلما وعدوانا دون ذنب أو جريرة ونقف فى طوابير ساعات طوال نحمل بأيدينا أثقالا كنا قد اعدناها فى اليوم السابق ونحن نتخير أطيب الطعام ونقوم بإعداده بقلوبنا قبل أيدينا وبعد هذا الانتظار الطويل نبدأ مشوارا من التفتيش المهين لنا وللطعام وندخل وقد أنهكنا التعب ولكن كل ذلك يهون فى سبيل الاطمئنان على الغالى ونظرة لوجهه الحبيب وسماعا لأخباره وانجازاته تعطينا نفحة من حياة لنكمل الطريق وفى طريق العودة نعود بغير الوجه الذى أتينا به دموع تخفيها ضحكات خاوية وقلوب يعتصرها الألم والعجز وقلة الحيلة ولكن كنا نعيش على الأمل.

ثم بعد عدة أشهر او ما يقرب من العام تم تحويل القضية الملفقة الى محكمة الجنايات التى ظلت تنظرها لمدة عامان وتم تحديد موعد للنطق بالحكم ولكم ان تتخيلوا القلوب المعلقة بالأمل وقد صار موعدها مع اسدال الستار قريبا هى مشاعر يصعب وصفها فى ظل حالة عامة من اليأس تم تصديرها عن عمد بغياب أدنى درجات العدالة لتقتل الأمل فى قلوب كل الحالمين

ويصدر الحكم بعد ثلاث سنوات بالمؤبد فقط على تهمة انتماء ليس فى اوراقها دليل واحد ونزل علينا الحكم كالصاعقة ودارت رؤوسنا فما عاد الأمل يجدى منطق فى وضع غاب فيه كل عقل وعدل ومنطق وبعد أن افقتنا واستطعنا ان نتمالك شتات أنفسنا بدأنا باستعادة الأمل مرة أخرى بأن هناك فرصة أخرى فى النقص لرفع هذا الظلم البين وبعد عام تحددت جلسة للنقض عشنا معها ذات المشاعر ما بين محاولة للتمسك ببصيص من التفاؤل والأمل وبين خفض مستوى توقعاتنا وطموحاتنا خوفا على قلوب لم يعد فيها مكان لكسر جديد من خيبة أمل وبعد ثلاثة أشهر ويا للعجب أصروا على أن يكملوا مسيرة الظلم التى بدأت ولم يلتفتوا حتى لتوصية من النيابة التى هى خصم لنا والتى أوردت فى مذكرتها بأنها ترى أن يتم تبرئة أختي من التهمة الموجهة اليه لعدم ثبوت الأدلة وتم النطق بالحكم برفض النقص

أخي الآن أتم عامه الثلاثون وراء القضبان واتمت ابنته التي تركها رضية ست سنوات .. حلمي أن يرجع لاسرته .. يضم ابنته بين يديه .. تتربى على عينه.
أعلم أن هذه الأحوال التي عشناها وما زلنا نعيشها يقاسي آلاف غيرها من المظلومين ولهذا أردت أن أكتب عل كلماتي توقظ الناميين وتحرك قلوبا أنستها مشاغل الحياة أن هناك آلافا من البشر وعائلاتهم قد توقفت عندهم الحياة . <http://bit.do/e6mMR>

29 أغسطس

عن زياد العلمي

راجعة من زيارة زياد.. كل مرة باحكي له عن الناس اللي فاكراه وبتسلم عليه، والناس اللي بتكتب قصص لنديم عن زياد، وهو ممتن جدا وبيشكركم جميعا.. زياد زي ماهو. قوي وصلب ومتفائل، وقعد يتفق مع نديم على خطط للسفر وممارسة الأنشطة حينفذا معاها اما يخرج بإذن الله.
وقال له انه حيعرفه على مجد ابن حسام وعلى ابن احمد تمام لانهم في سنه، وانا قلت للضابط، القضية اللي انتو عملتوها لناس ما يعرفوش بعض حيثصاحبوا كلهم، والقضية دي خلتنى اتعرف على أسرتين حلوين، اسرة حسام وأسرة هشام، وشفت زوجة تمام وأهل البربري وهمه مستنيين الزيارة! وحنعرف على بقية الاسر وحنبقى اصحاب، ودا خطر عليكم ☺

التفتيش كالعادة مالوش منطق ولا معيار، النهارده كانوا عايزين يرجعوا البطاطس المحمرة. (ماحدش يسألني ليه؟) وقالولي ان الفاكهة اللي ببذرة لازم اشيل منها البذرة الاول قبل ما اجيبها!! (كنت جايبة خوخ وبرقوق وقلت له اني من اول الموسم باجيب خوخ وبرقوق لانها فاكهة قليلة السكر وتنفع زياد، قال لي انه حيفوتها النهارده، لكن حيدخل نص الكمية فقط_اللي هي اصلا كيلو ونص خوخ وزيهم برقوق عشان يكفوا ثلاث اشخاص في زنزانة واحدة_ وارجع بالنص الثاني!!!!)

وبرضه رجع نص العيش التوست بتاع مرضى السكر!!
قلت لزياد اني جايبة المروحة من اكثر من شهر ومامة حسام داخه بيها عشان تدخلها وجابت كل الورق اللي عايزينه ولسة مستنيين فرج ربنا، واني حاجيب لهم تلاجة صغيرة بدل الاكل اللي بيبوظ منهم! فقال لي استني لما يدخلوا المروحة الاول!! وقال للضابط "انا بقالي شهر مش راضي اقول لاهلي ان الدوا بيبوظ من الحر، والحبوب بتفرول وبتندي!!" .. يعني زياد اللي عنده ٦ امراض ابسطها الضغط والسكر، بقاله شهر بياخد علاج مالوش مفعول!! حسبنا الله ونعم الوكيل!! اللهم عدلك وانتقامك!!

<http://bit.do/e6m6m>

زوج سمية ماهر خزيمة بنتنا المعتقلة في سجون العسكر
بمناسبة الرسالة الخارجة من سجن البنات ، بدايةً هي رسالة صحيحة ، وعلى رأي المثل : اللي مايشوفش م الغريال يبقى أعمى ، لكن هنا بقى مش هيبقى أعمى ، هيبقى لامؤاخذة " مش راجل " مش هقولك اعمل أي حاجة علشان يخرجوا ، ولا هقولك زي ماينتقال : انزل من برجك العاجي ف تركيا وشوف مأساة البنات ، اللي هقولها لك دا بقى من واحد بمعنى الكلمة حاسس



أنه مش راجل ، مش متخيل حتى الآن أن زوجتي جوه وانا بره ، مش متخيل أن انا باسمع عنها مش باسمع منها ، لو اتكلمت عن سمية والحالة النفسية اللي هي فيها دلوقتي ، والحالة الصحية اللي بتعاني منها دلوقتي ، أو لو اتكلمت عن امها اللي مبقتش حرفياً عارفة تعيش ، أو والدها .ماهر اللي عمري ماحسيت انه تعبان الا دلوقتي ، مع كل زيارة من أسرته ليه ف برج العرب ، ببيان أكثر علامات التعب النفسي والصحي ، لغاية ما هو قالها صريحة : انا غياب سمية تاغبني جدا ، مع انه عمره ماشتكى لحد اللي جواه ، لو اتكلمت عن معاناة أخواتها البنات اللي المفروض يبقى حقهم البسيط جدا أن اختهم الكبيرة تبقى ف وسطهم ، تنصحهم وتفضل جنبهم ف غياب ابوهم ، لو اتكلمت عني : انا كان سبق وتعاهدت مع الله عزوجل اني لن أبكي إلا من شينين : نصر من الله أو خشية من جلاله سبحانه ، مكنتش حاطط ف حساباتي العقلية والقلبية إني أبكي لفراق حد ، بس انا فشلت ف العهد دا ، اللي يعرفني ف سجون الابعادية ووادي النطرون وجمصة يعرف أن دمعتي عزيزة اوي ، بس غياب سمية فعلا كان له تأثير تاني خالص ، اول مرة أبكي من ٤ سنين لما سمية اعتقلت ، وحتى الآن بقي مأسهل علي البكاء لمجرد بس الاحساس البايخ أن هي جوه وانا بره حاسس اني فعلا مش راجل .. كمية التدهورات النفسية اللي حصلت لبنات ونساء جوه لا تعد ولا تحصى ، واللي يقولك أنهم غير كده يبقى اهل ، ايوه اهل ، البنات مهما كانت درجة ثباتهم هما ف الآخر بنات ، عمرهم ماهيقدروا يتعايشوا ولو حتى كملوا ٢٠ سنة داخل السجن ، هما طبيعتهم كده ، البنات جوه فيهم اللي بتبقى نائمة ف أمان الله ومرة واحدة تصحى وتصرخ زي الأطفال ، وأخواتها جنبها بيبكوا ومفيش ف أيديهم حاجة يعملوها لها ، وفيه بنات بتاخذ علاج نفسي ، وفي بنات وصلوا لمرحلة أبعد من كده بمراحل ، اللي بيحصل جوه اكثر من مجرد تخيل وتصور ، كلنا عارفين أنه عمره ما لجأ لحبس البنات إلا وهو عارف تأثيره النفسي على الرجالة اللي بره ، بس م الواضح أن الموضوع غير كده للأسف ، مش محتاج منكم ياللي ف أيديكم الأمر إلا أن تتخيلوا منظر بنت ف العشرينيات من عمرها أو ام ف الخمسينيات من عمرها ، محطوطة ف سجن ، مش محتاجة تعبير أكثر من كده ، اللي باطلبه ممن بيده الأمر ، أنه يتذكر أن البنات جوه لسه مخرجوش ، والله لو هيطلع ويقول لي : "مش ف إيدي حاجة" ، انا مش هاختلف معاه ، لكن لو طلع وقال لي : شوف انت ممكن تعمل ايه واعمله ، أو لو قال لي : محدش ضربهم على أيديهم علشان يدخلوا الاخوان ، أو لو قال لي : اللي عايز يسبب السجن يتنازل ويتبرأ مننا ، لو طلع وقال لي كده ، ف أنا بأشهد الله عزوجل اني خصيمهم إلى أن تلقى الله

<http://bit.do/e6rmq>

30 أغسطس

عن مصطفى النجار

في #اليوم_العالمي_لضحايا_الاختفاء_القسري
 زوجة الدكتور مصطفى النجار المختفي منذ ما يزيد عن 330 يوما
 تحكي عن معاناة الأسرة بسبب غيابه والحالة النفسية لأطفالهما،
 ومطالب والدته:

أنا بطالب المسؤولين بالكشف عن مكانه، أنا لا أجزم إنه هربان أو
 حصل حاجة أو مسجون، ولكن لو حصله أي حاجة من الحاجات دي
 يبلغونا إحنا مش هنعمل حاجة، ولو كان لا قدر الله حصله حاجة
 مفيش حاجة هتعوضني عنه، ولو مختفي عرفونا هو مختفي ليه،



ولو هربان زي ما بيتقال فالمسؤولين مكلفين بالبحث عنه.
ولو ده عقاب لمصطفى على موافقه السياسية أنا كرهتها، أنتم مش بتعاقبوا مصطفى لوحده أنتم بتعاقبوا
زوجة مسؤولة عن 3 أولاد وعن وضعهم المادي، أنا تعبت ومحتاجة زوجي وسندي.

<http://bit.do/e6nfD>

31 أغسطس

عن أيمن أيوب

#اليوم_الدولي_لضحايا_الاختفاء_القسري
هل أخي حي؟ هل مات؟ هل يتألم؟ أين أخي؟
لا أريده أن يتعذب و يتألم.
فقط أريد أن يعود لي مبتسما كما كان ..
هل لا يزال كذلك؟
أخي قارب اختفائه على عامه الخامس
<http://bit.do/e6rpE>



حملة "أوقفوا الاختفاء القسري" تحاور زوجة الدكتور مصطفى النجار، بعد ما يزيد عن 330 يوما على
اختفائه منذ منتصف أكتوبر الماضي.



كيف تعامل الأولاد مع فكرة اختفاء والدهم؟ وماذا عن حالتهم النفسية؟
"يمنى وهنا" في المرحلة الإعدادية وفاهمين شوية اللي بيحصل، وأنا قعدت واتكلمت معاهم بعد اللي حصل
وبمجرد ما عرفوا دخلوا في حالة انهيار وهستيرية عياط، وبنتي هنا فضلت تسألني طب ليه، وإزاي، وبابا
عمل إيه، وبابا مش وحش علشان يعملوا فيه كده.
البنات مش قادرين يستوعبوا الموضوع خصوصا إن مصطفى مكنش أب عادي، كان صاحبهم وكان دائما
بيهز معاهم وبيخرجهم، ويمنى كانت دائما شايقه والدها مثلها الأعلى.
ولكن سهيل هو لسه 6 سنين في ابتدائي مش فاهم الوضع أوي، مع إني بحاول اشرحه لكن مش مستوعب
كلامي طول الوقت زعلان من باباه علشان مبيسألش عليه، وبيقول "بابا وحش" خاصة إنه متعود باباه
يوصله أول يوم مدرسة وده محصلش.

حالتهم النفسية سيئة جدا، رافضين الخروج أو الاحتفال بأي مناسبات غير لما باباهم يرجع، وكل مناسبة بتعدي يفضلوا يفتكروا باباهم ويعيطوا ويتضايقوا ويفضلوا يسألوا الوضع ده هيستمر لإمتي.

بنتي اليمنى كانت طريقة تفكيرها قريبة من باباها، وكان نفسها تكتب مقالات زي باباها وبعد اللي حصله بقت تقول أنا كرهت السياسية ومش عاوزه اكتب مقالات هكتب روايات بعد كده.

-في ظل الحالة النفسية للأولاد .. كيف تتعاملين معهم؟

أنا رحنت استشرت دكتور نفسي لأن لاحظت الموضوع هيقرب معاها باكتئاب، ونصحتني بالمحاولة معاها طول الوقت.

بحاول من وقت للتاني أخرجهم بالرغم من رفضهم المستمر، وأجبرتهم على النزول والخروج للنادي، بالإضافة إلى أن بعض أصدقاء مصطفى وصديقاتي بيحاولوا يخرجوهم من وقت للتاني.

من فترة واحدة صديقتي حاولت تخرجهم للسينما وبالفعل نجحت، ولكن طول الوقت يتكلموا مع باباهم وإزاي الوقت كان لطيف مع بابهم خصوصا إنهم كانوا بيروحوا السينما الساعة 3 علشان لما يخرجوا ينفرجوا على شروق الشمس وبيكونوا مستمتعين.

-ماذا عن والدته .. كيف تتعامل مع اختفاء نجلها؟

مصطفى كان الأقرب لوالدته، ومنذ اختفائه وحالتها الصحية والنفسية سيئة جدا، ورافضة الخروج من المنزل لحين عودة مصطفى، حتى رافضة تعمل عمرة غير لما يرجع ويسافر معاها.

والدته دلوقتي مبتقدرش تتحرك من السرير يدوب بتروح الحمام، وبتمشي بمشاية، نفسيتها سيئة جدا وتصحى على كوابيس وبتفضل تصرخ.

والدته كل شوية تقولي إحساسك إيه، أنا مش قادرة أتخيل يكون حصل حاجة لابني وبحاول اطمئنها.

كيف تقضي الأسرة الأعياد والمناسبات العائلية في غياب مصطفى النجار؟

في وجود مصطفى كنا دائما بنسافر الإسكندرية عند والدته، وأنا بحاول اعمل ده من ساعة ما اختفى وبسافر لوالدته في عيد الفطر وعيد الأضحى وأول يوم رمضان.

أول يوم رمضان كان صعب علينا ومحدث فطر يومها أساسا واليوم اتقلب عياط، حتى العيد مبنحسش بيه وبنفتكر مواقف لينا مع مصطفى وهو موجود، والعيال دائما بيقولوا مفيش عيد طول ما بابا مش موجود.

هل تعرضتي لمضايقات في عملك عقب نشر الأخبار عن قضية زوجك واختفاؤه؟

أنا بفصل حياتي الشخصية عن حياتي العملية، وطول الوقت محدش عارف أنا زوجي مين سوى أنه طبيب أسنان واسمه مصطفى، بعد اختفائه فوجئت بمدير المدرسة بيبيلغني إن ناس من الأمن الوطني جم المدرسة وسألوا عني ومشياوا على طول.

وبواب العمارة قالي نفس الكلام برده .. إحنا مش فاهمين حاجة بيحسوا علينا لكن مفيش أي استدعاء رسمي أو يبلغونا بأي حاجة إيجابية أو سلبية.

-هل ترغبين في إيصال رسالة لمن يتابع قضية مصطفى النجار؟

أنا بطالب المسؤولين بالكشف عن مكانه، أنا لا أجزم إنه هريان أو حصل حاجة أو مسجون، ولكن لو حصله أي حاجة من الحاجات دي يبلغونا إحنا مش هنعمل حاجة، ولو كان لا قدر الله حصله حاجة مفيش حاجة هنعوضني عنه، ولو مختفي عرفونا هو مختفي ليه، ولو هريان زي ما بيتقال فالمسؤولين مكلفين بالبحث عنه.

ولو ده عقاب لمصطفى على مواقفه السياسية أنا كرهتها، أنتم مش بتعاقبوا مصطفى لوحده أنتم بتعاقبوا زوجة مسؤولة عن 3 أولاد وعن وضعهم المادي، أنا تعبت ومحتاجة زوجي وسندي.

<http://bit.do/e6rp8>

رسالة من والدة الباحث #إبراهيم_عز_الدين بعد ما يزيد عن ٨٠ يوما على اختفائه قسريا منذ القبض عليه:

رجعولي ابني.. طول اليوم منتظراه قدام الباب ومش عايزة غير العدل
"ارجع لأمك يا إبراهيم ، سمعوا رسالتي دي للدنيا كلها، انا مؤمنة وعارفة أن ربنا هيرد ابراهيم بالف سلامة. عارفة إنه سامعني وحاسس بالنار اللي في قلبي من يوم ما أخدوه من حضني.. ربنا عدل، اعدلوا ومتظلموش الغلابة"
بهذه الكلمات بدأت والدة الباحث بالمفوضية المصرية للحقوق والحريات إبراهيم عز الدين، رسالتها لابنها المختفي قسريا.

اكملت والدة ابراهيم رسالتها: "إبراهيم ابني الصغير تركه والده يتيمًا من الاعدادية طول عمره متفوق وهو اللي بيراعيني، وبيجي يقضي معايا كل الاجازات مفيش مرة اتاخر عني، كان بيفضل قاعد معايا ويدوبك يخرج يقعد على القهوة ساعتين ويرجع يشوفني عاوزة أيه، عمره ما كان مع الإخوان ولا بيبحبهم، كان دايمًا بيقولي ضيعونا."

تستكمل والدة ابراهيم حديثها: "أنا مش بنام، قاعدة طول الليل والنهار أمام المنزل منتظرة أن إبراهيم يدخل عليا، عارفة أنه مظلوم ومعملش حاجة، وأن ربنا عدل وأن اللي خدوه هيتأكدوا إنه معملش حاجة فهيسبوه بس اتاخرنا أوي."

تشير إلى أن إبراهيم كان في منزل الأسرة قبل القبض عليه بليلة واحدة وذهب ليأتي بشقيقته من المطار وطلبنا منه أن يبيت الليلة معنا، فرفض وقال أنه متاخر على الدكتور المشرف على رسالته وأنه تأخر كثيرا على الرسالة بسبب انشغاله بمرضى لانه هو اللي بيراعيني.

ياريتني كنت قفلت عليه الباب ومنعته ينزل، ياريتني كنت أعرف كنت بوست رجله يقعد معايا، البلد كلها والناس والجيران بيحوا يسالوني إبراهيم ظهر ولا لسه، بقولهم هيظهر وهيخرج أنا وهما متأكدين أن إبراهيم معملش حاجة وحشة كل الناس بتحبه، محدش عمره كره ابراهيم على طول بيضحك وقلبه ابيض ميستحملش ضرر لاي حد عشان كده اهل البلد كلهم بيحبوه.


عاوزة اقول للي اخدوا ابراهيم انه يتيم وانا مليش غيره، أرجوكم خرجوه، اسمعوا أم اتاخذ ابنها من حضنها ومش عارفة تعيش من غيره، أنا حتى مش عارفة عايش ولا لا، بياكل ولا مبياكلش تعبان ولا سليم، كل ما التليفون يرن أقول هو، قلبي وجعني وانا مستنياه، طول اوي، انا قولت ساعة ويخرج ، مر شهر بموت فيه كل دقيقة، توجه والدة ابراهيم رسالتها للمسئولين في الدولة ابني بريء معملش حاجة اعتبروه ابنكم، حسوا بيا، وحسوا بالنار اللي جوايا واللي بتحرق قلبي كل دقيقة، ادوني ابني واحكموا بالعدل ، مش عاوزين غيره، ربنا عدل اتعلموا منه.

<https://bit.ly/2OracCC>

1 سبتمبر

عن اخي احمد مجدي

عامين مروا عليك في مكان مجهول. لاندرى ما يفعل بك وما يحدث
معك. كيف مر عليك هذا الوقت. كيف تقضي ايامك ولياليك..
لاندرى ولا نعلم ولكن الله يعلم .. فنسأل الله العظيم ان يحفظك
بحفظه ويرعاك برعايته وان يعيدك سالما معافي ان شاءالله. ان
الله علي ذلك لقدير
انا الله معنا فوالله لن يضيعك ابدااا
ونحن نحسن الظن به
واسال الله الا يفجعنا فيك وان يحفظك ويعيدك سالما من كل سوء
قلب اختك يا أحمد ♡
نسألکم الدعاء
<http://bit.do/e6Dna>



3 سبتمبر

إلى رامي شعث

في الخامس من يوليو الماضي، ألقى قوات الأمن القبض على
الناشط المصري الفلسطيني رامي شعث من منزله في القاهرة.
شعث، 48 سنة، مؤسس شريك في حملة مقاطعة إسرائيل في
مصر، وابن نبيل شعث، مستشار الرئيس الفلسطيني محمود
عباس.
حُبس شعث في سجن طرة على ذمة قضية معروفة بـ«تحالف
الأمل». وبحسب الرواية الرسمية، فإن النشطاء المدنيين
المتهمين شاركوا في مؤامرة بالتعاون مع جماعة محظورة
للإضرار بالبلاد، وهي الاتهامات التي أنكرتها عائلة شعث بشدة.
وتشمل القضية عدداً من السياسيين البارزين وصحفيين وناشط



للحقوق العمالية.

منظمة العفو الدولية اعتبرت شعث معتقل رأي وطالبت بالإفراج الفوري وغير المشروط عنه، وهي
مطالبات انضمت إليها منظمات أخرى مثل مركز القاهرة لدراسات حقوق الإنسان والفيدرالية الدولية
لحقوق الإنسان.

يوم اعتقال شعث، رحلت السلطات زوجته سلين ليبرون شعث إلى فرنسا. وبسبب عدم قدرتها على
التواصل المباشر معه، كتبت إليه هذه الرسالة في الذكرى الأولى لزوجهما.

نص الرسالة*

حبيبي رامي،

كان المفروض أن نكون معاً اليوم لنحتفل بعيد زواجنا الأول. لكن مر شهران تقريباً على اختطافك مني بواسطة رجال أمن مسلحين وملثمين يرتدون الأسود في منتصف الليل. شهران وأنت تنام في زنزانة ضيقة وخائفة.

سلطنا كل الطرق كي نتمكن من التحدث أو التراسل لكنهم رفضوا. لذا، أتمنى أن تصلك هذه الرسالة. أعلم أنك حزين لعدم وجودك هنا معي. كنت ستفعل كل ما هو ممكن كي يكون عيد زواجنا لا يُنسى كما كان عرسنا، وكما تجيد فعله مع كل شيء. أريد أن أحتضنك وأن أخبرك ألا تلوم نفسك. قبضوا عليك لأنك كنت شجاعاً في كونك -بكل فخر- مصرياً وفلسطينياً. كنت جريئاً في مقاومة القبضة الحديدية التي أحاطت بمصر، التي سرقت طموحات الشباب الثوري المحبط. كنت شجاعاً في معارضة المشاركة المصرية في المؤتمر الإسرائيلي الأمريكي في المنامة. كنت شجاعاً في مقاومة تسوية حق تحديد المصير لشعبك. وقعت في حب مقاومتك، وفي مزيج ضعفك وثباتك. وقعت في حب استقامتك المزعجة في بعض الأحيان بمنطقها الذي لا يقبل النقاش وصراحتها التي لا تساوم. أعرف الحياة التي اخترتها للدفاع عن حقوق شعبك، المصري أو الفلسطيني، للعيش في حرية وعدالة وكرامة، والتضحيات التي قد تترتب عنها. اخترت مشاركتك هذه الحياة والزواج منك، ولست نادمة على شيء.

بالتأكيد، منذ افترقنا، لم يكن الأمر سهلاً. توديعك أمام باب البناية دون أن أعرف متى سأتمكن من رؤيتك مجدداً كان أصعب ما اضطررت القيام به. «يلا.. يلا»، كانوا يستعجلوننا. قبل أن تختفي في الليل في تلك الشاحنة، ألتقط بعيني آخر صورة لك، لوجهك، لعينيك. كان دوري للصعود إلى الشاحنة. أثناء ائتيادي للمطار، أنظر للقاهرة لآخر مرة، هذه المدينة التي شهدت حبنا يكبر ويزدهر. هذه المدينة التي أحبها كثيراً رغم كل عيوبها، ولا أعلم كذلك متى سأراها مجدداً.



مرت أكثر من ستة أسابيع طويلة من الصمت والانتظار منذ وصولي إلى باريس على أمل التوصل إلى حل دبلوماسي سريع لهذا الموقف. بينما أتجول في شوارع المدينة، لم أكن أعتقد أنه من الممكن أن يشعر الإنسان بالمنفى في بلده. فقدت الإحساس بالوقت، إيقاع حياتي مرتبط بأيام التحقيق والزيارة، الفرص الوحيدة كي أعرف أخبارك عبر عائلتك أو محاميك ولتطمئن أنني بخير. دائماً ما تميل للعقلانية وحماية الآخرين، حتى من زنزانتك. تأتي كل رسالة ترسلها مرفقة بقائمة من الأشياء التي يجب القيام بها للتأكد من أن أسرتك لا ينقصها شيء. هكذا أعرف أنك ما زلت قوياً.

بالرغم من ذلك، تلقيت ظرفاً صغيراً من يومين، بداخله سوار، ورسالة من بنتك تخبرني أن هذا السوار أهدي لك من شاب محبوس معك، وأنت ارتديته قبل أن تعطيه لها كي تهديني إياه. صنعت كذلك ورداً من الورق لكنهم لم يسمحوا لك أن تعطيها لها. أبتسم. رومانسي أيضاً. بينما أقرأ الرسالة، في يدي السوار، بدأت الدموع تتدفق حتى عجزت عن الرؤية. كانت هذه أول مرة أبكي فيها. منذ تلك الليلة التي افترقنا فيها، أفعل كل شيء كي أكون قوية وعلى قدر النضال من أجلك وقدر نضالك من أجل العدالة، لكن في هذه الغرفة لوحدي، على بعد آلاف الكيلومترات، نزع السوار والرسالة عني كل سلاح.

أفكر في هينتك، وفي صوتك وكلماتك الرصينة المطمئنة في وسط العاصفة التي قلب بها عملاء الأمن الوطني عالمنا رأساً على عقب. «كل شيء سيكون على ما يرام. سنجتمع مرة أخرى قريباً.» ليس في استطاعتي أن أهديك أي شيء في عيد زواجنا، لكنني أعدك بالنضال حتى تسترد ما سُرقت منك ظلماً: حريتك. عيد زواج سعيد يا حبيبي. سلين

<http://bit.do/e64o8>

عن زياد العليمي

رجعنا من زيارة استثنائية لزياد بمناسبة رأس السنة الهجرية.. زياد كالعادة صلب متماسك وبيضحك، وبيترازل عادي، وبيتريق عالقضية اللي بقت مالهاش وصف الا الجنون! عشان مافيهاش منطق ولا معنى.. وبيقول " احنا كنا بنحاول نعمل حراك سياسي للتيارات المدنية بشكل شرعي، وعلني! كنا بندفع تمن ده من وقتنا ومن شغلنا وأرزاقنا ووقت ولادنا عشان كان عندنا امل ينصلح حال البلد، فلو النظام مش عايز كده، وشايف ان من حقه يقبض على أي حد بيتكلم ويدخله السجن وقت ماهو عايز ويخرجه وقت ما يجيله مزاج، بدون منطق! يبقى نجمد أنشطة الاحزاب وما ندخلش انتخابات، ونسيبهاهم منهم للإرهاب من دون حركة مدنية، ويبقى الاحزاب تقفل أبوابها"!! .. وطبعاً بيسلم على كل الناس الحلوين.. وطبعاً باقول له على الناس اللي بتسأل بجد، والتي بتعرض خدمات بصدق من غير عزومة مراكبية، وبأحكي له عن الناس اللي بتكتب تحت هاشتاج #قصة_لنديم_عن_زياد_وبيبقى ممتن جداً للناس المخلصة الوفية اللي بتصون العشرة  ، ومش باحب اجيب سيرة الناس اللي بتستعبط، عشان ما يزعلش! بس النهارده لقيت مزاجه يسمح اجيب له سيرة بعض اللي بيستعبطوا، عشان ما حدش يحاول يستذكي عليا تاني! كالعادة سخافات تفتيش الاكل!!، رفضوا يدخلوا المرة دي توست مرضى السكر خالص، كل مرة بيرفضوا وبعدين بعد شوية مرضاة بيدخلوا جزء ويرجعوا!!.. كنت جنب الاكل واخدة كيوي وتفاح عشان ما يبقاش فيه حجة الفاكهة ام بذرة!!

واحنا داخلين لقينا شابتين معاهم شاب واقفين عالباب وسمعنا انهم تبع قضية "الامل" حاولنا نتعرف عليهم، باعتبار زي ما قلت لكم القضية دي ضمت ناس ما لهمش علاقة ببعض، وحتلي الناس تتعرف على بعضها!! بنسألهم انتو تبع قضية ايه؟ الشابتين بصوا الناحية الثانية، والشاب قال لي "ما نعرفش!!" قلت له يعني ما قالوكوش اسم القضية؟ الواد شوح بايده وقال بعصبية "ما نعرفش يا حاجة، ما نعرفش!!" .. وبعدين سمعتهم بينادوا على اسم المسجون تبعهم، فعرفت انهم تبع كريم حسين بتاع آسفين ياريس! 😊 اتاريهم يا حرام مش طايقين! 😊، لكن حظهم كده بقى! 😊! القضية بقت سمك لبن تمر هندي!! باحكي لزياد قال لي انه شاف في النيابة واحد عجوز، قال له انه كان مش بيطلق زياد واصحابه، ولسة من فترة قصيرة كان متصور شايل البيادة فوق رأسه!! وناسر الصورة على الفيس بوك 😊 ولما سمع عن القبض على زياد ومجموعة الامل نشر الخبر على فيس بوك وأعرب عن سعادته بالقبض عليهم! وبعدها باسبوع لقي نفسه مقبوض عليه في نفس القضية!! وقال لهم في النيابة يراجعوا صفحته على فيس بوك!! (بصراحة جه في بالي واحد ندل، كان شمتان يوم ما اتخطف زياد، رغم انه في يوم من الأيام كان عامل نفسه مع الثورة وياما اكل معانا عيش وملح!! اللي يعرفه يقول له إن حتى المطبلاية ما بقوش آمنين!! وممكن يلاقي نفسه بين يوم وليلة في نفس القضية، لو مراته غسيلها نقط على غسيل جارتها مثلا وطلعت جارتها متجوزة مخبر، يبلغ عنه ويلاقي نفسه مشرف في نفس السجن، وفي قضية الامل برضه 😊 وساعتها حنتضامن معاه ونرفض انه يتسجن بدون جريمة! لاننا اصحاب مبادئ بجد وعارفين انه "لا يصح إلا الصحيح"، ولا نقبل تقييد حرية مواطن لمجرد التعبير عن الرأي، حتى لو كان مطبلاي!!) .. فعلا، شر البلية ما يضحك، ولكنه ضحك كالبكا!! وعلى راي مثل سمعته قريب "مسيرك يا ملوخية تقعدى تحت المخرطة" ومسيرك يا شمتان تجرب السجن، ومش حينفعك تطبيلك!! لانه لا يصح الا الصحيح فعلا..

<http://bit.do/e64tY>

عن مصطفى النجار

340 يوم

لأعرف شئ عن مصطفى هل حيا ام لا قدر الله هل بصحة ام مريض يعانى
هل يأكل هل يشرب هل ينام ماذا فعلت به الأيام السابقة
ماذا تركت به من الام نفسيه وبدنيه
اليوم.تم تأجيل القضية المرفوعه بمجلس الدوله ليوم 11/16 بمنتهى
البساطه ألم يكفى انتظار 340،يوم حتى تفصحوا عن مكانه او تظمنونا
على ولكن ننتظر حتى تاريخه للنظر في القضية
تعبنا من الانتظار والقلق
من حق ولاده يشوفوه الاختفاء لشخص ليس عقاب له وحده وإنما عقاب
جماعي
أعيدوا النظر في طرق التعامل مع البشر أنهم بشر لهم حقوق يكفلها لهم
لم أقل القانون والدستور والحريات وإنما أقول



ارحموا من في الارض يرحمكم من فى السماء
كلنا راحلون ماذا تقول أمام رب السموات عن كل كلمه وكل فعل عن كل ظلم لإنسان ماذا ستفعل أمام دعوة
المظلوم التى ليس بينها وبين الله حجاب
ام تعلم أن الظلم ظلمات يوم القيامة
ام تعلم أن الله يقتص من الظالم فى الدنيا والآخرة
لم نكن ممن لا يخلو كلامهم من الدعوات على الظالمين وأولادهم وووووو
وإنما نقول حسبنا الله ونعم الوكيل
فأنا وكيلى المسؤول عن رد مظلمتى هو رب العالمين
ارنى ماذا انت فاعل أمامه
##مصطفى_النجار_فين؟
##مصطفى_راجع_بإذن_الله
<http://bit.do/e64yt>

5 سبتمبر

عن عبد الرحمن محمود

مات قلبي يا أخي يوم رحلت عنا
والله يا أخي لا يشف قلبي ويجبر روحى المكسوره ويذهب
حزنى إلا أن أراك أو ألق بك فلم تعد لدى رغبه فى الحياه
##عبدالرحمن_محمود_فين؟
##خمسة_أعوام_من_الإختفاء_القسري
##بلاد_الظلم_أوطاني

<http://bit.do/e68hc>



عن مصطفى النجار

يوم الاربعاء القادم ان شاء الله اول يوم دراسه لسهيل كبرنا
وبقينا في أولى ابتدائي
سهيل نفسه بابا يرجع قبل الدراسه عشان يوصله اول يوم
زى كل سنة وبيقولى هو بابا مش هيجي يوديني زى السنه
اللي فاتت وبرضه أزعل منه
قلتله والله مش بمزاجه
بيقولى انا زعلان اوى من إللى مش عايز يرجعلنا بابا هو
ليه بيعمل كدا دا بابايا ومن حقى اشوفه ويوصلنى ويقعد



معايا

مش عارفه اقولك ايه يا بنى فعلا من حقتك بس نعمل ايه
يارب لم اعتاد الدعاء على أحد ولكنى أشعر بوجع لحرمان اولادى من أبوهم
نفسى اقول للمسؤول عن حرمان اولادى من أبوهم تخيل لو حد حرملك من أولادك إحساسك ايه دا طبعا لو
كنت إنسان طبيعى زينا بتحس وعندك مشاعر
##مصطفى_النجار_فين؟

##سهيل_عايز_باباه؟ <http://bit.do/e76je>

شقيقة الأعرس

هتكلم في حاجتين بس بدون ذكر اسماء
*اول حاجة فيهم :- ان في محامي بيقول قولوا لأعصر ميطلعش رسايل بعد كده مش حقيقة وان اعصر
بعته مع اهالي بيقوله انه بيموت ودراعه مبيتحركش..
اعصر لو هيبعت لحد ف هيبعتلي زي ما بعث من كام يوم قبل ما يدخل التأديب وقالهم يقولولي انه تعبان
وبس والناس كتر خيرها بلغوني
ف لو اعصر لو عايز يبعث لحد انه تعبان وبيموت ودراعه مبيتحركش زي ما حضرتك بتقول هيبعتلي انا
يقولي الكلام ده مش هيبعت لحد غيري مهما كان الشخص ده مين
وحابه اعرفه نقطه كمان ان مصطفى مش كداب ومبيقولش حاجة مش حقيقة ومبيفرقش معاه حد وبيقول
ف وشه اه انا قولت
*ثاني نقطة :- انا ما ادخلتش في اي حاجة تخص المحاميين من اول القضية وكنت بكتفي اني بسأل عملوا
ايه والتجديدات امتي وايه اللي مفروض نعمله وبس وكنت بقول ده شغلهم وهما عارفينه كويس
وهالة عمرها ماقلت انها محامية مصطفى بعيداً عن ان هالة اختي وصاحبتي وصاحبته اصلاً ومش هسمح
لحد انه يقولها ده شغل مزایدات رخيص
..هالة عمرها ما ادخلت ف اي حاجة تخص القضية غير من فترة لما مصطفى بنفسه قالي ابلغها انها
هتبقى المحامية بتاعته هيا واستاذة عزة
وهالة دلوقتي هيا محاميته للناس اللي مش عارفة .. واي حاجة تخص اعصر انا او هالة اللي هنكتبها غير
كده احنا مش مسئولين عن اي حاجة اي حد يكتبها

*في حاجة كمان :- احنا موقفين نشر وإن مصطفى لو عايز ينشر حاجة كان بيعت قال قولوا لمنار تنشر زي ما بيعمل دايمًا ، وإنه حتى لو بيعت رسالة كان مفروض تبلغوا أهله الأول بيها قبل ما تكتبوا حاجة ..واحنا اكيد أهله ومحاميته عارفين مصلحته فين ومفيش حد هيخاف عليه أكثر مننا

<http://bit.do/e77ua>

8 سبتمبر

عن معتقلي الأمل

راجعين من زيارة زياد.. كالعادة ببسلم على كل الناس الجدة ، وباوصل له سلاماتكم كلكم.. روحه المعنوية زي ما انتو عارفين في السما. زياد، صلب وقوي وجدع، رغم لون بشرته الباهت! واقتنع اخير انهم مش ناويين ينقلوه المستشفى ولا حيسمحوا بالكشف عليه!! وانا قلت له زي كل مرة احنا مش مستنيين الفرج من النيابة ولا القضاء.. ربنا حيحلها في يوم معلوم!! والمروحة طبعا لغاية دلوقت ما دخلتس..!!

وكانت بنوتة جميلة جت لي البيت بالليل مخصوص عشان تجيب لي طبق كشك أوصله لزياد عشان عارفة انه بيحبه!! طبعا رفضوا يدخلوه!! ورفضوا كمان يدخلوا علبة بلاستيك فيها ملح وفلفل وكمون!!! وطبعا توست السكر الناشف!! ادعوا معايا ربنا إن شاء الله يحرمهم من اللقمة، ويشتهوها ما يلاقوهاش، كل اللي بيحرموا عيالنا من اللقمة!!

شفت هشام فواد وهو خارج من الزيارة، ضحكته الحلوة طبطبت على قلبي!! جريت عليه سلمت وحضنته، ولقيته بيقول لي بعفوية "مش عايزة حاجة؟" ضحك من المفارقة طبعا، ومشيت وانا باقول "عايزة تنزاح الغمة وينفرج الكرب وترجعو لبيوتكم ولعيالكم بعافية وروسكم مرفوعة زي ما انتم".. وربنا ينتقم من الظالم ومن والاه، ونشوف فيهم يوم بيرد قلوب كل المظلومين .. قولوا آمين

<http://bit.do/e77wc>

9 سبتمبر

عن عبادته جمعه

والله يا جماعه انا ماكنتش ناويه أفتح الفيسبوك دا وحسيت إنه الواحد يريح ويستريح شويه ،بس والدتي طلبت مني يمكن يا حماس حد يطمنا عليه زي كل مره

عبادة بقاله سنه ونص بالظبط مختفي قسريا
الله أعلم بحاله ، جالنا أخبار عنه من فتره للتانيه ناس تشوفه ف مكان وبعدين ينتقل وناس تانيه كانوا معاه ويخرجوا ويطنوننا وهكذا وخلص
بقالنا شهور نفسنا حد يقولنا اي حاجه الاخبار منقطعه تماما ، مش عارفه حد ممكن يساعدنا يطمنا عليه ازاي بس الأكيد لعل إن من عباد الله من لو أقسم على الله لأبره وسبحان الله كل مره كنا ف أشد الحاجة للدعاء دا وربنا استجاب



وبيطمنا عليه ع طول

المعلومات التي بنعرفها عن ماما بتبقى كل ٤٥ يوم لما بابا بيشفوها في معهد الامناء وهو بس اللي بيشفوها عشان محامي وهي جوة قفص زجاجي؟!

ليه كل ده ليه كل ده ليه كل ده!!!!!! ده وطن ..؟! دي بلد؟! ده عدل!!!!!!

#الحرية_لهدى_عبدالمنعم#الحرية_لماما#٣١يوم#افتحوا_الزيارة <http://bit.do/e8nwj>

12 سبتمبر

رسائل مجدي شندي لابنه عمر في الليلة الأولى لمحبيه

ها أنت تقضي ليلتك الأولى في الزنزانة، تحس أنك يمامة أوقعها القدر في يد صياد غادر، يتلهى بأوجاع فرائسه، قد تدمع عيناك وينفطر قلبك حين يغلقون عليك بابا صدنا وأنت تعودت على السباحة الحرة في بحر الأنغام، وتتساءل بحق السماء.. لماذا أنا هنا؟
أنت هنا لأنك ابني، فلذة كبدي ووجعي، ولأني يا بني ارتكبت جريمة الحلم بوطن، وطن حر لا تكال فيه التهم جزافا لمجرد الكيد أو تفرغ الأحقاد الشخصية، لم أكن أظن أن حلمي بالحرية سيلقي بك في زنزانة.
هل أعتذر لك؟ وماذا يفيد اعتذار أب مكلوم، كان يظن نفسه جبلا أشما، فإنا به ينهد لمجرد تصور الأغلال حول معصمك، أو الأبواب تغلق عليك.

أعرف روحك الطليقة، سترسم بيانو "ستاين واي" الذي تحلم بامتلاكه على حوائط الزنزانة وستعزف مقطوعات بيتهوفن وموزارت وفيفالدي وشتراوس وباخ وتشايكوفسكي وشوبان، فالموسيقى تسكن الأوجاع، ولتعلم أن وجعي أضعاف وجعك، ليس لمجرد أن تهتمك أني أبوك، ولكن لأنك بريء وظاهر الروح والقلب وكنت تحلم بأن تكون أشهر مؤلف موسيقي في العالم ليس للشهرة في ذاتها، ولكن لتأتي بملايين السياح لحضور حفلاتك تحت سفح الهرم.
عدني يا عمر أن تحافظ على حلمك هذا نقيا وأن تظل على العشق الذي تربيت عليه، وألا تجعلك هذه المحنة تكفر بالوطن، وألا تغويك قاعات كارنيجي وألبرت الملكية ووالث ديزني عن العزيف تحت سفح الهرم.
في المقابل أعدك ألا أتخلى عن أحلامي ولو نشروني بالمناشير، لتعيش أنت وجيبك في وطن تستحقونه الساعة الثانية عشرة صباح الخميس 12 سبتمبر 2019

<http://bit.do/e8vVN>

عن عصام وجهاد الحداد

مني إمام تكتب بعد ٦ سنوات حصل ابني #جهاد_الحداد
أمس على البراءة من كل التهم في قضية التخابر بعد ٦
سنوات من الحبس الانفرادي في العقرب!
بينما حكم على زوجي الدكتور #عصام_الحداد بعشر
سنوات سجن مشدد لاتهامه بالانتماء لجماعة مخالفة
للقانون و تم تبرنته من كل تهم التخابر و الإرهاب و
الاموال.



بعد وصول الحكم إلى السجن بعد اسبوعين سيتم الإفراج

عن جهاد إن شاء الله ليبدأ رحلة علاجه من إعاقته الحالية.

دعواتكم ليتم الله شفاءه .. و يفرج كرب كل المظلومين فى كل مكان!
و لله الحمد من قبل و من بعد .. كما ينبغى لجلال وجهه و عظيم سلطانه !

<http://bit.do/e8vZB>

13 سبتمبر

رسائل من أب سجين لابنه الحر .. Omar Shendy الليلة الثانية

فى الليلة الثانية - ياقطعة قدت من روحي - هل تألفت روحك
الطليقة مع الجدران، هل بدأت تستوعب أنك وحيد وأنت الذى
لاينفض الأصحاب من حولك، صامت لا تجد من تداعبه أو
تناغيه، عابس وانت الذى لايفارق وجهك الابتسام أبدا فى
صحوه ونومه.

غاضب منى لأنى عجزت أن أنقذك، كنت صغيرا تقف على
أطراف أصابعك كي تصل بذقنك إلى ركبتي وبلهجة طفولية
تقول: أنت كبير قوي ياابا، فأرفعك من تحت إبطيك حتى
تحاذي رأسك رأسي وأقول لك: وانت كمان كبير يا عمر، شفت؟
فتبتسم ابتسامة ساحرة لا أنساها.

هل تذكر أيام معرض الكتاب الماضى، حين قررت أن تعزف
وتغني قبل ندوة ديوانى لحنا شرقيا - على غير عادتك -

لمارسيل خليفة "منتصب القامة أمشي"، كيف احتضنت آلة العود لتسمعني بروفة لها - فى الليلة السابقة
على الندوة - وانتشيت طربا وأنت تغني "قلبي قمر أخضر.. قلبي بستان، فيه فيه العوسج.. فيه الريحان،
شفتاي سماء تمطر، نارا حينا حبا أحيان" ألا يزال القمر الأخضر ساطعا والبستان نضرا، أم تغيرت الأحوال
بفعل الصدمة التي تعرضت لها؟

قبل أن تسأل سأجيبك أن قلبي فى خسوف كامل من لحظة اقتيادك فى غيابي، يخاصمني الابتسام
وتخاصمني أمك ولا أجد لقلبها ممرا، فقد جمعت كل الممرات بيدك وأغلقتها لحظة رحيلك.

قبل موعد الندوة بساعتين ألغيت، لكنك أصررت أن نقيمها فى المشهد تخفيفا عني، وصدحت وغردت
وعزفت وفاضت ينابيع روحك حتى افتتن الحضور بعزفك، أعذر ضعفي لأنى لا أستطيع التخفيف عنك الآن.
بلادنا يا عمر فردوس حقيقي، ليست تلك الصورة الشائنة التي لاشك تطوف بمخيلتك الآن، وأنت محبوس
بلا ذنب.

كان إلغاء الندوة يا عمر، بداية نفق قادم إلى ما أنت فيه الآن، وتركني خارجه، لأتجرع مرارة العجز عن
فعل شيء لك، يبدو أنني لم أعد كبيرا - كما كنت تتصور فى طفولتك - بشكل يكفي لإنقاذك.
فسامحني يا بني.

(الساعة الثانية عشرة صباح الجمعة 13 سبتمبر 2019)

<http://bit.do/e8EKm>



احمد بقالة ١٥٠ يوم مختفي منعرفش عنه اي حاجة ومنعرفش لي وازاي محدش طمن قلبنا عليه ولا رد علينا، في ام كل يوم بتعد الايام وكل امنيتها بس تعرف مكانه تشوفه وكله هيهون اقصي امنيتها ان ابنها يظهر علي ذمة قضية حتي بس يظهر ويشوف النور متخيلين وصلنا لاي، وصلنا اننا بنعمل الحاجات عشان بس نحس اننا عايشين، في ام بتموت حرفيا ومش عارفين هتقدر تصمد لامتي، ربحوا قلوبنا وقلوبنا احمد فين طلعه لنور كفاية كدا احمد مكنش لي فاي حاجة الا انه جدع طموح كان بيتعب علي نفسه وبيأخذ كورسات عشان مضيعش وقته ارحمونا وارحموا اعمارنا واعمارهم الي بتضيع

#أحمد_حسن_فين <http://bit.do/e8EG6>



رسائل من أب سجين لابنه الحر .. Omar Shendy الليلة الثالثة

انتهت ليلتان صعبتان يا عمر، وبدأت ليلتك الثالثة، يفترض أن تكون مشاعرك الجياشة قد هدأت قليلا، تمالك يابني فقد رببتك لتكون صلدا كصخرة صماء عملاقة لا يستطيع زحزحتها أحد. أعرف أنها معادلة صعبة أن تجمع بين رقة الأحاسيس والصلابة في مواطن الجد، فانا أعيش هذه الحالة وأعانيتها، وأتصور نفسي أحيانا شخصين، أحدهما رقيق المشاعر إلى حد الذوبان، والآخر يقاتل بعشرة سيوف ومن المستحيل أن يتزحزح عن خندقه مستهينا بالموت، كأنه بلا قلب. قلت لك يا عمر أن الفارس في الحرب فارس في الحب، وضربت لك الأمثال بعنبرة العبيسي، وامرؤ القيس، والمهلهل بن ربيعة، وأنت الآن في معركة مع الذات لتخرج ذاتك الأخرى الكامنة. قد تتساءل، ولك كل الحق، أين أصدقاؤك وتلاميذك، أين من كانوا يزوروننا ويبالغون في الحفاوة إذا زرناهم، أين من كانوا يتحدثون عنك بشغف وإعجاب لدرجة أنني تصورت قدرتك على ملامسة السماء بيدك، كثير منهم نافذون ومقربون من دوائر الحكم، هل معقول أنهم لم يهبوا لنجدتك؟ -حاولوا يا عمر حاولوا، كل قدر استطاعته، وكثير من النبلاء يحاولون حتى ممن لا يعرفونك ولا تعرفهم، لكن إن شئت أن تعيش الحياة فلا تراها برومانسية الفنان، هناك المخلصون.. وهناك من يحسب خطواته بمنطق الربح والخسارة، ماذا يمكن أن يربح من يتدخل؟ خصوصا وأن للربح جهة واحدة، ومن بين الكثير هناك من قلوبهم معك وسيوفهم ليست معك!

ولكني أطمئنك أن آلاف مؤلفة في الجماعة الصحفية والوسط الإعلامي والثقافي، قلوبهم معي ومعك وعلى استعداد لفعل أي شيء من أجلنا، لكن ليس بيدهم أي شيء بعد أن أغلقت كل مسارب التأثير على قرارات السلطة، تصور يا عمر أن عشرات منهم لم يستطيعوا التماسك وأجهشوا بالبكاء وهم يطمنون مني عليك، كنت أنا المتماسك وهم جياشو العواطف، ومئات آلاف المحبين والمتابعين في مصر وخارجها كثير منهم يحسون نفس المشاعر النبيلة تجاهك.

اصمد يا عمر.. كن صلبا، فصاحب الحق سلطان، رأيت كيف كان جدك.. كان يتصرف كملك، وهو البسيط الفقير. أتعرف السر يا عمر؟ اسمع مني هذه القصة

سمع ذو النون المصري برجل صالح يعيش في جبل المقطم، فزاره وأقام معه بعض الوقت، وأثناء انصرافه طلب منه الدعاء، فقال له الرجل الصالح: يا بني آنسك الله تعالى بقربه، ثم سكت فقال ذو النون: زدني. رد

الرجل الصالح: يا بني من أنسه الله بقربه أعطاه أربعاً من غير أربع: عزاً من غير عشيرة، وعلماً من غير طلب، وغنى من غير مال، وأنساً من غير جماعة.. ألا يكفيك هذا؟
فبكى ذو النون وقال: بلى والله تكفي وتزيد.
آنسك الله بقربه يا عمر.

اطمنن، قلوب المخلصين كلها معك دون معرفتك، فكيف لو عرفوك يا أحب خلق الله إليّ؟.
(الساعة الثانية عشرة صباح السبت 14 سبتمبر 2019)

Omar M.Shendy

<http://bit.do/e8EJ6>

15 سبتمبر

رسائل من أب سجين لابنه الحر .. Omar Shendy الليلة الرابعة

أعرف مرارة التجربة وقسوتها، بدأت روحك تطمئن في الليلة الرابعة .. وقبل الليالي الأربع عشت كابوساً طويلاً استمر ستة وثلاثين ساعة، ربما كانت الأسوأ والأمر على الإطلاق.. لأنه لا يعرف "القهر" إلا من يكابده.

لا تأس يا بني، فمرارات التجارب التي عاشها أبوك على مدى عقود، جعلته أحياناً يتوقف ويتساءل عما إذا كان القدر يعده لشيء كبير، فتضعه يد الله في كل ما مر به، من أجل ما قدر له.
مهما قلت ومهما فعلت لك لن أعوضك عن لحظة واحدة، ولو جنت لك بملء الأرض حنوا وحدبا عليك فلن يساوي دمة انكسار تحجرت في مقلتيك.
أفدي ابتسامتك الغائبة بدمي.

هانت يا عمر.. من يدري؟ رب فرج قريب ينهي هذه المحنة التي تكاد تصيب بالجنون؟ وتفجر أسئلة أكثر مما تطرح أجوبة.

سأحتضنك لحظتها إن أذنت لي وسأقبل يديك وقدميك وعيونك، عل قلبك يغفر لي ما حاولت تجنيبك وجيك المزهر إياه، فكتب عليك وعلي أن نتجرع كأسه.

ستنسيك الأيام – يا حبيبي – حين تبتسم لك، يقيني أنها ستبتسم كثيراً لدرجة تتحول معها – تلك الأيام والأماكن والأحاسيس – إلى ذكرى باهتة لا تثير وقتها أي شجون، بل ستعظم في نفسك الأبية تعاطفاً مع المظلومين وأشواقاً إلى العدل ووطناً نحمية بنياط قلوبنا ليظل حضناً دافئاً وقت الزمهرير، ونسمة في الهجير.

ربما تثير كلماتي الأخيرة سخطك – هذه اللحظة – ولكنك حين تستدعيها بعد سنوات طوال، ستدرك قيمتها وربما تكتبها بماء الذهب وتفتخر أني كتبتها لك يوماً.

غن يا عمر "قلبي قمر أخضر.. قلبي بستان" واجه المصاعب بالموسيقى التي اختارت قلبك وروحك ووطناً، وبالغناء.. قسماً ستفرح كثيراً يا بني.
فاستبشر.

(الساعة الثانية عشرة صباح الأحد 15 سبتمبر 2019)

Omar M.Shendy

<http://bit.do/e8EHL>

رسائل من أب سجين لابنه الحر .. Omar Shendy الليلة الخامسة

خامسة الليالي يا عمر، يتمدد الوقت كأفعى ببعذك، يجثم على الانفاس، اتضح - يا صديقي - أن الأبوة أيضا مؤلمة وشاقة على الروح، لم أكن أظنها قبل أزمته كذلك.

فجأة غابت عن البال كل الأسماء وأصبح اسمك ندائي لأغلب من أتعامل معهم، روحك تمارس سطوتها علي وتسلبني ذاتي وأفكاري ومشاعري، عرفت الآن فقط لماذا كنت أناديك يوسف في طفولتك، وقيل أن يأتي يوسف أخوك للعالم بسنوات، كأن قلبي كان متيقنا من أنك ستمر بمحنة ما، وفي كل محنة منحة.

حين تعود، سأملأ بالورود المسافة التي مشيتها مرفوع الرأس محاطا يمن يقتادونك من باب البيت إلى سيارة الترحيلات، لتمسح الألم الذي خلفته تلك المسافة في روحك، أعرفك عاشقا للورود، وأنها قادرة على بلسمة جروحك.

تصور يا عمر .. في كل ليلة اهم بكتابة رسالة اليك يراودني إحساس أنها الأخيرة .. ما يبقى جذوة الأمل متقدة في الروح، الرهان على وجود عقلاء وأصحاب ضمائر إن قلبوا صفحاتك وفتشوا في أصدقاتك وتتبعوا مراسلاتك واستمعوا لهمساتك ، فلن يجدوا غير إنسان صاف نقي معجون بالتفاؤل يفيض إحساسا راقيا وإبداعا متفردا، يتمنونه ابنا أو أخا أو صديقا.

صورتك هذه التي توشك أن تتحول إلى أيقونة لها قوة مغناطيسية جاذبة للروح ، تشبه غيمة يستظل بها المسافر في المعالي والسباح في بحار الأحاسيس الفياضة التي تغمرنا بها صامتا وحين تعزف.

مفاتيح القلوب كيف ملكتها - يا حبيبي - بهذه البساطة المدهشة، وأبسطة الألفة كيف تمدها بنظرتك وابتسامتك وطريقة ملبسك.

ما السر الذي بينك وبين الناس جعل اتصالاتهم تتدفق كنهز عذب من قارات مختلفة مطمئنين وداعين لك ومتمنين فرجا عاجلا لأزمته.

استبشر، يا ابن قلبي ، واحمد واهبك كل هذه النعم، على طوفان المحبة، الذي ينفق غيرك الملايين دون أن يصلوا إلى عتباته.

غن يا عمر رائعة محمود درويش "ونحن نحب الحياة إذا ما استطعنا إليها سبيلا" وافتح كل طاقات الأمل في روحك وأرواحنا، ياتاج ملك أبيك.

(الساعة الثانية عشرة صباح الاثنين 16 سبتمبر 2019)


Omar M.Shendy

<http://bit.do/e8EJG>

عن كمال خليل

لسه واصلة البيت حالياً... كمال بصحة جيدة الحمد لله صلب وقوي كالعادة ... وجهت إليه تهمة الانضمام لجماعة ارهابية ومجموعة التهم الجاهزة المعروفة.

اللي ضايقتي جدااااا... ان الاستاذة ماجدة رشوان بلغتني عند خروجها من المبنى ان المعاملة المحترمة التي كانت في البيت تحولت لاحقاً إلى وضع عصابة على عينيه وكلبشات في ايديه حتى عند دخوله الحمام مما ضايقه كثيراً... راجل في السن ده وبالتاريخ ده يدخل الحمام بكلبش!!! ... بالاضافة لتعجبه من طريقة الفيش والتشبيه الجديدة الخاصة بالإرهابيين والتي تضمنت أخذ عينة من لعابه DNA!!!! ... المهم حيودوه سجن طره وسيستكمل التحقيق السبت القادم. ...



<http://bit.do/e8RXm>

18 سبتمبر

أهالي

انا اول مرة في حياتي استوعب فكرة ان حد محروم من حريته بقالي ٥ سنين بتشبع بالمفهوم ده يوميا. الموضوع أصعب وابشع مما نتخيل. سهلة جدا في النطق. مرة علقم في الفعل. امبارح واحنا خارجين من الزيارة. بقوا ياخدوا المعتقلين الأول يدخلوهم من باب حديد وبعدين يقولولنا أمشوا انتوا. (الاهالي يعني)



وانا خارجة ووقت دقيقة اسأل الظابط على حاجة. بضرب بعيني على الباب الحديد. حسيت ولأول مرة ان المعتقلين مش عايزين يدخلوا واقفين على طرف الباب وبيزقوه ومش عايزين المخبرين يفتلوا الباب وبيبصلونا بصة غريبة قوي (مفهمتهاش بصراحة). لكن المشهد ده من امبارح مش عايز يروح من قدام عيني. وكل ما أفكر وشوشهم قلبي يخفق من الحزن والقهر. امبارح، كان امتداد لمرحلة الذل اللي بقالنا فترة عايشينه. كل حاجة ممنوعة. بقول للظابط عايزة ادخل كيس كاكاو قالي ممنوع. طيب حلويات ممنوع. طيب سوداني ممنوع. معظم انواع الفاكهة ممنوعة، الكبد الكفتة المحشي البشاميل الأرز، العيش واي معجنات، حتى السمك ممنوعه ليه؟؟؟؟ حتى ساعة التريض امبارح ممنوعها. يعني ٢٤ ساعة في زنزانة مترين x مترين. على الجانب الثاني الاهالي حياتهم بقت بوس جدا.. الزوجات تحديدا كلهم، وانا منهم، بريق عينهم راح. صحتهم راحت. ضحكاتهم مفتعلة. ومهما حاولوا يقاوموا في حاجة في حياتهم بتزق للخلف.

واشوف التعليمات وانهاردة التعليمات كانت اعملوله محضر تهرب احنا منعرفش عنه حاجة؟! امال مين يعرف في الحقيقة مفيش اجابة
الاول ياخدوا محمد يعد سنتين وبعد كدا يطلع ياخدوا احمد ومنعرفش عنه حاجة وحاليا اخدوا محمد واحمد
مش عارفة اقول ايه #محمد_حسن_فين؟! #احمد_حسن_فين؟! <http://bit.do/e9r9x>

عن ا. محمد منيب

يوم الثلاثاء روحنا نزور بابا. اللي بيحصل طول السنة اللي فاتت
اننا بنوصل السجن، في ميعاد الزيارة القانوني اللي مافيش اتنين
يختلفوا عليه، لكن بيخلونا نستنى لحد ما يتصلوا بأمن الدولة
(هم اللي بيقولوا لنا كدة) عشان ياخدوا إذن انهم يدخلونا الزيارة.
أيام بنستنى ساعة ونصف وأيام بنستنى ٤ ساعات ومفيش
قاعدة ولا نظام مفهوم.
يوم الثلاثاء قعدونا نستنى ٦ ساعات. من ١٠ ونصف الصبح
لبعد ٤ ونصف.



٦ ساعات تصادفوا مع اللي كان غالبا ازحم يوم في تاريخ
القضاء المصري. ٤٠٠ من المحتجزين احتياطيا انتهى الأمر
باستمرار حبس ٢٧٤ منهم. عشرات المساجين كانوا بيتنقلوا من
جوة السجن لمعهد أمناء الشرطة كل ساعة تقريبا. وكل ساعة
خروج عربيات الترحيلات (اللي دلوقتي بقت اتوبيسات بيضاء ضخمة بلا أي شبابيك ولا وسيلة ان اللي
برة يشوف او اللي جوة يطل وعازلة للصوت) بيصاحبه صراخ يائس ومثابر ودووب من الأهالي اللي
واقفين بره بياكدوا لحبايبهم انهم موجودين عشانهم. دوامة متصاعدة من الصريخ مايتفهمش منها أي
شيء. لو انا اللي جوة العربية عمري ما جعرف إذا كان حد بره بينده اسمي. ولو انا اللي بره عمري ما
حقدر امنع نفسي اصرخ باسم اللي يخصني جوة ومش قادرة اطوله.
نهار كامل قضاه على الأقل ٤٠٠ شخص بتتسرق حياته وأيامه ظلم وكام شخص بيتأذي في أهله وحبايبه
وفي حقه حتى في الصراخ.
في نهاية اليوم قالولنا نمشي عشان مفيش زيارات انهاردة. ولا حتى أكل حيدخل. وفي إطار شرح السبب،
قالوا لنا "بركة محمد علي."
ودي غالبا أكثر لحظة في حياتي ماكنتش لاقية فيها رد مناسب.
انهاردة تقرر ان النطق بالحكم في قضية إهانة القضاء اللي بيتعاد فيها محاكمة بابا وحمد الفخراني
ومحمد العمدة ومنتصر الزيات حيكون يوم ٢٤ أكتوبر. يومها حيكونوا قضوا سنة و ١٠ أيام بالتمام
والكمال في السجن.

<http://bit.do/e9r7t>

انا ابنى وحشنى جدا
وحشتنى ضحكته
وحشنى لمته مع اخواته وهمامالين على البيت
وحشنى صوت مفتاحه وهو يفتح على باب الشقه ويملاها مرح
وحشنى خناقنا وزعيقنا وضحكنا .. اتحرمت من وجوده معايا فى أحدى
سنين عمره.
يارب ضاقت أوى على وعليه يارب افرجها يا كريم يا ارحم الراحمين
حسبنا الله ونعم الوكيل فى اللى حرمنى منك وحرمك من حريتك وأجمل
سنين عمرك.

<http://bit.do/e9sbY>



عن حازم غنيم

كل يوم بيموت جوايا حتته بالبطنى
نفس شعور ال ١١ يوم لما اخدو وائل فيهم نفس القهر نفس الكابوس
نفس الوجع
العجز اسوأ احساس وابشع شعور ممكن يحس بيه الانسان العجز
والشئ الغير معلوم
الحاجه اللى متعرفش ايه اولها من اخرها
الألم والوجع والعجز وعدم القدره عن التفسير
لكل اللى يعرف Hazem Ghonim او ميعرفهوش ادعيه وساعده بس
اكتب #SaveHazem وادعيه وادعي لوالدته ربنا يربط على قلبها
ويلهمنا كلنا الصبر

<http://bit.do/e9sbC>



عن نصر ربيع عبدالرؤوف

يقول والد الطالب المختفي قسريا "نصر ربيع عبدالرؤوف"، والمتغيب منذ 13 فبراير 2018، في رسالته بمناسبة بداية العام الدراسي الجديد: مستقبل ابني بيضيع لأسباب غير منطقية، ولا أعرف عنها شيئا حتى الآن، أصدقائه يذهبون ويجنيون وأنا اتحسر يوميا في انتظار أن تأتيه معلومة عن ابنه.

وحصل على حكم من محكمة القضاء الإداري يوم 26 من يناير 2019، بالزام كلا من وزير الداخلية والدفاع والنائب العام بالكشف عن مكان ابني، وأرسلنا الحكم للجامعة عن طريق انذار بعلم الوصول إلا أن أحدا لم يستجب.

وعاوز أعرف مكان ابني فين؟، ابني كان هيبقي

دكتور بتدمروه وتدمروني لية؟، ابني كان بيشتغل في صيدلية بالليل ويروح جامعتة الصبح عشان يوفر تمن دراسته، ويساعدني في مصاريف البيت وفي تعليم إخوانته.

قولتوا بلد قانون رحت المحكمة وأخذت حكم من مجلس الدولة بالزام وزير الداخلية والدفاع والنائب بالافصاح عن مكان ابني ومحدث عبرني.

الجامعة رفضت تستلم مني أي أوراق تقول أنه مختفي وبيكتبوه غياب، مستقبله هيبضيع وشقي عمره وعمرى هيترمي على الأرض.

<http://bit.do/e9Toz>



انا امي مختفية من الساعة 8:30 و مش عارفين نوصلها ولا لاقينها و كانت في الميدان اخر حاجة حد ممكن

يساعدني او يقولي اعمل اييه ؟؟؟!!!

تعديل: ماحدث عارف مكانها فين سألنا في كل الاقسام و رحنا المعسكر مش بيدونا اي معلومات اخر حاجة عرفناها انها هاتتعرض ع النيابة الصبح في عابدين و الله اعلم هي ولا مش هي

<http://bit.do/e9THL>



عن أنس السيد إبراهيم محمد موسى

يقول والد الطالب " أنس السيد إبراهيم محمد موسى"، 26 عاما، والمتغيب من 14 يناير 2019، في رسالته بمناسبة بداية العام الدراسي الجديد:
ابني دخل المعهد العالي للتكنولوجيا في العاشر من رمضان، دفعنا فلوس كتير عشان تعليمه، اختفي ومعرفناش راح فين ولا عمل ايه، مكنش قدامنا أي حلول غير إننا نتقدم بطلب وقف قيد عشان مستقبله مضيعش، خاصة وأن المعهد دا خاص وممكن يفصله.
ابني أنس ملوش في أي حاجة، أنا بتوه نفسي في تفاصيل الحياة عشان اقدر اتحمل فكرة ان ابني مش هنا مش معايا وانا معرفش عنه اي حاجة، كل ما التليفون بيرن قلبي بيترجف بتخيل ان حد هيقولي خبر عن ابني .



<http://bit.do/faUhj>

عن عمرو عزب محمد عزب

تقول والدة الطالب المختفي قسريا " عمرو عزب محمد عزب"، بالسنه الأخيرة كلية الطب جامعة بني سويف، والمتغيب من 3 مارس 2019، في رسالته بمناسبة بداية العام الدراسي الجديد:
أنا مريضة سكر وكل يوم يموت مستنيه ابني اللي أصحابه بينجحوا وقربوا يبقوا دكاترة مستنيه يرجع دراسته زي كل اللي رجعوا، ابني متفوق في دراسته وحاصل على 98% في الثانوية العامة.
عمره ما عمل مشاكل ولا أهتم بحاجته غير مذاكرته كنت بتحايل عليه يقوم ويسيب الكتاب كان دايمًا يقولي عاوز أبقى دكتور أساعد الناس، طول عمره بيذاكر لآخواته ومش مشيلني همه، خاصة إن



باباه مسافر ومفیش حد معايا يشيل المسؤولية غيره.
حاولنا نقدم للكلية أي أوراق تثبت إنه مختفي وإننا منعرفش عنه أي حاجة محدش أهتم . انا خايفة يفصلوه وخايفة مشفوهوش تاني دمرنا مستقبل ابني ودمروني معاه.
ارحموا قلب أم وبيت بيتهد نفسي أعرف ابني فين جراه إيه، عايش ولا لأ، سليم ولا تعبان، نفسي اشوفه قايم الصبح رايح كليته حلمت انا وهو بعيادة ويتقالي يا ام الدكتور حرموني من كل حاجة .

<http://bit.do/faUjs>

ابنه الشهيد بإذن الله ا. #طه_منصور الذي استشهد في مركز شرطه سيدي سالم امس تكتب

والذي الحاج طه منصور كل ابنايه يعيشون خارج مصر ومنذ سنتين كان بيحج وارسلت له أوراق الإقامة كمرافق لي كي يأتي لزيارتنا ولكنه رفض وقال لي لو دخلت تركيا هيعتبروني عدو للبلد ونصحه بعض الناس في مصر الا يذهب لتركيا لانه ربما سيسبب له مشاكل وخاصة انه من الاخوان وقال لي هاجي عندكم اعمل ايه انا هرجع انا عاوز أرجع اموت هناك

رغم انه كان ممكن يجي يعيش معنا ويلعب مع احفاده اللي أتحرم منهم واتحرموا منهم ٥ سنوات ويعيش في استقرار بدون مطاردات أمنية لكنه رفض وقال هرجع اعيش وأموت مع اهلي واشارة اخواني في ازمتهم انا هسافر ليه ملوش لازمة حتي لا تضعي القدوة بين الناس
رحمك الله يا ابي

اللهم اكتبه اسمه في عليين وأحشر مع النبيين والشهداء والصالحين تقبل جهاده اللهم امين

<http://bit.do/faUpz>

امي مريضة سكر ورومتويد لازم يدخلها علاج ... نيابة الامن الوطني الطواريء الجبل الاحمر ، كل الموضوع باختصار احنا ساكنين في وسط البلد ماما نزلت تجيب حاجات خدوها من الميدان على اول شارعنا كلمتها بالصدفة قالتلي انا ف الكمين اللي على اول الشارع خدو بطاقتي وهياخدو التليفون ابعتيلي بابا ، ومن بعدها التليفون اتقفل ، رحلت جري ع الكمين كانوا عارفينها ووصفولي شكلها وقالولي انها ف قسم عابدين مكتب الامن الوطني ، روحت القسم معرفتش اسال لحد ما امين شرطة قالي انها اه جوة بعد محاولات وان الموضوع ساعتين تلاته تحقيق واستجواب وتطلع رحلت تاتي سالت طبيب اطمن ، ادخلها مية قالولي محدش جالنا لا بالاسم ده ولا المواصفات دي ولو امن وطني فمعرفةش بيترحلو على فين ! وهل بيجو القسم اصلا او لا... انا عايزة اعرف امي فين. <http://bit.do/faDEp>

26 سبتمبر

عن مصطفى النجار

زى النهارده من سنه لن أنسى مكالمه مصطفى لى انا خلاص مسافر ازاي طب استنى نيحى نشوفك طب مين معاك طب هظمن عليك ازاي طب

الرد ادعيلي ان شاء الله هظمنكوا على ان شاء مش هتاخر عليكوا خدى بالك من نفسك خدى بالك من العيال انا عارف انك جدعه كل حاجه هتبقى كويسه ان شاء الله أما أوصل أسوان هكلمك اطمنك انى وصلت مش هنسى حاله مامته النفسيه تكلمني شيماء خليه مايسافرش وانا أقولها بالله عليكى احلفى عليه عشان مايسافرش وهى فى حاله صعبه من البكاء المتواصل

مش هنسى وانا بقوله مصطفى انا استخرت ومش مرتاحه وسألته استخرت قاللى اه طب مرتاح قاللى لا بكيت وكنت منهارة طب خلاص بلاش خليك وان شاء الله خير ربنا معنا مصطفى انا محتاجك و سهيل وهنا ويمنى

ويقولى والله وانا كمان مش عارف هعمل ايه من غيركوا

<http://bit.do/faUvD>

27 سبتمبر

عن أمينة عبد الله

قالولي يوم وتخرج واستنيت ، يومين ، وتلت ايام لحد ما فات ٦
ايام وانتي بعيد عني ومعرفش حتى مكانك!
معرفش بتاكلي ، بتشربي ؟ بتاخدي الدوا ، لا عارفة تاكلي ولا
تسربب ولا تغيري هدمك ولا دواكي هتكوني بتاخديه ، يا ترى حد
ضايقك ، بتنامي!
عارفة انك قوية واستحملتي كتير
عارفة انك مبتخافيش من حد وبتساعدني كل الناس
بتساعدني ناس متعرفيهومش قبل اللي تعرفيهوم
كنت دايم اقولك ليه بتساعدني فلان ده مش جدع تقوليلي معلى
سألني فحاجة مينفعش اتاخر
انا خايفة عليكي .. ويمكن لأول مرة اخاف عليكي



لما كنت بتتبعي كان عقلي بيرفض فكرة انك تعبانه
كنت اقولك يلا ننزل ، او اعمليلي اكل او تعالي معايا مشوار البنك
كنت برفض فكرة انك ممكن متبقيش معايا او عقلي مش بيصدق انك ممكن تتبعي
وانتي كنتي بتفهمني ده
انا بجد خايفة اوي عليكي ووحشتيني اوي
ربنا بيترها معاكي ويحمن قلوبهم عليكي ويجعل ف قلوبهم رحمة فتعاملهم معاكي يا يخفف عنك ويرحمكم
ف الحد ده وتعرفي تتنفسى..
ماما انا بقيت اصحى من النوم مبندھش عليكي...
بس لسه بصحى ادور عليكي

Amina Abdalla

اللهم الهمنا والهمها الصبر والقوة

<http://bit.do/fa4cD>

29 سبتمبر

عن أمينة عبد الله

ياريتهم خدوني انا بدالك ياريتني انا كنت مكانك
وحشتيني اوي يا ماما وحشتيني اوي ، كل حاجة وحشة من غيرك ٧ ايام دلوقتي وانا معرفش انتي فين ..
بدعيلك والله ولقيت ع الدنيا كلها عشان احلل اوصل لمكانك ومفيش رد

كلمت كل الناس عملت كل حاجة والله مقصرت .. عدلت يومي وبقيت اصحى بدري ونضفت البيت وغسلت وجبتك الموبايل اللي كان نفسك فيه وعملتلك اوردر ببوتاجاز جديد معلى كنت مشغوله عنك .. لما ترجعي هنخرج سوا زي زمان وهفسحك وهنساقر زي ماكنتي عايزة وانا مكنتش فاضية .. لو اخر مرة شوفتك كنت اعرف انك ممكن فجأة متبقيش معايا مكنتش سيببتك ونزلت .. انا اسفة على كل لحظة كنت مسحولة فيها ف الشغل بس والله كل ده عشان اريحك .. وحشتيني اوي .. قلبي بيتقطع والله وانتي بعيد .. يارب يلهمنا ويلهمك الصبر والقوة ربنا يردك لبيت بالسلامة ويحنن قلوبهم عليكي ربنا ان شاء الله هيكون حنين ورحيم بيكي .. " ولا تقنطو من رحمة الله " كنتي علطول بتقوليلي كدة .. انتي اقوى ست شوفتها فحياتي وهنعدي سوا المحنة دي زي اي محنة عدت علينا ♥

<http://bit.do/fa4mD>

30 سبتمبر

عن إسلام

إسلام مخفي قسرياً من 8 شهور من يوم 26 يناير، وظهر انه رده في نيابة أمن الدولة في القاهرة على ذمة قضية تظاهرات التحرير الأخيرة وأخذ 15 يوم !
بابا كان في حصة في الفصل في شغله في مركز القوسية أسيوط، اعتقل واترحل على القاهرة واتعرض على نيابة أمن الدولة على ذمة نفس القضية تظاهرات التحرير الأخيرة وأخذ 15 يوم !
مفيش كلام ولا ألفاظ تعبر غير حسبي الله ونعم الوكيل، يا رب انتقم ويشوفوا في أهاليهم اللي بندوقه يا رب كل ظابط وأمين شرطة وعسكري كان سبب في الظلم الواقع علينا يترد له ظلمه أضعاف في الدنيا قبل الآخرة وما ذلك على الله بعزيز.. ادعوا لحبايبي.. <http://bit.do/fbgxZ>

عن محمد جمعه

برغم اني عارفة ان الفيس بوك لا بيحل ولا بيربط بس تقريبا دي آخر طريقة قدامي محمد أخويا المعتقل من ٣ سنين في سجن شديد الحراسة ٢ في طرة بيتعرض حرفيا للموت البطيء جوة السجن
أول مرة شوفنا محمد واتكلمنا معاه كان الأسبوع اللي فات أقسملكم بالله اني معرفتوش من التغير الرهيب في شكله وزنه نزل بشكل مش طبيعي لدرجة انه فعلا اصبح جلد على عضم ووشه كأن فيه حروق وعينه مش عارف يفتحها
بعد ما اتكلمنا معاه عرفنا انه عنده سخونية طول الوقت وانه مبيقدرش ياكل أي حاجة من السجن لأنه مجرد ما بياكل بيتعب جدا
وكان حرفيا بيترجانا اننا نعمله تحاليل ونحاول نعرف هو عنده ايه ونعالجه
محمد طبعا معرفش اني حاولت قبل كذا كتير ارواح السجن علشان يسحبولي عينة منه وأحلها برة واتظمن عليه وادارة السجن كانت بترفض.

روحت يوم الاربع اللي فات المحكمة العسكرية في العاشر علشان اخذ تصريح بعمل تحاليل ليه ودخلت
للمعيد هاني رامي اللي قالي نصاً محدش هيديكي عينة مهما عملتي وبعد الحاح شديد مني قالي خدي
التأشيرة اهي ع التصريح وانا كدا عملت اللي عليا
روحت السجن بالتصريح اللي عليه تأشيرة من سيادة رئيس المحكمة والتصريح اترمي في الزبالة يا
جماعة!

كان ناقص نبوس رجلهم علشان يدونا العينات.. آخر ما زهقوا مننا قالولنا احنا هنعمله تحاليل في السجن
واتكلوا انتوا على الله!

محمد كان عنده جلسة النهاردة وللأسف وضعه بيزيد سوء بشكل ملحوظ جدا
سألته في أي تحاليل اتعملتلك قالي تحاليل ايه هو انتي مفكرة السجن هيعمل تحاليل
المحامي بيقول هما في السجن بيحاولوا يموتوهم بالطبئ متستنوش منهم يحاولوا يعالجوهم
الأمانات مقفولة مش عارفين ندخله أي أدوية ولا فيتامينات ولا حاجة
مش عارفين نعمل حاجة ومتكتفين تكتيفة قاتلة
احنا بنروح لمحمد نتقهر ونتوجع ونحس بعجزنا الشديد جدا ونرجع
احنا مش عارفين نعمل ايه في البلد دي ولا ننقذ حبايبنا ازاي ولا نقلت منهم ازاي
حد يقولي أعمل ايه في الوضع اللي محمد فيه دا

<http://bit.do/fbgzv>

مش عارف أقول إيه بصراحة. أبويا هو كمان حالياً مختفي ومنعرفش عنه حاجة من إمبراح (يوم الحد 29
سبتمبر). صلاح محمود محمد، مدير إدارة هندسية بمحافظة الجيزة، كان في الشغل في مبنى محافظة
الجيزة ومرجعش في مياعده الطبيعي فبدأنا نرن على التليفون وكان مبيردش. وإنه ردة روحنا سألنا في
الشغل وآخر معلومة وصلنا ليها هو إنه خرج من الشغل حوالي الساعة تلاتة ونص العصر يوم الحد 29
سبتمبر 2019. فدورنا على العربية في محيط مكان الشغل ولقيناها مركونة هناك. وده معناه إنه يا إما
مخرجش من الشغل واتقبض عليه من جوة يا إما خرج واتقبض عليه بمجرد خروجه من مبنى المحافظة.
إحنا منعرفش هو فين ومفيش أي وسيلة نعرف نوصله بيها، هو كدة مختفي قسرياً برضو.

أبي بقاله ٦ سنين في العقرب. وبمعجزه،،،، خد براءه في القضية اللي كان فيها. ومن ٣ اسابيع ما بين قسم
الخليفه وقسم مدينة نصر وأمن الدولة بالشيخ زايد. انهارده.... عرفنا انه بيتعرض عالنيابه بتهمه
التظاهر يوم الجمعة اللي فاتت... وهو ما خرجش اصلاً من عندهم. <http://bit.do/fbgzH>